

WANTOK

NIUSPEPA BILONG YUMI OL PAPUA NIUGINI STRET!

32 pes

Namba 1,391

Wik i stat long Fonde Februari 22, 2001

70t

Ol kalabus skulim ol sumatin
- pes 3

Ol ovastis nius
- pes 13

Nupela marasin bilong sik Malaria long PNG
- pes 13

Bung bilong wanbel long lusim ol birua samting

I GAT bilp olsem bung bilong ol Bogenvil Komanda long Taunsvil Australia bai i kamapim wanbel long lusim ol samting bilong pait long ailan.

Dispela agrimen bai i gat ol plen long rot we ol wanwan pait grup long Bogenvil bai lusim ol samting we ol i wok long yusim long pait long dispela hevi long Bogenvil.

Long ol ripot we *Wantok* i kisim long Opis bilong Bogenvil Afeas (OBA), stat yet long Rabaul bung las mun we ol Bogenvil na Nesene Gavman lida i bin kamap wantaim agrimen long givim independens vot na sanapim gavman i gat moa pawa long ailan, ol wok namel long

olgeta grup i stap insait long ol politikel na pis toktok i wok long go gut.

Lusim kwiktairim ol sotgan we ol pait grup long aifari i holim i stap em bikpela toktok we Nesene Gavman i bin givim long ol Bogenvil lida na pipel olsem samting i mas kamap pastaim bipo ol i sanapim gavman i gat moa pawa na tu, tok orait long givim independens vot. Nesene Gavman i bin tok independens vot bai i kamap long 10 na 15 krismas i kam bikos pastaim, ol i mas lukim olsem gavman i gat moa pawa long wok gut.

Wantaim dispela salens, ol Bogenvil lida i bin go bek na kari-

maut ol aweanes na tok klia long ol dispela samting i go long ol pipel long ailan.

Na bung bilong ol BRA na resistens komanda long Taunsvil Militeri Bareks long Knes em i wok long skruim dispela samting.

Ripot i kam long OBA i tok long Mande na Tunde, ol wan wan komanda grup (olsem ol BRA ol yet na ol resisten ol yet) yet i bin bung long glasim na skelim ol samting. Long tude Fonde, kambain grup i bung wantaim na toktok na stretim ol samting. Na ol bai kamap wantaim wanpela wanbel posisen long toktok wantaim Nesene Gavman grup na kamap

wantaim agrimen we i gat plen long lusim ol samting bilong pait long Bogenvil.

Ol bikpela lidaman long Bogenvil i makim Provinsel gavman na Bogenvil Pipels Kongres, Ol BRA na resistens lida, sampela sios, ol meri na ples lida wantaim sampela teknikel opisa bilong Bogenvil na Nesene Gavman na ol memba bilong Nesene Komiti long Bogenvil we Bogenvil Afeas Minista Moi Avei i go pas long en i stap long dispela bung.

Mista Avei i tok dispela Taunsvil bung em i wanpela bikpela samting na ol grup i bung i mas kamap wantaim wanpela agrimen.

Plis holim sampela Esia lain long paspot hevi

VERONICA HATUTASI i raitim

OL WOK painimaut long Foren Afeas we sampela opisa i givim ol giaman paspot pepa long ol ausait lain i kam insait long kantri i go het yet.

Ol Plis Fraud Skwat na Nesene Intelijens Ogenaisesen (NIO) i kari-maut dispela wok.

Ripot bilong NIO i bin kamap pinis tasol Fraud Skwat i skruim yet wok painimaut bilong ol. Long mun Desemba na Janueri ol bin holim pasim na sasim tupela Foren Afeas woklain long dispela samting.

Aninit long dispela wok, ol plis long las wiken i bin holim pasim na sasim tupela Saina man na sampela lain moa husat i stap hia we ol i bin stap long haus bilong ol (Saina lain).

Ol Saina lain ya em ol ausait lain o ovastis lain husat i stap insait long kantri wantaim nogat tok orait pepa.

Ol i bin holim pasim na putim ol dispela lain long Boroko plis sel tasol ol i lusim ol i go taim ol i baim plis beil mani.

Bipo long wok i no stret we sampela Foren Afeas

opisa i mekim i kamaut long ples klia, planti lain bilong Esia i wok long kam insait long kantri wantaim ol giaman paspot pepa. Ol i bin baim sampela Foren Afeas opisa long wokim ol dispela na kisim planti Esia lain long mekim ol liklik wok long ol stoa, ples bilong kaikai o ol fast fud stoa na ol araples liklik wok we ol asples PNG yet inap wokim long en.

Wantok i no bin inap long toktok wantaim bos bilong Nesene Kapitel Distrik plis Tom Kulunga long kisim moa toktok long ol dispela Saina man na ol lain bilong ol bikos em i bin stap long wanpela woksop. Na wankain tu long Plis Kriminel Investigesen Divisen (CID) bos, Thomas Eluh we telipon i bagarap na *Wantok* i no bin nap long kisim sampela moa toktok long en long dispela sam-

ing. Tasol ol ripot we *Wantok* i bin kisim i tok ol plis i bin go insait long tupela haus bilong ol Saina lain long Boroko na holim pasim tupela Saina papa bilong ol haus na sampela ol wantok bilong ol.

Ripot we *Wantok* i kisim long Foren Afeas opis i tok ol plis investigesen i go het na dipatmen i sapotim ol dispela wok painimaut.

Ripot i tok dipatmen i laikim bai dispela wok i pinis long neks mun na ol dispela opisa i stap long rong bai i kamap long han bilong plis na ol atoriti i kwestenim ol.

Opis i tok tu olsem pasin bilong ol ausait lain i hait na kam insait long PNG em i wanpela wari we dipatmen na ol poroman kantri olsem Australia na Indonesia i gat.

Dispela hevi i kamap moa yet long ol boda eria olsem Daru na Tores Streit bodamak na Jayapura na Sandaun.

Fraud Skwat opis i tok ol i skruim yet ol wok long dispela samting tasol ol i no kamap wantaim wanpela bikpela samting yet.

Opis i tok pasin bilong planti Esia pipel i yusim ol giaman paspot na kam insait long kantri na wok long ol wantok bilong ol long ol isi leba wok i kamap planti long dispela taim.

Opis i tok em i wok bilong Foren Afeas long sekim ol dispela samting tasol bikos sampela opisa bilong dipatmen i no mekim wok stret Ina kisim mani long ol ausait lain ya na givim ol giaman paspot pepa. Ol plis i wok long helpim kari-maut dispela wok.



Ol eks kalabus i laik helpim! Niu Luk Yut i bung long kari-maut wok bilong skulim ol sumatin long noken go insait long ol raskel na travel pasin. Lukim stori long pes 3.

Nestlé MILO

IKEN WOKIM GUTPELA SAMTING LONG YU

PLIS BOGENVIL

• **BOGENVIL:** Plis long Bogenvil i askim ol stilman husat i bin stil long Buka Enterprises long givim ol yet nau long gutpela bilong ol yet.

Superintenden Joe Bemu i mekim dispela tok-tok long Redio Bogenvil las wik bihain long ol BRA paitman i bin holim wanpela bilong ol lain ol i ting i bin mekim dispela stil pasin na bihain lusim em i go fri.

Mista Bemu i tok ol BRA paitman i bin holim dispela man na bihain lusim em. Ol i bin tokim man ya long painim ol lain ol i bin stil wantaim na kam givim ol sotgan na ol samting ol i bin yusim long mekim dispela stil pasin. BRA i givim ol inap Februari 26.

Mista Bemu i tok em i no klia wanem kain mekimsave bai ol lain ya i kisim long han bilong BRA. Olsem na em i askim ol lain ya long givim ol yet long han bilong plis pastaim.

Em i tok em i klia long belhat bilong ol Bogenvil manmeri taim ol lain ya i bin stilim K9000 long dispela stua bihain long wanpela stil pasin bin kamap pastaim long Rabaul Shipping ejensi.

Plis i bin holim wanpela bilong ol dispela lain na em bai kamap long kot sampela taim bihain.

• **WEWAK:** Saplin bilong Plis boa na kostel koman, Sief Inspekta Steven minnuma Pino i dai long Wewak las wik Fonde bihain long em i bin bungim sik.

Balus i karim bodi bilong em i go long Lae long opisel finerel sevis na bihain ol i karim bodi i go bek long ples bilong em Snakap long Ambunti long Is Sepik provins na ol i planim em long Tunde dispela wik.

Long dispela lotu bilong daiman (finerel sevis) long Lae Our Savior Lutheran haus lotu, Lae plis bos Awan Sete na Asisten Komisina Alfred Reu i tokaut long ol gutpela wok Reveren Pino i bin mekim olsem plisman na saplin.

Leit saplin Steven Pino i no plis saplin tasol, em i plis opisa tu. Em i bin helpim wok bilong plis fos na komyuniti tu. Dispela em i wanpela bikpela wok tru tasol em i wanpela man bilong daunim em yet gut tru na mekim wok bilong em gut tru, Mista Sete i tok.

• **LAE:** Ol raskol man i bin go insait long haus bilong wanpela waitman na kilim em long Sande moning long Eriku.

Lae plis i tokaut olsem waitman ya i bin slip long haus i stap taim ol raskol i brukim banis na go insait. Em i traim long pait wantaim ol tasol ol raskol i sutim em long sotgan.

Kostol Boda plis komanda Alfred Reu i tok waitman ya i kolim ol Wormald Sekyuriti Sevis i kam na ol i kisim em i go long Tusa haus sik tasol em i dai taim ol i kamap long hap.

Mista Reu i tok waitman ya em Rob Morris bilong Melbon Australia na em i wok wantaim Kwila Graphics. Plis i no inap givim ful ripot long dispela birua tasol ol i wok long sekim yet.

Plis i wok long sekim tu wanpela dai we i kamap long Buimo haus kalabus long las wik. Ol lain i ting kalabus man ya i dai taim ol woda i paitim em long i laik traim ronawe long haus kalabs.

Wenge tok em i bihainim disisen bilong Tutumang

ELLEN VAVITAN TIAMU
i raitim

GAVANA bilong Morobe Luther Wenge long dispela wik i tok olsem ol toktok bilong namba tu Gavana Cornelius Smith long em i no ronim gut provins em i no tru.

Mista Smith i bin toktok long niuspepa long Mande dispela wik olsem Wenge i pinisim mani bilong provins long haiariim helikopta na askim tu olsem mani bilong Enti VAT kempen bilong Morobe provins i go we.

Gavana Wenge i bin bekim ol dispela toktok na i tok dispela kain toktok i no stret aninit long lo na i bagarapim nating nem bilong narapela man.

Mi ronim dispela provins bihainim lo na mi i no mekim samting long laik bilong mi yet.

Planti ol samting mi mekim em


mi kisim tok orait long Tutumang na Edministreta bipo, Ainea Sengero na Edministreta nau Manasupe Zurenuoc, Mista Wenge i tok.

Wenge i tok ol toktok bilong Mista Smith olsem em spendim mani long haiirim helikopta na raun long provins em i no tru na dispela mani em i kolim olsem moa long K1 milien em i no stret.

Morobe em wanpela bikpela provins tru na pipel i stap long olgeta liklik hap long bikbus na mantan na i nogat rot long go long hap olsem na helikopta tasol i ken flai i go insait long ol dispela hap.

Bikpela hap bilong dispela mani tu em mipela bekim ol dinau bilong Jerry Nalau taim em i bin Gavana, Mista Wenge i tok.

Em i tok em i no save tok strong o kros long tupela Edministreta long haiirim helikopta tasol em i save askim na ol yet i save tok sapos i gat mani o nogat.



Yam o wanem samting! Bai yu painim dispela kain yam long Milen Be tasol. Dispela em yam bilong Gudinap Ailan em wanpel asples man yet i holim. Foto: POU TOIVITA.

Wol Kristen Komyunikesen glasim pasin bilong stretim hevi long ol trabel eria

OL NIUSLAIN na ol Sios na ol Non Gavman Ogenaisesen i mas wok wantaim gavman long kamapim bel isi pasin insait long wan wan kantri bilong ol long Pasifik rijen.

Dispela toktok i kamap bihainim wanpela wik bung we ol degelet bilong Wol Asosiesen bilong Kristen Komyunikesen i bin holim long Oklen, Nu Silan long dispela wik.

Het tok bilong bung em "Communication: Confrontation to Reconciliation" o long Tok Pisin em Bung na toktok wantaim long pasin bilong kamapim bel isi pasin.

Fotinpela degelet bilong ol Pasifik kantri wantaim Australia na Nu Silan i bin sindaun na toktok long rot bilong kamapim belgut pasin, gutpela sindaun, sekan pasin long ol ples we hevi i stap long en.

Long ol ripot, ol degelet i bin serim ol stori long ol

hevi i kamap long ol wan wan kantri bilong ol na ol wok progres i kamap long stretim ol samting.

Ol i bin toktok tu long ol wok developmen, ol narakain pipel insait long wanpela kantri, pasin bilong bagarapim raits bilong ol narapela na ol hevi we i kamapim long ol, rait long graun, gutpela gavman, militeri, edukesen, kalsa na rilijen.

Ol degelet i bin wanbel olsem ol niuslain, ol sios na ol arapela sios komyuniti, ol NGO na gavman i mas wok bung wantaim long edresim ol dispela samting.

Ol i tok ol eksen we ol i kisim i mas gutpela na helpim ol pipel long en. Ol i tok i moabeta long lusim pait pasin we i save kamapim hevi na lukluk long ol sampela rot long stapim hevi, pait na kamapim bel isi pasin. Na wanpela long ol dispela rot we ol i bin lukluk long en

em yusim ol drama na singsing long kamapim ol aweanes long dispela samting long helpim ol wok long kamapim belgut pasin namel long ol pipel i stap long hevi insait long rijen.

Dispela bung i bin luk-save long wok bilong strongim aweanes long wanpela arapela, komyunikesen o pasin bilong salim na kisim toktok i go na i kam na dailog, wokim komitmen o gat strongpela tingting long senis, bihainim ol rot bilong kamapim gutpela sindaun na jastis, pasin bilong pogivim wanpela arapela na kamapim bel isi, balensim rilijen na kalsa na wok wantaim ol NGO, ol sios na midia long promotim pasin bilong kamapim gutpela sindaun na belgut pasin.

Ol degelet i komitim ol yet long karimaut ol wok long skruim ol dispela samting insait long ol wan wan komyuniti bilong ol.

Taiwan kampani bai wokim Fri Tred Jon long Sandaun

YAKAM KELO i raitim

WANPELA kampani long Taiwan i sainim wanbel pepa wantaim PNG Gavman long dispela wik long mekim ol wok bilong kamapim Fri Tred Jon insait long Vanimo Sandaun.

Precision Technical Engineering Corporation (PTEC) i kamap wantaim save na ekspierens bilong ol long wokim Fri Tred Jon insait long planti ovasis kantri na i laik mekim dispela wok hia long PNG.

Ol bikman bilong dispela Taiwan kampani i tok ol bai mekim dispela wok we inap kirapim ol bikpela wok bisnis indastri insait long kantri na pulim planti gutpela wok na bisnis i kam long PNG.

Ol i askim sapos PNG i ken helpim long mekim ples i stap gut long ol wokman i ken kam stap na mekim gut na projek tu i ken ron gut na ol bisnis i ken kamap na ron gut long dispela Fri Tred Jon eria.

Ol i tok Vanimo inap kamap namba wan PNG intanesenel Fri Tred Jon senta we planti ovasis kampani na bisnis inap kam long mekim bisnis hia na tu baim ol samting PNG i save kamapim long salim.

Ol i tok dispela projek inap kamapim mak olsem

10,000 wok long ol PNG manmeri long mekim. Dispela em namba bilong ol PNG lain stret na i no ol ovasis lain. Ol ovasis lain bai kam bihain long ol wok we bai i gat ol bikpela bikpela masin na kompyuta long mekim wok.

Ol i tok dispela projek tu inap givim moa save na trening ol PNG manmeri long save na mekim dispela wok long bihain taim.

Fri Tred Jon em olsem wanpela rot we ol sip i ken ron long em i kam long ovasis wantaim ol kago o karim kago i go long ovasis. Ol bisnis na kampani bai yusim dispela rot bikos Gavman i sanapim long mekim isi long sampela samting takis we i ken kam daun. Dispela em i olsem tingting bilong Gavman long kirapim wok bilong bisnis na pulim moa investmen i kam insait long kirapim kantri.

Rijinol memba bilong Sandaun na nau Minista bilong Tred na Indastri John Tekwie i bin go pas long dispela tingting bilong Fri Tred Jon.

Long dispela bung, em i tokaut olsem Fri Tred Jon em i no wanpela driman. Em i wanpela bikpela projek we bai kirapim kantri long wok bilong bisnis na ol bikpela sevis na arapela wok inap kamap na ol pipel i ken mekim na kisim mani tu long en.

Taim bilong ren long kantri senis

VERONICA HATUTASI i raitim

BIHAINIM bikpela san o drai long 1997, kantri i wok long bungim senis long taim bilong ren na san.

Kantri i bin wok long kisim planti ren na dispela em narakain we ol i kolim long La Nina.

Kain bikpela drai taim long 1997 we bikpela san i bin bagarapim kantri em ol i kolim long El Nino na nau em i narakain long dispela taim.

Weda Sevis opis long Mosbi i tok taim bilong ren we i wok long kamap long Mosbi na tu long olgeta hap bilong kantri, moa yet long Niugini Ailan na ol hap long Momase rijen em i laspela hap long La Nina bipo niutrel piriet o taim i kamap. Bihainim taim bilong La Nina, PNG i bin gat ol bikpela ren na taitwara i kamap namel long 1998 na 1999 i kalapim 2000. Na dispela kain weda (taim bilong ren) bai i pinis long dispela yia, Weda Opis i tok.

Taim bilong ren bai i go inap long mun Epril.

Opis i tok Niugini Ailans rijen bai i kisim moa ren gen long mun Me i go inap long Septemba.

Opis i tok em i taim bilong saut isteli monsun win na kantri i wok long kisim planti ren.

Opis i tok Mosbi i wok long kisim ol strongpela win bikos presa i daunbilo long Galp bilong Kapenteria long wanem i bin gat saiklon o strong win long dispela hap. Tasol nau em i muv i go longwe long wes na win i go daun long hia.

Opis i tok mak bilong ren long dispela mun na mun i kam bai i antap moa we Mosbi siti i bin kisim insait long las tripela wik.

Opis i tok sapos i gat sampela hevi i kamap long weda Nesenel Disasta na Imejensi Sevis opis na opis bilong ol tu bai givim ol woning o tok lukaut i go long pablik long en.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.
Acting Advertising Manager:
Jocko Oberleutter
Editor of Wantok:
Yakam Kelo

Papers distributed by air throughout PNG.
Available by air mail subscription within Papua New Guinea and overseas
Email address:
word@global.net.pg

Advertising deadlines, Display bookings: Tuesday midday. Camera ready copy: Wednesday Friday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

NCDC stapim yunion manl, Sarea i tok

NESENEL Kapitel Distrik Komisn (NCDC) yunion i tokaut olsem NCDC i bin traim long bagarapim wok na ron bilong yunion stat long Oktoba las yia i kam inap nau.

Yunion presiden Jackson Sarea i tokaut olsem mani bilong yunion we ol NCDC woka i save putim long olgeta potnait i no bin kam long yunion long las yia yet. Na dispela i soim olsem NCDC i no bin salim mani bilong ol wokmanmeri i go long yunion.

Mista Sarea i tok pasin NCDC aninit long lidasip bilong Bernard Kipit i mekim dispela pasin long kilim dai strong bilong yunion long sanap na makim ol wokmanmeri bilong NCDC.

Mista Sarea i tok tu olsem yunion opis i nogat mani long baim loya na ol akaunten bilong kam stretim rekot na buk bilong yunion we ol i ken soim long Industriel Rejistra long soim ol wok na rot we

mani i go long en (oditing). Mista Sarea i tok dispela pasin i soim tru olsem NCDC i no ron stret moa bikos pasin bilong hait politiks i stap insait long traim daunim na bagarapim ol arapela na wok bilong ol.

NCDC yunion i tokaut tu olsem i gat planti samting we i no wok stret na yunion i laik salensim NCDC menesmen long ol dispela samting tasol NCDC i katim daun strong bilong ol long sanap na komplem o toktok egensim ol (NCDC).

Seketeri bilong yunion Wilson Thompson tu i sapotim toktok bilong presiden bilong em na tok planti bikpela projek olsem ol nupela wok i kamap long rot sistem long Mosbi i no plen na save bilong dispela nupela menesmen bilong NCDC. Dispela em plen i stap pinis long masta plen o kopret plen bilong wokim ol bikpela

projek insait long siti. Mista Thompson i tok NCDC menesmen wantaim Gavman i no ken kisim biknem long ol nupela rot ol i kamapim bikos plen istap pinis bipo yet long opim ol rot na mekim tu ol nupela rot sevis insait long NCD. Em i mekim wankain tok tu long ol arapela projek olsem skul na ol arapela projek we i wok long kamap we ol i bin stap pinis long plen na i no nupela tingting o plen we i kamap aste tasol.

Tupela i tokaut tu olsem long nau yet, tupela i stap olsem presiden na seketeri bilong NCDC yunion. Tupela i no pinis long wok yet bikos i nogat wanpela ileksen i kamap yet long senisim tupela.

Tupela i mekim dispela toktok bikos Ekting Siti Edministreta Bernard Kipit i tok Mista Thompson na Sarea i no moa eksekutiv memba bilong NCDC yunion.

Palamen i no inap bung long toktok bilong pe, Mekere i tok

YAKAM KELO i raitim

PALAMEN bai i no inap bung long toktok bilong stretim nupela potnait pe bilong ol palamen memba, ol Minista na ol sinia pablik sevans. Bikos Nesanel Eksekutiv Kaunsil (NEC) i stapim pinis nupela potnait pe bilong ol pablik sevans pinis. Tasol pe bilong ol politiks lain i stap yet.


Praim Minista Sir Mekere Morauta i mekim dispela toktok long bekim planti toktok salens we i bin kamap taim ol politisen na ol sinia pablik sevans i kisim nupela ponait pe i go antap insait long tupela potnait pinis.

Sir Mekere Morauta i tokaut olsem long sait bilong ol pablik sevans em NEC i askim Salaris na Rinumeresen Komisn (SRC) long stapim pe bilong ol lain ya. Tasol NEC i askim sapos SRC i ken lukiuk long stapim pe bilong ol politisen tu. Bikos NEC i nogat pawa long stapim o senisim disisen bilong SRC.

SRC em wanpela bodi we Gavman i nogat pawa long senisim ol toktok na disisen bilong em. Palamen wanpela tasol i gat pawa long senisim ol wok na disisen bilong SRC.

Praim Minista Sir Mekere Morauta i tokaut olsem em i luksave long ol toktok bilong Sir Michael Somare na em i klia gut bikos Sir Michael Somare i no bin vot long taim bilong pasim nupela lo bilong Intagriti ov Politikel Pati na Kendidat Bil bikos em i laikim Palamen i mas kam bek bung. Sir Michael Somare i bin tokaut long ol nius ripot olsem Palaman tasol i gat pawa long kam bek bung na stretim dispela senis bilong nupela potnait pe bilong ol lida na ol sinia pablik sevans. Tasol Sir Mekere i tok Palaman bai i no inap bung inap long Julai dispela yia.

Sir Mekere tu i sutim tok long olpela Praim Minista na nau lida bilong Oposisen, Bill Skate long kamapim pawa na wok bilong SRC long taim bilong olpela Gavman. Em i tok olpela Gavman bilong Bill Skate i bin kamapim dispela



• Sir Mekere Morauta.

samting olsem na wanem senis long apim pe bilong ol politisen na ol sinia pablik sevans i kamap bihainim stret dispela disisen.

Sir Mekere i tok dispela 160% em i bikpela tumas na Gavman i wari tru long planti tausen wokmanmeri long ol rurel eria bai nogat wok. Bikos planti kampani bai bruk long dispela bikpela pe ol Minimu Wejes Bod i askim.

Praim Minista i tok Gavman i skelim tu olsem taim bilong apim ol potnait pe i go antap bilong ol wokmanmeri i mas bihainim tu strong kantri i sanap long en. Sapos kantri i save mekim planti mani, ol samting bilong salim long maket i planti na mekim planti mani sapos prais bilong ol samting i go antap (CPI).

Em i askim tu bilong wanem na Minimum Wejes Bod i no skelim tu strong bilong mani (PNG Kina) wantaim mani bilong ol arapela kantri olsem Amerika, Australia na ol arapela ovasis mani tu wantaim. Dispela inap mekim klia sapos ol PNG woklain i ken kisim moa pe i go antap o nogat, em i tok.

Em i tok Gavman i gat wok long lukautim na sevim interes bilong ol pipel na dispela em wanpela bikpela disisen Gavman i mekim long gutpela bilong ol pipel. Sapos ol kampani i stat baim dispela 160% pe i go antap, planti tausen manmeri bai nogat long mekim.

Niu Luk Yut skulim ol sumatin long abrusim ol raskol pasin

OL lain i bin pinis long haus kalabus i mekim wanpela wokabout raun nau long skulim ol yangpela long laip insait long haus kalabus na ol rong pasin we i save putim man long kalabus.

Foapela lain husat i bin pinis long kalabus i bin raun toktok wantaim ol skul sumatin long noken go insait long pasin raskol na bikpela samting em ol i noken westim ol gutpela sans ol i gat we i ken helpim laip na sindaun bilong ol. Wanwan memba i bin givim stori long laip bilong ol long kalabus na laip bilong ol long ausait na wanem samting i mekim ol i luksave na daunim ol yet long kamapim gutpela pasin na sindaun nau. Dispela lain i stap insait long wanpela nupela grup ol i kolim Niu Luk Yut we i wok long bungim ol lain i pinis long kalabus long mekim dispela gutpela wok bilong skulim ol arapela long noken

mekim ol trabel. Dispela foapela lain i tok amamas tru long dispela Niu Luk Yut na man husat i go pas, Victor Soni na memba bilong em long helpim ol lain i lusim kalabus long painim sampela kain spes insait long komyuniti wantaim kain wok olsem.

Minista bilong Sosel Welfea na Developmen, William Ebenosi i bin opim wanpela program ol i kolim "Crime Free Schools 2001" we isut long ol skul pikinini insait long Mosbi. Na dispela program i bin op long Pot Mosbi Nesanel Hai Skul long las wik we 8-pela kalabus lain i stap insait long en.

Dispela em wanpela namba wan na nupela program tru we Dipatmen bilong Sosel Welfea na Developmen i mekim wantaim dispela yut grup long skulim ol skul pikinini long noken go insait long ol pasin raskol na trabe. Ol olpela kalabus lain

olsem Victor Soni, Gideon Mera na Disok Buka i tokaut olsem Niu Luk Yut bai sanap long bungim ol olpela kalabus lain long karimaut ol toktok i go long skulim ol yangpela na helpim ol wok na program bilong ol Non Gavman Ogenaisesen (NGO) na arapela grup husat i save helpim wantaim dispela kain program.

Mista Soni i tok Niu Luk Yut em ol olpela kalabus lain we ol i lainim na luksave long pasin bilong senisim laip na sindaun i no long senis long bodi tasol, tasol long tok bilong God tu. Mipela i gat moa save long hevi bilong lo na oda insait long kantri tude na mipela i lukim olsem lo na oda hevi em i olsem wanpela sik we i save kamap bikos long ol hevi insait long sindaun bilong komyuniti, hevi long wok bilong bisnis, pasin bilong politiks na ol senis long pasin tumbuna na kalsa.

Ol yunion strong yet long apim pe

OL yunion i tokaut pinis olsem ol bai egensim tru Nesanel Gavman sapos Gavman i no oraitim 160 pesen (%) pe go antap bilong ol liklik wokmanmeri insait long ol autstesin na distrik level long kantri.


Nesanel Kapitel Distrik Komisn (NCDC) yunion i tokaut olsem Gavman i nogat wanpela as tru long pret long daunim o stap pe bilong ol woka long go antap. Bikos longpela taim tru i kam ino gat wanpela senis long level bilong leba.

Seketeri bilong NCDC yunion Wilson Thompson i tok Gavman i mas helpim ol kampani long sait bilong daunim takis long ol sampela samting we ol kampani i save baim i kam long ovasis o sampela takis we ol i peim i go long Gavman. Bai ol kampani i ken sevim mani na dispela mani i ken go long apim pe bilong ol wokmanmeri.

Mista Thompson i tok dispela K120 potnait pe em i bikpela samting long ol turangu woka long ol autstesin long rurel eria long kantri. Jenerel Seketeri bilong Amalgamated Wokas Yunion Andrew Kandakasi i tokaut olsem ol i givim Nesanel Gavman 14 de o nogat bai bikpela straik tru i kamap long olgeta hap bilong Papua Niugini egensim Gavman long stapim pe bilong ol liklik wokmanmeri insait long kantri.

Mista Kandakasi i tok dispela 160% o K60 wan wik pe em i no wanpela bikpela mani tru long baim ol samting long stua tude. K120 potnait pe bilong ol liklik wokmanmeri long ol autstesin na distrik i no wanpela bikpela mani long potnait pe bilong ol bikman na ol bos, em i tok.

Mista Kandakasi i tok dispela 160% potnait pe i go antap i bihainim Minimum



• Sir Michael Somare.

Wejes Bod bilong 1992 we mak i bin K25 long wan wik pe. Em i tok Gavman yet i no bin laik stapim nupela pe bilong ol memba na ol bikman bilong gavman pastaim. Ol i no stapim na ol i kisim tupela potnait pinis na dispela i kirapim bel kaskas long planti woklain.

Lida bilong Nesanel Alaines (NA) Sir Michael Somare i bin kamaut tu long dispela wik na toktok hat long dispela disisen bilong stapim pe bilong ol liklik wokmanmeri long noken go antap na disisen bilong Salaris na Rinumeresen Komisn (SRC) long apim pe bilong ol memba, Minista na ol bikman bilong ol Gavman opis. Oposisen lida Bill Skate tu i toktok egensim dispela disisen bilong Nesanel Gavman egensim Minimum Wejes Bod long kamapim 160% pe i go antap long ol liklik wokmanmeri na SRC disisen long apim pe bilong ol lida bilong kantri.

TORO

TORO WETIM BAS NAMBA 4 ... EM LUKIM BAS NAMBA 14 NA EM TING BAS 4 NA EM KALAP TASOL. MI GO SPIN LONG FOA MAIL...

MAOROO! GUTPELA NOGUT TRU! DRAIVA, KCIKIM TASOL!!

INO LONGTAIM NA BAS I KATIM I GO LONG RUT BILONG EM YET...

DRAIVA PUTIM BREK NA OL PASINDIA KIRAP NA TROMOI TORO IGO ACUT LONG KINDUA...

ERIMA-9 MILE

TORO BIKMAUS TRU...

OIYO! DRAIVA! STOP! RONG BAS

AAAH!

NIUGINI AILAN NIUS

Bogenvil bai askim long nupela edmin opis bilong Hutjena

HELEN REI | raitim

EDUKESAN Divisen long Bogenvil bai askim Yuropien Yunien (EU) long helpim wantaim fanding bilong sanapim nupela edministresen opis blok bilong Hutjena Sekonderi skul long en.

Dispela em long kisim ples bilong olupela we i bin paia i no longpela taim i go pinis.

Edministresen blok ya em wanpela long ol biling long skul we Yuropien Yunien i sapos long helpim apgretim long dispela yia.

Edukesan Etvaisa bilong Not Solomons Tony Tsora husat i stat bek wok i tok em bai lukim ripot pastaim long dispela samting na bungim ol lain Yuropien Yunien long toktok long dispela samting.

Provinsal Woks Manesa John Kolan i tok divisen bilong em bai kamap wantaim ol nupela mak bilong kos long nupela biling na givim i go long EU

lain long lukluk na givim tingting bilong ol long en.

Ripot bilong EU na Edukesan Dipatmen i tok biling ya i bin stap long plen bilong apgretim tasol bikos nau em i bagarap, ol i mas kamap wantaim ol nupela mak long ol kos bilong sanapim nupela.

Ripot i tok tenda bilong eitpela projek long Bogenvil we Hutjena sekonderi skul biling i bin wanpela long ol i bin pas long las mun.

Ol narapela em tripela long ol sekonderi skul long Wewak, Popondetta na Hagen, narapela long Yunitek long Lae, Kabaleo Tisa Kolis long Kokopo na tripela long ol vokesenel skul osem long Malahang long Morobe, Hoskins long Wes Nu Briten na Kuiara long Milen Be.

Ripot i tok ol i no klia yet long kos bilong nupela biling long Hutjena.

Mista Tsora i tok ol plis i kari-maut ol wok painim long dispela paia birua long biling we kos bilong em i moa long K500,000.

Em i tok ol tisa na skul wok-

lain bilong Hutjena i wok long operet long narapela skul bilding long dispela taim. Na skul i op bek pinis bihain long em i bin pas long nambawan wik bilong skul yia we wiken long en paia i bin kukim biling.

Long ol arapela edukesan nius long Bogenvil, Mista Tsora i tok provins i bin kisim 45 gre-duet tisa bilong ol arapela provins na ol i wok long mekim wok long ol wan wan skul nau.

Em i autim tok amamas bilong em i go long ol dispela tisa husat i soim osem ol i gat laik long skulim ol Bogenvil pikinini.

Em i tok tu osem provins i bin kisim namba wan kwata skul subsidi bilong em na em i peim pinis ol manimak bilong ol wan wan hai skul na ol vokesenel senta.

Mak we bai em i tilim i go long ol elementeri na praimer skul em long K180,000.

Em bin kisim dispela sekmani na em bai redim na givim i go long ol wan wan skul long tupela level ya.

Is Nu Briten Gavman bai makim deputi gavana neks mun

WALTER DARIUS | raitim


IS NU Briten gavman bai makim deputi gavana bilong em long narapela bung bilong Provinsal Asembli long neks mun, Mas.

Ol ripot i kam long provins i tok asembli long bung bilong ol las wik i feil long makim deputi gavana bihain long vot we ol i wokim i pinis long tai.

Dispela i min osem tupela man i kisim wankain namba na long dispela, tupela man ol i bin resis long dispela posisen em Ekting Gavana Ephraim Jubilee na Henry Ningo.

Oposisen grup i bin nominetim Mista Saminga. Tripela man husat i no bin putim vot bilong ol long makim deputi gavana long dispela taim em Pomio MP Francis Koimanrea, Gasel MP Sinai Brown na Rabaul MP John Kaputin.

Bihainim dispela, ligel etvaisa bilong Provinsal Gavman Matalau Nakikus i tok tupela Stending Oda we ol i sapos long bihainim long votim deputi gavana em ol i no bin yusim long en. Dispela em long Seksen 16 bilong Stending Oda. Aninit long dispela seksen, Gavana i ken putim vot



Francis Koimanrea, wanpela bilong ol husat i no bin stap long putim vot.

bilong em sapos tupela man i kisim wankain namba. Na narapela em ol i ken kisim vot long namba tu taim. Na sapos wankain samting i kamap, asembli i ken stap pastaim long wanpela awa na karimaut vot gen long namba tri taim. Na sapos dispela samting i no stret yet, ol i ken putim nem bilong ol kendidet long bokis na ritening opisa i ken kisim wanpela nem na dispela man em i win.

Bihainim pasin we dispela vot las wik i no kamap wantaim deputi gavana, Gavana Leo Dion i tok asembli bung long mun Mas bai makim deputi gavana.

WANTOK
NIUSPEPA BILONG YUMI OL PAPUA NIUGINI STRET

P. O. Box 1982, Boroko
Telepon namba: 325 2500
Feks namba: 325 2579
email: word@global.net.pg

PE BILONG WANPELA YIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00



Ol wanlain paitman yet i kilim Vane

OL RIPOT we *Wantok* i kisim i tok ol wanlain BRA paitman i bin kilim Noten Koman lida Sylvester Vane long las wik Sarere long Buka.

Bihainim dispela samting, sindaun long Buka i no bin stap gut tasol ol ripot nau i tok ol lain i stap insait long dispela samting i wok long stretim dispela hevi.

Ol plis ripot i tok wanpela BRA grup i bin sutim dai Mista Vane taim em i wok long go bek long haus bihain long wanpela dring pati long las Sarere nait.

Ailans Plis Divisenel Komanda Matthew Minok i bin tok ol birua bilong Mista Vane i bin laik kisim ol gan samting long en.

Inspekta Minok i tok ripot we ol plis i kisim i tok ol lain bilong Mista Vane i bin kilim sampela amilain namel long 1995/96.

Ol arapela ripot we *Wantok* i kisim i tok sampela alin yet bilong Mista Vane i bin kilim dai em bikos ol i les long em long wanem em i bagarapim nem bilong ol na ol wok long kamapim gutpela sindaun bikos em i wok long stap insait long ol kriminel aktiviti. Em bin stap insait long stil pasin we i bin kamap long Rabaul Siping Buka opis we ol stilim moa long K100,000 long en tupela wik i go pinis.

"Ol sampela BRA wanlain bilong Mista Vane i bin sutim dai em long wanem ol i les long nem nogut em i givim ol. Tu wok bilong painim gutpela sindaun long Bogenvil i go het na ol dispela lain i tok Mista Vane i wok long bagarapim dispela taim em na grup bilong em i go insait long ol kriminel wok," ripot i tok.

Motobot i karim ol skul sumatin na ol biklain long Kokopau i laik go long skul na wok long Buka Ailan sait.

Edministreta Makis i no amamas long guria ripot bilong saut Nu Ailan

EDMINISTRETA bilong Nu Ailan Moses Makis i tokaut osem saut Nu Ailan bai i no inap long bruk i go long tupela hap.

Mista Makis i wokim dispela toktok bihainim ol ripot we i tok Saut Nu Ailan bai i bruk i go long tupela hap.

Dispela ripot i mekim Nu Ailan Provinsal Edministresen na Jiolojikel Sevei opis long Mosbi i wari.

"Mipela i wari bikos ol ripot we i bin kamap long nius i no stret tumas. Dispela ol ripot i sut long ol guria sam-

ing we i wok long kamap long saut Nu Ailan. Mekim na planti pipel i stap wantaim pret na wari long laip bilong ol," Mista Makis i tok.

Jiofisel Sevei opis long Mosbi tu i autim wari osem sampela nius ripot long ol guria samting long dispela eria i no stret tumas.


Opis i tok wanpela ripot i tok Nu Ailan bai i bruk long tupela hap long Weitin Fol eria insait long 50 krismas i kam.

Mista Makis i tok ol ripot i tok hevi long

Weitin Veli i bin kamap klia bihain long 1994 maunten paia long Rabaul. Tasol em i tok ol wok bilong maunten paia long Rabaul i nogat koneksen wantaim dispela long Nu Ailan na i no gutpela long mekim ol pipel i pret nating.

Em i tok provinsal gavman bai askim Jiofisikel Sevei opis long PNG long go long provins long sampela taim long dispela yia na givim ol tok klia long dispela samting long ol na ol pipel i ken harim ol kliapela toktok long dispela samting.





SEPIK NIUS



Papagraun sapotim Fri Tred Jon Program

MAN i go pas long Fri Tred Jon Program na wanpela papagraun insait long Aitape, John Willie, i laik lukim Fri Tred Jon Program i go het.

Mista Willie i tok Aitape na Sandaun Provins olgeta i go bihain tru long developmen na ol gras ruts long ples i laik lukim sampela senis.

Em i tok sapos dispela em i wanpela rot long bringim developmen i kam insait long provins ol politisen i noken pilai politiks long paulim ol toktok na bagarapim tingting bilong ol pipel.

Mista Willie i tok, "Mipela ol papagraun i laik tok strong long ol Sandaun politisen olsem, noken pilai politiks long bagarapim wok bilong Fri Tred Jon Program. Mipela i laik lukim sam-

pela senis, olsem na wok bung wantaim na larim dispela developmen i kam insait."

Em i tok olgeta kain developmen i gat ol gutpela na nogut bilong en tasol wok bung i ken helpim yumi long kontrolim ol developmen.

Mista Willie i tok ol papagraun i givim bikpela sapot bilong ol i go long Minista John Tekwei long dispela Fri Tred Jon developmen ples.

Em i tok ol i hamamas long gavman long luksave olsem Sandaun provins i las tru long developmen na i bin givim tok orait long Fri Tred Jon developmen na ol i bin hamamas tru long harim lonsing bilong Fri Tred opis long Pot Mosbi.

Misa bilong ol yut i bin kamap long Aitape

MATHEW PAIYAU i raitim

SAMTING olsem 150 yut bilong Aitape long Sandaun provins i bin holim wanpela misa bilong strongim kristen pasin bilong ol. Misa i bin kamap long St Anna ha'as lotu long las Sande.

Long dispela misa ol yut i bin kamapim naispela singsing na drama na ol yangpela meri bilong ples Nuku na Lumi i bilas nogut tru na ol i singsing

na tanim tanim insait long haus lotu.

Ol yut i bin kam long wan wan sab peris bilong Aitape Sen Ignisius Katidre Peris olsem St Joachim, St Theresa, St Francis na St Anna.

Ol yut i bin bilasim gut tru Vika Jenerel bilong Aitape Daioses, Pater Chinua Okeke, husat i bin go pas long dispela misa wantaim naispela kumul antap stret long het bilong em.

Na bihain Pater Chinua i statim misa wantaim ol

yut na ol narapela manmeri husat i bin kamap long stap long dispela misa.

Namba bilong ol husat i bin stap long dispela misa em i samting olsem 300.

Pater Chinua i holim misa na kamap long namba tu hap bilong taim bilong ofa na ol yangpela meri bilong Nuku na Lumi i bin kisim ofa na ol sampela trofi na i karim na singsing wantaim i go insait long haus lotu.

Klostu long pinis bilong

misa Aitape Daioses Yut Kodineta, Gerald Towun, na Alice, wanpela yut meri i presentim wanpela stet bilong Santu Maria long Franciscan Bruda, Morris. Bruda Morris i save wok wantaim ol yut.

Dispela wok bilong helpim ol yut i save helpim ol yangpela man na meri long wok bung wantaim, daunim pasin nogut olsem spak brus, pamuk pasin, bikhet na stil pasin na ol narapela samting olsem.

Pipel i no klia gut long Fri Tred Jon

FELIX RAMRAM i raitim

OL wok rere bilong kamapim nupela tingting ol i kolim Fri Tred Jon insait long Sandaun i ron hariap tumas na dispela i kamapim kainkain tingting insait long ol lain bilong ples olsem ol papagraun na tu ol gavman wok manmeri.

Samuel Tasig wanpela mang Aitape i mekim dispela toktok long sapotim tingting bilong wanpela Sandaun politisen husat i tokaut olsem ol atoriti i pusim wok bilong Fri Tred Jon long kamap hariap. Na i mekim pipel i paul long wanem samting ol i mas mekim.

Mista Samuel Tasig i tok wanem samting i wok long kamap nau em ol lain husat i go pas long wok bilong Fri Tred Jon i go daun long nek bilong pipel wantaim planti switpela toktok. Na nogut bilong ol samting ol go pas lain ya i no tokaut klia.

Mista Tasig i tokaut tu olsem planti ripot i wok long kamap i mekim ol pipel husat bai givim tumbuna graun bilong ol i go long kamapim kaikai bilong dispela driman, i tingting planti, nogut bihain bai ol i no inap long kisim bek tumbuna graun bilong ol.

Em i tok Fri Tred Jon tingting i wanpela nupela samting i kamap insait long Saut Pasifik. Na bai moa gutpela long lukim dispela samting i kamap isi isi inap taim pipel i redi long kisim olgeta astingting. Na sem taim ol bai i lukim kaikai bilong en we bai i amamas long kamap olsem hap bilong dispela Fri Tred Jon.

Mista Tasig i tok gavman i kamapim lo long pulim planti mani yusim risos i stap long tumbuna graun bilong pipel. Tasol trupela bilong en ol tumbuna papagraun i no kisim wanpela gutpela samting long graun bilong ol.

"Olgeta risos bilong mipela gavman i kisim pinis. Watpo bai

ol i giman long kamapim ol kain developmen olsem Fri Tred Jon. Na askim ol papagraun long givim fri graun bilong ol i go gen long gavman long wokim fri mani? Na husat tru i stap baksait long dispela tingting bilong kisim na yusim tumbuna graun bilong mipela long gutpela bilong wanpela lain na ol gridi pren bilong ol?" Mista Tasig i askim.

Em i go het na i tokaut olsem ol papagraun i mas was gut long noken pundaun long hol bikos wanpela bikpela masalai nogut em PNG i save pinis long en i stap bikos sampela yia i go pinis masalai nogut ya i kamapim tingting long olgeta pipel i long-long na rejistarim tumbuna graun bilong ol wantaim gavman.

Em i tok, taim dispela tingting i no wok, em i painim ol narapela rot long yusim long kisim risos bilong pipel. "Na wanpela long ol em Fri Tred Jon, bikos i gat ripot we i tok ol papagraun bai kisim tasol 20 pesen sia insait long Fri Tred Jon.

Long taim ol i givim fri graun bilong ol i go long Fri Tred Jon i yusim long wokim bisnis. Taim 80 pesen sia bai ol bisnis lain wantaim gavman i skelim."

Mista Tasig i go het moa na i tok ol ripot bilong Februari 19 long Redio Sandaun i toktok long Fri Tred Jon bai i sans bilong givim planti wok i go long planti tausen manmeri bilong Sandaun. Em i tok, dispela tok i swit tru long ia bilong ol man. Trupela bilong gen em Sandaun i no redi yet long ol save manmeri, na planti long ol wok bai ol ovasis bisnis lain i kisim ol save manmeri bilong ol yet.



• Sepik em wanpela ples bilong pulim ol turis bikos planti samting bilong woa, ol kaving na arapela moa i stap long hap.

Ol papagraun i go long Fri Tred Jon miting

LEVENPELA mausman i makim ol papagraun bilong Raihu (Tarau Poin) na Pro Vokau viles i bin lusim Aitape na i go long Vanimo long stap insait long wanpela miting bilong Fri Tred long Februari 18. Ol i bin lusim Aitape long Februari 17.

Ol bai i bung wantaim John Tekwei na ol investa we ol bai i givim tingting bilong ol, kisim

sampela toktok bilong Fri Tred na tingting bilong ol investa.

Opis bilong Fri Tred Program long Aitape i bin rereim rot bilong ol i go long Vanimo long kisim moa klia long wok bilong Fri Tred.

Opis bilong Fri Tred Program long Aitape i bin askim ol long stap insait long dispela miting bihain long kari-maut bilong awenes long dispela tupela ples.

Ol yut i no laikim pasin sanguma o blak pawa

OL yut bilong Munai long Ulau viles long is kos Aitape i no hamamas long ol man insait long ples bilong ol i mekim pasin sanguma o blak pepa.

Long tupela wik i go pinis long Februari ol yut i bin traim long kisim lo i go long han bilong ol yet long bagarapim wanpela man.

Ol yut i bin bel hat tru long dai bilong wanpela yangpela meri long ples bilong ol we ol pipel long ples i bin bilip olsem dispela man i bin kilim em i dai long

pasin sanguma. Krismas bilong dispela meri i samting olsem 12-pela yia.

Ol lo man na ol lida bilong ples i bin holim wanpela bung we ol i bin askim tu dispela man long stap long kwestenim em long dai bilong dispela meri.

Tasol ol yut na planti manmeri i stap long dispela bung i no bin hamamas long planti bekim bilong dispela man we i kirapim bel hat bilong ol yut na ol i bin traim long kilim dai dispela man. Ol lo man, ol lida na

sampela ol pipel i bin sevim dispela man.

Ol yut i givim strongpela toktok i go long komyuniti bilong ol olsem ol i no laikim dispela kain pasin nogut bilong bagarapim ol manmeri.

Ol i tok ol bai kisim lo i go long han bilong ol sapos tok i kamap gen long wanem man o meri i mekim yet pasin sanguma o blak pawa.

Ol lo man na ol lida bai i holim gen narapela bung long pinisim gut painim aut long dai bilong dispela meri.

Fri Tred Jon Awenes i kamap

FRI Tred Jon opis long Aitape i bin statim awenes bilong en long dispela mun long tupela viles, Raihu (Tarau Poin) na Pro Vokau.

Ol lain i go pas long Fri Tred Jon Program na ol gavman opisa long Aitape i bin karimaut dispela awenes long 10 na 12 Februari.

Opis bilong Minista bilong Tred na Industri, John Tekwei, i laik save sapos eria stat long Raihu bris i go inap long Tadij ples balus inap i stap insait long Fri Tred Jon Program.

Man i go pas long Fri Tred Jon Program long Aitape, John Willie, i tok ol papagraun bilong ol dis-

pela eria i hamamas tru long dispela nupela developmen.

Tasol em i tok ol papagraun i laikim John Tekwei na ol teknikel opisa bilong em long kamap long Aitape long klaiam ol moa long dispela program.

Mista Willie i tok ol papagraun nau bai i go het long rereim ol yet long

stap sambai long Fri Tred Program na opis bilong Fri Tred Jon Program bai i karimaut moa awenes long ol ples.


Em i tok ol bai i kari-maut ol dispela awenes wantaim sapot bilong ol gavman opisa long luksave olsem ol pipel i kisim gut klia long wok bilong Fri Tred.



SAUTEN



RIJON



Amamas lóng go long skul! • Ol skul manki bilong Ulutya Komyuniti skul long Gudinap Ailan, Milen Be provins.

Milen Be kisim nupela spitbot bilong plis wok

MILEN Be provins bai kisim wanpela spitbot long mun Epril bilong karimaut ol wok seveilens na lo na oda patrol long ol ailan.

Deputi Plis Komisina husat i lukautim Edministresen Joseph Kupo i tokaut long dispela samting taim em i bin go long Alotau long las Fonde na toktok wantaim Gavana Titus Philemon.

Bikpela bilong spitbot ya em 29 fit na enjin bilong em i gat strong bilong 200 hospawa long en. Em i ken karim 25 plisman long wan wan taim.

Ol bai putim long en ol plis sairen, ol blu na ret-pela lait, ol nupela komyunikesen sistem na ol laip seving samting.

AusAID i givim mani long baim dispela bot we ol i bildim long Madang.

Manus na Bogenvil bai i kisim wankain bot olsem na AusAID yet i baim bilong ol.

Mista Kupo i bin tokaut tu olsem Milen Be plis bai i kisim tupela moa ka long helpim karimaut ol wok bilong ol.

"Olsem wanpela maritaim provins, Milen Be i ken bungim ol birua long

solwara na dispela bot bai helpim wantaim ol reskyu wok na tu jenerel lo na oda patrol long ol ailan.

"Long makim Komisina, mi laik tok tenkyu long yu na Milen Be Edministresen long helpim we gavman bilong yu i givim na mipela i gat bilip olsem dispela helpim bai go het," Mista Kupo i bin tok.

Mista Philemon i bin tokim Mist Kupo olsem gavamn bilong em bai skruim sapot i go long plis bikos ol i mekim bikpela na gutpela wok long lukautim lo na oda long provins.

Em bin tok provins i save gat planti ol iligel ausait sip i painim pis long solwara bilong em na dispela spitbot bai helpim ol gut long karimaut wok bilong lukautim solwara bilong ol.

Em bin tok tu olsem maski Milen Be i wanpela provins we i nogat planti trabel long lo na oda i save kamap skelim wantaim sampela arapela provins long kantri, wantaim gutpela operesenel na lojistik sapot stap na sindaun long ol ples na ol komyuniti i go gutpela moa yet.

NCDC Plening Bod tok oraitim Napa Napa projek

NESENEL Kapitel Distrik Plening Bod i tok orait long kirapim Intaol NapaNapa Oil Rifaineri insait long Sentrel provins.

Bod i bin bung na holim namba wan miting bilong em long las wik.

Oil Rifaineri ya bai kamapim petrol, piul bilong yusim long balus, karsosin, disel, piul bilong ol sip long yusim na indastriel piul na oil.

Rifaineri bai i kamapim krud oil long ol tenka bikos i

nogat netwok paip we i pulim krud oil i kam long Kutubu o Gobe.

Ol bai tiim ol dispela piul na oil long sip na len trenspot i go long ol arapela hap bilong kantri long en.

Ol wok kamap long dispela projek bai i gat long en rifaineri yet, teng fam, ol woksop, bris na ol opis, ol edminitretiv bilding, paia stesen na ples bilong ol ka na ol rot tenka bai lod long en. Rifaineri bai kisim fres o gutpela

wara bihainim wanpela masin we ol bai putim long bamim wara long en.

Rifaineri bai i gat ilektrik pawa jenere-ta bilong em yet. I gat pinis rot i go long ples we rifaineri i kamap long en tasol ol bai appretim taim projek i go het moa.

Long 1998, Minista bilong Envaironmen na Konsevesen i bin tok oraitim Envaironmen Plen o plen bilong rausim ol pipia long en.

NCD skul Bod i bung long stretim projek fi

HELEN REI i raitim

NESENEL Kapitel Distrik Edukesen i bin holim wanpela bung wantaim ol het tisa long stretim ol toktok i no klia we planti i gat long ol projek fi.

Asisten Seketeri bilong ol skul long NCD, Pompiran Kuyei i tok planti skul long siti i wok long paul yet long ol projek fi na olsem ol i bin singautim dispela bung long kliarim ol toktok long dispela samting.

Em bin tok Distrik Edukesen Bot (DEB) i bin mekim klia olsem ol skul i noken sasim ol projek fi inap DEB i givim tok orait long ol. Dispela em bihain ol wan wan skul i kisim ol projek plen i go long DEB na ol i toktok wantaim ol na skelim na glasim dispela wantaim ol.

Mista Kuyei i tok em i no amamas bikos em bin salim wanpela

leta i go long olgeta NCD skul long Novemba 4 las yia we i bin tok klia long dispela samting.

Em i tok em i kisim planti ripot pinis long ol papamama i we ol skul i salim ol pikinini bilong ol i go long haus bikos ol i no peim ol skul fi.

Em i tok wanpela long ol skul em Boreboa long Waigani we ol tok i no klia i stap namel long ol tisa na ol papamama na ol i paul long projek fi peimen.

Mista Kuyei i bin tok dispela miting we ol bin holim long las wik i bilong toksave long ol tisa long rot bilong bihainim taim ol plenim ol projek bilong ol wan wan skul bilong ol.

Em i bin tok olgeta ol projek we ol i aplai long ol i mas givim gutpela risen long DEB Bot long ol i laik sanapim, redim olgeta kos, pe bilong ol woklain, ol metiriel na ol samting olsem. na Bot i ken tok oraitim.

<i>Dispela Wik</i>		<i>Spesols!</i>	
Beef Sausages per kg	K6.95	Roots Rice 1kg	K1.39
Saveloys per kg	K6.65	Power Rice 10kg	K14.74
Arnotts Scotch Finger 250gr	K2.90	Dazzle Bleach 500ml	K1.10
Aust. Bush Biscuits 100gr	K0.50t	Klina Cut Soap 105gr	K0.45t
Anchor Milk Powder 100gr	K1.34	Globe Curry Chicken 300gr	K2.30
Max Soap 80gr	K0.59t	Suncrush Cordial 2litres	K4.54

Supa Spesol Prais!

EXTENDED TRADING HOURS
 Monday to Wednesday 8:00am to 7:30pm
 Thursday / Friday 8:00am to 8:00pm
 Saturday / Sunday 8:00am to 8:00pm

Planti moa kaikai prais i go daun long en!
 Ph: 325 7566, 325 7310 Fax: 325 7096



HAILANS NUIS



CIC winim kot egensim Panga

NESENEL Kot long las wik i bin mekim wanpela bikpela disisen bilong em bihain long tenpela yla long kot pait namel long Kopl Industri Koporesen Limitet (CIC) na Panga Kopl Fektorl Limitet (Panga).

Disisen bilong kot i bihainim ICO stok ritensen lon mani long mak bilong K10,988, 265 wantaim 24 pesen intres long Jun 1991 we mak bilong mani i go antap long K77,947,319.07.

Did bilong Oges 1995 we i gat bilip olsem Panga i bin gat long 1995 yet long kensellim intres em kot i tok nogat. Total namba bilong jasmen long go insait em K88,855,407.87. Kost

bilong kros kleim em bai ol i toktok long em long bihain taim.

Kost bilong ol kleim we Panga i bin mekim bilong spesifik pefomens bilong wanpela did bilong seteimen bilong K25 millen i wetim yet tekseen. Bli bilong dispela kos i kamap olsem K3.4 millen.

Dispela kros namel long tupela pati ya i bin stat long 1998 taim Panga i no bin peim bek K14 millen we em i bin kisim aninit long stok ritensen lon agimen long Kopl Industri Bod.

CIC i tok tenkyu long olgeta lain husat i bin helpim na sapotim CIC long dispela longpela pait bilong em.

WESTEN Hailans Gavana Pater Robert Lak i tok sapos sampela lain i gat tingting long traim bagarapim Gavman bilong em, ol i mas wet na salensim em long 2002 jenerel ileksen.

Pater Lak i tok em i bin kisim pawa long ol pipel bilong Westen Hailans long lukautim provins na em bai stap na wok yet olsem Gavana inap long 2002. Em i tok em i no bilip long ol giaman politiks bikos giaman politiks tasol i save kamapim hevi long sindaun bilong ol pipel.

Pater Robert Lak i mekim dispela toktok bihain long Nesenel Gavman i salim 9-pela gavman opisa i go long Hagen long las wik long mekim wok painimaut i go insait long wok na edministresen bilong Westen Hailans Provinsal Gavman.

Tasol Pater Lak i tok em i no bin kisim wanpela toksave o pas i kam long Minista bilong Provinsal na Lokol Gavman Afeas Iaro Lasaro long wokabaut na wok bilong dispela 9-pela opisa.

Em i tok em i bin bungim ol dispela opisa na sindaun toktok wantaim ol na em i luksave olsem dispela

disisen bilong salim ol opisa i go sekim buk na rekot bilong Gavman bilong em i no wanpela disisen i kam aut long kabinet.

Olsem na em i no inap oraitim ol lain ya long go insait long opis bilong Provinsal Gavman (Kapal Haus).

Pater Lak i tok em i kisim wanpela kot oda long stapim ol 9-pela opisa ya long noken mekim wanpela wok sekim insait long Gavman bilong em. Maski Kot i mekim disisen na abrusim dispela tingting bilong em, em i no inap opim dua long ol dispela opisa.

Pater Lak i tok i bin gat wok painimaut i go insait long ol buk na rekot bilong Westen Hailans Provinsal Gavman 5-pela wik i go pinis. Dispela em ol lain bilong Odita Jenerel i mekim dispela wok sekim. Olsem na em i no laikim narapela lain gen i kam sekim wok bilong ol inap wok painimaut bilong ol Odita Jenerel i pinis na sapos ol i ken soim olsem sampela samting i rong o abrus long wok edministresen na mani bilong provins, orait ol bai traim long givim ol ansa long ol dispela asua.

Em i tok wok bilong ol Odita Jenerel i no pinis yet na nau ol nupela lain i kam long mekim wankain wok gen long Gavman bilong em we em i no inap oraitim.

Pater Lak i singaut long ol ovasis helpim long i noken stapim wok helpim bilong ol na ol i mas go het yet wantaim program bilong ol long helpim provins bilong em inap Odita Jenerel i painim samting tru na soim. Ol wok painimaut bilong ol Gavman opisa ya i no ken stapim o pretim wok bilong mipela na mipela i mas go het yet wantaim ol program bilong mipela, em i tok.

Em i askim ol pablik sevans long provins tu long i no ken pret o guria nabaut tasol ol i mas go het yet na mekim wok bilong ol long sevim ol pipel na provins.

Westen Hailans provins em namba tri provins long Nesenel Gavman i salim ol opisa long sekim ol buk na rekot bilong ol. Ol i sekim pinis Enga na Sauten Hailans provins na rausim pawa long Provinsal Gavman bilong ol pinis. Isten Hailans provins tu i gat wok sekim i go insait long ol buk na rekot bilong em nau.

RDB bai helpim ol liklik fama long Westen Hailens

ROBERT PALME i raitim

WESTEN Hailens Provinsal Gavman wantaim Rurel Developmen Beng i sainim wanpela K700,000 dil aninit long kredit skim.

WHP gavman i givim mani ya long Beng aninit long Westen Hailens Haushol Kopi na Vejetebel Famas Kredit skim we Beng bai menesim na givim mani olsem lon i go long ol smol holda kopi na vejetebel fama.

WH Gavana, Pater Robert Lak i bin givim sek na tok K500,000 bai go long kopi na K200,000 bai go long vejetebel faming.

Bai gat wanpela skringing komiti we bai gat ol lain long RDB, provinsal atoriti, Smol Bisnis Developmen Koporesen, ol fres prodius kampani na ol lokol lida na intres grup. Wok bilong ol em long skrinim o lukluk long ol aplikesen we ol lokol lida bai luksave na sapotim pastaim.

Ol pablik seven na ol komyuniti lida long distrik level bai luksave long ol smol holda kopi groa na vejetebel fama husat i aplai na bai givim aplikesen bilong ol i go long provinsal skringing komiti husat bai mekim fainel disisen.

Bihain bai Beng i tek ova na mekim wok bilong em.

Beng bai givim lon wan-



• **Deputi Menesing Dairekta bilong RDB, Ted Kogua i sainim MOU wantaim Gavana Lak (han kais). Long han sut em Maunt Hagen brens menesa bilong RDB, Peter Farapo. Foto: ROBERT PALME**

pela taim tasol na taim fama i bekim lon, em i ken kisim Jon gen long RDB aninit long ol tems na kondisen bilong beng.

Long taim bilong sainim Memorandum ov Andastanding long Fonde i go pinis, Gavana Lak i bin tok i no gutpela long toktok long ol bikpela infrastraksa samting taim ol liklik manmeri i nogat rot long kisim

mani.

Em i tok wanem yus bilong bildim ol rot na bris taim ol pipel long vilis bai no inap yusim bikos nogat mani insait long komyuniti. Dispela kredit skim bai givim mani long ol manmeri long statim ol bisnis bilong ol.

Deputi Edministreta, Michael Wandil i tokim ol lain i kisim lon long bekim hariap na bai ol narapela Westen

Hailens i ken benefit long en.

Deputi Menesing Dairekta bilong RDB, Ted Kogua i tokim ol lain husat i bin bung long Kapal Haus olsem mani i lusim han na kontrol bilong Provinsal Gavman na nau em bilong beng na bai geng i givim lon long ol pipel bilong Westen Hailens tasol.

Em i tok ol opisa bilong em bai mekim dispela skim i

kamap gut sapos ol komyuniti lida na pablik sevis i wok bung wantaim ol opisa bilong beng.

Westen Hailens i kamap namba tu provins long kisim mani bilong kredit skim we RDB i bin statim.

Oro i bin nambawan provins long kisim wankain namba bilong mani na givim aut long 1998 na skim i bin wok gut tru.

Enga provins bai kisim nupela plis bos

ENGA provins bai i gat nupela Provinsal Plis Komanda. Nupela bos bilong plis long Enga provins em bai John Anawe na em i bin wok wantaim plis fos longpela taim long Sauten Hailans, Saut Flairovins na i no longtaim em i bin wok long plis het kota long Mosbi.

Mista Anawe bai kisim ples bilong Sief Supritenden Jerry Frank. Supritenden Frank bai i go wok olsem komanda bilong trening long Bomana Plis Koles long Mosbi.

Hailans Divisenel Komanda Tony Wagambie i askim olgeta pipel bilong Enga provins long wok klostu na sapot gut wantaim nupela Provinsal Plis Komanda bilong provins. Mista Wagambie i mekim dispela toktok taim em i mekim welkam long Mista Anawe long las wik.

Bai Mista Wagambie i go stap long Enga provins inap tupela wik long askim ol lain husat i bin stap insait long ol trabel na raskol pasin long givim ol sotgan na ol samting bilong birua we ol i save yusim i kam long han bilong lo. Em bai raun long ol hap olsem Laiagam, Kandep, Wapenamanda na Porgera.

Madang News



Kot bai kisim ol haus na ka bilong Madang Eben LLG

PIUS IKUMA i raitim

OL kot opisa long Madang i kisim tok orait long kisim nainpela haus na ol ka bilong Madang Eben Lokol Level Gavman bihain long Madang LLG i no peim kompensesen long wanpela olupela opisa bilong em.

Jastis Don Sawong i bin mekim disisen long Desemba bilong las yia olsem Madang Eben LLG i mas peim K192,496 long Moses Luluaki husat em ol

bin rausim em olsem deputi taun klek.

Madang Nesenel Kot Serif i bin kisim oda long kot long kisim na salim sikspela tri bedrum haus, tripela narapela ol haus na olsem sikspela ka bihain long taun menesa, Anton Yagama i no laik long peim kompensesen.

Mista Yagama i bin les long mekim toktok long dispela samting tasol ol dokumen bilong kot i soim olsem Mista Yagama i bin tokim ol kot opisa olsem em i no bin lukim kot oda na loya bilong

LLG i no toktok long em.

Jastis Sawong i bin mekim disisen long Desemba olsem LLG i bin brukim wanpela tri yia kontrak taim em i rausim Mista Luluaki long Novemba 2, 1998.

Em i tok wanpela wok painimaut we provinsel edministresen i bin kari-maut i bin kliam nem bilong Mista Luluaki long ol giaman toktok olsem em i no bin mekim gut ol wok bilong em na dispela as tasol na Madang LLG i bin rausim em long wok.

Turis sip bringim US na Yurop i kam long Madang

KENNETH AVIRA i raitim

SAMTING olsem 750 turis i bin spendim wanpela de tasol long Madang long Sande i go pinis taim turis sip bilong ol i go sua long bikpela sip bris long Madang.

Thomas Christian Perdesen, wanpela Noweijien sefti opisa long dispela sip "Si Bon San" i tok ol turis ya i kam long olgeta hap bilong wol.

Em i tok planti bilong ol lain ya em ol lapun manmeri na ol i kam long ol kantri olsem Yunaitet Stets bilong

Amerika na Yurop na ol i kam long wanpela global tua.

Ol turis i mekim kainkaim ol samting long dispela wan de spin bilong ol.

Ol turis i go raun long taun, ol i go long Bilbil vilis, epot, Memoriel Laithaus long Kalibobo na ol i go swim long Jes Aben Risot.

Ol lain husat save mekim ol diwai kavin tu i bin go salim ol wok bilong ol long ol turis klostu long sip bris.

Ron bilong sip i bin stat long Sen Frensisko, USA, na go olsem long ol Pasifik ailan na Kens long Austrelia tu bipo long ol i kam long PNG.

Mista Perdesen i tok sip ya

bai go long ol narapela kantri bihain long em i lusim PNG. Ol kantri ya em Pilipins, Hong Kong, Tailen, India na ol kantri long Yurop na bihain tru go bek long USA we em i bin statim raun bilong em.

Em i tok i gat moa long 40C kru memba bilong 25 narapela narapela kantri na kastom i wok antap long sip. Sampela kampani long Miami long USA i papa long dispela sip.

Kampani ya i gat eitpela krus sip na wanpela nupela em ol i wok long bildim yet long Frans. Sip bai traipela stret na wanpela ekspensiv wan stret.



• Sampela ol olupela na nupela kaunsel president bilong Madang Lokol Levon Gavman i bin bung long Madang wantaim ol opisa bilong viles sevis dipatmen long toktok long dispela K12 wanwan het we ol pipel bai peim. Ol i bin tingting planti long ol mani ol i save rausim we ol i tok dispela taim ol i rausim bai oi i gat K9 tasol long wanwan het.



• Sampela ol sumatin i sindaun insait long wanpela haus long Furan viles we ol i bin silip long en taim ol i go raun long Madang.

BP salim sikspela lain bagarap long kerosin i go long Austrelia

MATROM JOHN na PETER MAIME i raitim

SIKSPELA lain husat i kisim bagarap taim kerosin i bin pairap na kukim ol i bin flait aut long Madang long Tunde long wanpela medivek flait i go long Brisben long Austrelia.

Long dispela ol paia lain i gat tripela liklik pikinini na tripela ol bikmanmeri na ol dispela lain i bin stap aninit long was bilong wanpela spesel inflait medikel tim.

Dispela spesel sata flait i kam taim namba bilong daiman i go antap long tri. Wanpela meri i dai long Modilon Hospitel long Mande

na tupela pikinini i bin dai pastaim long ol bagarap ol i bin kisim.

Ol opisa long Hospitel i tok 32 pipel i kisim marasin long hausik na 21 narapela i silip long hausik. Narapela peisen i wok long kisim marasin long Gaubin Hausik long Karkar Ailan.

Dokta Philip Kame i tok ol sikspela lain husat i bin go long Austrelia i bin kisim bikpela bagarap stret long skin bilong ol na ol i nidim speselis trimen long Austrelia.

Ol opisel bilong Air Niugini long Madang i tok BP i bin sata long flait i go long Brisben. Ol lain husat i bin kisim bagarap long kerosin em

ol lain husat i baim kerosin long BP long Madang.

Ol lain husat i bin go long Austrelia em Anton Tamboli bilong Malmal vilis, Lawrence Joseph bilong Biliau, Rueben Martin husat i gat tripela krismas na em i bilong ples Bugati, Angela Tarsicius bilong Dabu, Wabynas Bart na Lea Roca, tupela wantaim bilong Trengogol.

Ol lain bilong tripela ol pikinini ya i bin go wantaim ol long Austrelia. Mama bilong Rueben tu i bin go wantaim.

Ol dokta na nes long Modilon Hospitel i bin go long epot long helpim ol paia lain i go antap long balus.

Beon skul kisim dabol skul des

MELENISEN Faundesen long Madang i givim 20 dabol skul des long Beon Komyuniti Skul.

Slaman bilong skul, Anton Johannes wantaim tresera, Patrick Semera i kisim ol des long Slaman bilong faundesen, Sir Peter Barter.

Sir Peter i tok moa long 20 skul bai kisim ol des long Melenisen Faundesen. Faundesen i gat moa long 1000 des long oda na i luk olsem ol bai kisim dispela yia olgeta long pinisim ol

oda bilong des.

Mista Johaneš i mekim bikpela tok tenkyu long Sir Peter long givim asistens long skul.

Ol des bai kamapim moa spes bilong Beon Komyuniti Skul we i stap klostu long Beon Korektiv Institusen long Madang.

Melenisen Faundesen i saplaim ol des fri we mani bilong baim ol des i save kam long ol praivet donesen na Melenisen Turis Sevis long Madang.

trukai. RICE




SAPOS NAMBA BILONG YU ISTAP LONG HIA. YU WINEM K200

A01292338 B00999271 F00925702 C01002769
E01245723 D00124704 A01574895
D00415718 C00413392 B01235924

LONG KISIM PRAIS BILONG YU. GO LONG TRUKAI DISTRIBUTION CENTRE.



Lae Nius



Raskol sutim dai waitman long Lae

ELLEN VAVITAN TIAMU i raitim

PLIS long Lae i wok long painim tupela raskol man husat i bin brukim haus bilong wanpela waitman na i go insait na kilim em long bik morning long Sande.

Waitman hia husat i bin stap longpela taim liklik long Lae na i wok wantaim Moore Printing long Lae i bin kirap long taim em i haim nois insait long haus bilong em na bihain long em i putim on sekuriti alam tupela man hia i bin sutim em long sotgan long bros bilong em.

Wanpela sekuriti kampani we i save lukautim haus bilong em i bin kamap sampela minit bihain na i painim em i slip i stap na ol i kisim em i gi long haus sik tasol dispela man bilong Australia i bin lusim laip bilong em. Nem bilong waitman ya em Rob Morris bilong Melbon Australia.

Tupela raskol man husat i bin sutim em i ronawe na plis i wok long painim ol yet.

Kabwum pipel kisim Literesi Senta



• Mista Saonu wantaim ol opisel ges kamap long Keweng Namba 2 ples, Popno Gen Literesi Senta las wik.

OL manmeri long Yopno insait long boda bilong Madang na Morobe provins nau i gat nupela Literesi Senta. Dispela Literesi Senta i stap long Keweng namba tu ples. I gat wanpela dabol klasrum i kamap pinis wea YUS Lokol Level Gavman i fandim na wanpela wokman bilong SIL Wes Reed i go pas long kamapim dispela senta.

Long dispela Literesi Senta bai ol trenim ol tisa long wan wan ples insait long Yopno eria long save na bihain ol i go bek na skulim ol pikinini long wan wan ples long save long rit na rait long tok ples Yopno stret na bihain ol i ken i go long sistem bilong edukesen yumi gat.

Long Sarere Februari 10, 2001 Ginson Saonu Membra bilong Kabwum

em opim dispela senta. Mista Saonu tokim ol manmeri olsem. "Tok ples em pes, han, lek na bodi bilong yumi wan wan. Yumi kisim save long rit na rait long dispela tokples bilong yumi pastaim yumi ken sikurim save i go moa wantaim arapela tok ples em bai rot bilong kisim gutpela save bai kamap.

Mista Saonu tok amamas tu long ol SIL long Papua Niugini mekim gutpela wok long tanim tok baibel na ol arapela progrem long tokples na planti ol save long rit na rait long tok ples bilong ol yet.

Ol lida na pipel i tok amamas long memba Saonu long sapatim rifom na long dispela rot YUS LLGC i fandim dispela projek na ol soim sapat bilong ol gen long narapela ilek-sen i kam.

Lukaut long ol plis i kisim fain nating

BOS bilong plis long Lae, Awan Seter, i tok strong long ol manmeri husat i gat ka long Lae olsem ol i mas lukaut long ol plisman husat i save kisim spot fain long sek poin long Nain Mail.

Mista Sete i mekim dispela

toktok bihain long planti lain i komplem olsem ol plis long dispela rot blok i save askim long spot fain tasol ol i no save gat pepa we i soim wanem rong ol dispela draiva bilong ka i save mekim na tu i nogat gutpela risit we ol i ken

bilip long en.

Sief Suprintenden Awan Sete i tok olsem olgeta rong bilong ka em ol draiva i mas baim long plis trefik opis long Lae na i no long ol lain long dispela sek poin long Nain Mail.

Sampela lain i komplem olsem plis long dispela wik tasol i bin sasim ol long baim K50 taim rejistersen bilong sefti stika bilong ol i bin pinis.

Sete i tok em bai lukluk moa long dispela hevi.

SEVIM TAIM NA MANI.



Long sevim taim na mani, yusim EFTPOS olgeta taim yu go long stua long baim samting. Hia em sampela rot long kisim helpim long EFTPOS:

- Taim yu go long stua, tokim stuakipa olsem yu bai yusim SaveCard.
- Ol bai kisim kat na swaipim long masin (EFTPOS) long mak bilong mani yu laik yusim long baim kaikai.
- Ol bai askim yu sapos yu laikim sampela mani o nogat. Sapos yu laikim, ol bai paitim mak bilong mani yu laik kisim.
- Stuaakipa bai givim EFTPOS kipad na yu paitim PIN bilong yu.
- Masin bai wok (treksesen) taim yu paitim PIN bilong yu. Yu presim OK, kisim risit bilong yu, ol kaikai samting, na mani bilong yu bipo yu lusim stoa.

Em i isi tru na gutpela rot moa long yu go sanap long benk. Olsem na mipela save kolim SAVE BANKING.



PAPUA NEW GUINEA
BANKING
CORPORATION

Holi Spirit Sister Henrilina i selebretim Golden Jubili

SISTA Henrilina Vdlaar, wanpela sista bilong Kongrikese bilong Holi Spirit Sista i bin selebretim Golden Jubili bilong em long rilijes lapi long dispela mun.

Selebresen i bin stat long Janueri 15 long Alexishafen Madang long pestode bilong man husat i bin kirapim kongrikese, Bleset Arnold Janssen.

Golden Jubili selebresen tu i bin kamap long Febueri 2 long Par insait long Enga provins long ples we Sista nau i stap long en.

Henrilina Vdlaar (SSpS) i bin bon longwanpela puo famili long Mas 20, 1928 long Nielstrolde long kantri Holan. Em i namba wan pikinini long famili na em i gat wanpela brata na susa tasol.

Ol Sista bilong lain Fransesken Misineri i bin skulim em long praimeri skul na Sista Henrilina i tok ol bin givim em ol naispela stori long wok misin. Na ol dis-



•Sista Henrilina.a.

pela stori i bin mekim em bel kirap long joinin wanpela misinari sista kongrikese bai em tu i ken mekim wok misin.

Sista i lukim ol misineri sista kongrikese bilong Holi Spirit Sista i smat moa long wanem em i intenesenel na em bai inap long go aut long mekim wok misin.

Sista i bin joinim ol Holi Spirit Sista long Oktoba 18, 1948 long taim em i gat 20 krismas long en.

Em i tok olsem em i no go long bikpela skul tasol em i bin skul inap long Gret 6.

Bihain long tupela yia, long 1950 inap long 1951, Hnerilina i bin mekim namba wan promis olsem Sista.

Long 1952 em i kisim save na treni g long vokesenel na domestik wok. Bihain tasol long dispela yia em i go wok long haus kuk bilong Uden Ritrit Haus long ples bilong em.

Long yia 1965, Sista i bin kisim nupela apoinmen na

go wok long Brisben, Australia long wanpela yia. Long namba 8 de bilong mun Epril 1966 em i bin trense i kam long PNG.

Taim em i kam tasol long PNG, ol bin salim em i go long Timbukte long Sepik Wara bilong wokim orientesen kos bilong kisim save long stap na laipstail bilong PNG na pipel. Em i stap long hap long faipela mun.

Bihain long kos Sista i go stap na wok long Mingende long Simbu. Dispela em long faipela yia.

wok bilong em long Madang em i kam long Par, Enga provins na wok long hap long 14-pela yia.

Sista Henrilina i bin lusim 35 krismas olgeta long mekim wok misin insait long PNG.

Sista i bin givim olgeta taim bilong em long haus kuk. Em i wok long ol ritrit haus, long peris, long konven bilong ol sista na pastorel senta.

Planti pris, bruder na sista i kisim kaikai long han bilong en.

bodi na spirit.

Long dispela gutpela wok bilong en, em i soim stret bikpela laik bilong en long wok misin.

Long planti hap sista i wok long en, em i bin givim domestik trening i go long planti ol yangpela meri we planti nau i mama pinis tude. Sista Henrilina i wanpela bikpela blesing long ol mama i kiism save long lukautim gut ol famili8 bilong ol.

Sista i gat 73 krismas na em i ritai nau. Em bai kisim malolo bilong em long Holi Spirit konven long Rabiamaul, Maun Hagen.

Em i tok laip bilong em i pulap long planti blesing long en.

"Mi oltaim i bin amamas long wok long haus kuk olgeta taim long laip bilong mi. Wantaim bikpela smali na amamas long bel bilong mi, mi kisim planti gutpela samting," Sista Henrilina i tok.

Long planti hap sista i wok long en, em i bin givim domestik trening i go long planti ol yangpela meri we planti nau i mama pinis tude.

Bihain gen em i trense i go long Madang na wok 15-pepa yia long Malala na wanpela yia long Madang taun. Long taim em i pinisim

Long olgeta kaikai em i redim, em i wokim wantaim amamas dedikese na laik.

Ol lain i kisim ol kaikai we em i redim i bin pulap long

Aitape Daiosis woklain i kisim luksave long Pop John Paul 2

TENPELA pipel husat i bin wok wantaim

Aitape Daiosis Rihabiltesen Komiti i kisim setifiket bilong luksave long hetman bilong Katolik Sios long wol, Pop John Paul 2.

Ol i kisim luksave long wok ol bin mekim long ol eria we sunami i bin bagarapim ol long wes kos Aitape.

Bisop bilong Aitape Austin Crapp i bin prisemil ol setifiket i go long Gertrude Kokombai (Barapu), Joseph Amanos (Sissano), Julian Manchalo (Ulau) na Steve Gari (Ali Ailan).

Ol dispela husat i no bin stap long prisentesen em long Garri Mantese, Tas Maketu (Sissano), John Donnelley na Murray Perry na Bisop Austin Crapp i bin kisim setifiket bilong en long Pater Timothy Elliott.

Pop i bin tenkim na givim luksave long ol lain manmeri long helpim ol pipel husat i bin kisim bagarap bihain long sunami taim ol bin wok wan-

taim Rihabiltesen Komiti.

Gertrude Kokomba husat i bin lusim pikinini meri bilong em long sunami i tok em i bin wok olsem wanpela kuskus long Rihabiltesen opis na wokim ol kain wok olsem ansaim ol telipon, redim ol niusleta na ol ripot na mekim arapela klerikel wok.

"Em bin wanpela bisi taim tru na mi no bin ting olsem bai mi kisim wanpela samting olsem. Tasol mi amamas long kisim dispela setifiket bilong luksave," Ms Kokomba i tok.

Julian Manchalo i wok long akauns seksen bilong Rihabiltesen opis.

Em i tok em tu i no bin ting olsem em bai kisim kain samting olsem tasol ol i mekim wok tasol.

Samting olsem 100 pipel we i bin gat long en ol kleji na ol bos bilong ol dipatmen bilong Aitape Daiosis i bin witnessim dispela prisentesen.

Pren bilong Oksileri Bisop i stori long laip bilong tupela

POT Mosbi Asdaiosis long Febueri 10 i bin selebretim bikpela Misa lotu bilong Pater Cherubim Dambui i kamap olsem Oksileri Bisop bilong asdaiosis.

Planti pipel tru i bin witnessim dispela selebresen.

Wanpela long ol em gutpela poroman na wantok bilong bisop em Barnabas Rongap husat i wanpela bikman long gavman. Em i wanpela diplomat na em i makim PNG long Beijing, Saina.

Taim Mista Rongap i tok amamas long gutpela poro bilong em Bisop Cherubim i kisim blesing long dispela wok bilong lukautim spiritual laip bilong planti manmeri, em i stori long laip bilong tupela taim ol i liklik yet na ol i skul na bihain ol i go long wan wan rot bilong ol long laip i kam inap nau.

"Mi save long Bisop Cherubim olsem wanpela saveman na tu em i wanpela naturel lida. Em i wanpela man husat i gat daun pasin na tu em i man bilong givim samting long ol arapela na sampela taim, em i lus tingting long em yet. Piksa em taim em i stap olsem primia bilong Is Sepik, em bin save givim pe bilong em long ol arapela tasol em yet i no bin gat kaikai long haus bilong em. Mekim na em i bin save go long Wirui misin haus long kaikai long ol Sista.

"Papa bilong Bisop Cherubim i bin wanpela doktaboi, wankain olsem paap bilong mi. Mipela i liklik yet na mipela i bin save long wanpela arapela. Ol papa bilong mipela i bin wok long Biwat helt senta, viles bilong mi. Helt senta ya i bin stap long ailan long Wara Yuat tasol nau ol i muvum pinis i go long bikples. Ol diwai kokonas we papa bilong mi i planim na ol mango we papa bilong Cherubim i bin planim i sanap yet.

"Long yia 1956/57 taim ol papa bilong mipela i go wok

long Angoram haus sik, mitupela Bisop Cherubim i bin bung'gen.

"Mitupela Bisop Cherubim i bin serim planti gutpela taim wantaim long Angoram long liklik bilong mipela yet, i groap i go long skul na bihain kamap ol bikpela man na kisim wok. Mipela i mekim planti ol samting we ol manki Sepik i save mekim olsem swim, pul long kanu, painim pis long wara samting. Mipela i save taitim betsit na traim kisim win long seil long Wara Sepik na dispela i no bin wok.

"Planti taim mipela i save swim na slip long san, tanim kanu long sait bilong wara na slip stori i stap. Sampela taim mipela i save go antap long ol frenjipeni plaua diwai ausait long klinik we ol papa bilong mipela i savw wok na larim tingting i ron nabaut long laik wantaim ol driman long ol samting mipela i laik mekim long bihain taim.

"1957 em bin wanpela bikpela yia long mitupela bikos skul yia i stat na planti long ol pikinini i go skul. Mitupela Bisop Cherubim i wok long amamas pilai i stap na mipela i no joinim ol. Tasol long mun Septemba 1951, em mipela i enrol long skul. Tripela wik bihain, ol i-promotim mitupela na long 1960, mitupela i bin pinisim Gret 4.

"Peris pris bilong Angoram Patewr Doering i save skulim mipela long rilijes instraksen long olgeta mande moning na wanpela long ol askim we em i save wokim em husat i go long Sande lotu long putim han bilong ol i go antap. Liklik lain tasol i putim han i go antap tasol planti long mipela wantaim Bisop Cherubim i nogat. Na hap tok we Pater i save mekim em mi no lus tingting long en em "Em nau ol diwai bilong bus i sanap." Mi bilip olsem Pater Doering inap amamas tru long save olsem "wanpela diwai bilong bus" i

kamap wanpela bisop tude.

"Long 1961 ol i salim mipela Bisop Cherubim wantaim ol kiasmet bilong mipela olsem sampela ol biknem lain long gavman olsem Tony Bais, Andrew Yauieb, Martin Hukula, Matthew Kamori, James Rahiria, Petewr Donigi, Richard Koronai, Vincent Maragau, Jihn Kapas na John Makias i go long Brandi Hai skul.

"Planti samting i kamap long mipela na mipela i lainim planti samting tu long lukautim mipela yet. Em bin namba wan taim tu long mipela i lusim ples tasol mipela i lainim long kamap ol gutpela pren na stap amamas na wok hat long skul. Mipela i save hatim ol brotkas long ABC na wanpela long ol em long lainim tok ples Saina. Mi bin les long mekim dispela long dispela taim. Nau mi tingting na mi tok sapos mi bin wokim dispela, em bai helpim mi gut long stap na wok bilong mi long Beijing, Saina.

"Long 1963 ol bin mekim Brandi wanpela hai skul long en na mipela i bin namba wan grup. Bihain long tripela wik ol bin salim mipela Bisop Cherubim na ol arapela i go long Rabaul Hai skul long Is Nu Briten. Bihain long wanpela yia, mi go skul long Australia na Bisop Cherubim wantaim Paul Bengo na ol arapela i bin go skul long Keravat nau em i kamap Nesenel Hai skul. Long Keravat, Bisop Cherubim i kamap olsem skul kepten, kepten bilong skul soka, lida bilong Lijen Mary grup na wanpela skul kedet opisa.

"Bihain long em i pinisim Fom 4 mi bin harim olsem Bisop i laik kamap pater na em i lusim Keravat na go long Sen John's semineri long Kairuru Ailan, Is Sepik. Mi wari long en bikos dispela em i no wanpela long ol driman bilong mitupela.

"Tasol wanpela gutpela stori we i bin staim tingting na laik bilong Bisop long joinim rilijes

em taim em bin gat sik hepataitis long Keravat na Pater Cunningham i givim em wanpela misel o Baibel long em na Mista Bengo husat i kisim wankain sik na i slip i stap wantaim bisop. Insait long narapela tripela muh em i sik, em i ritim dispela Baibel. Tasol em i wok long painim hat long tokim ol poro bilong em long laik bilong em long kamap pater. Dispela em bikos long 1964, Mista Bengo na Bisop Cherubim i bin tokim Bernard Narokobi husat nau i Palamen Spika long lus tingting long laik bilong em i kamap pater taim em i autim laik bilong em long tupela. Tasol bihain em i kisim strong na em i tokaut na Mista Bengo i sapotim em. Dispela pren na sapot namel long tupela i stap tude yet tu.

"Long 1974 taim mi pinisim skul long Yunivesiti bilong PNG na Bisop tu i laik pinisim skul long seminari, mipela i stap long haus bilong Mista Bengo na mi tokim em olsem "Maski lus tingting long kamap pater na yu kam na yumi kontribut long kamapim kantri". Na em i tok "Barnabas, yu stap ausait na yu wokim kontribusen na mi bai kamap pater na wokim kontribusen tu bilong mi long insait." I kam inap nau, mi no lus tingting long dispela hap tok bilong Bisop. Na stat long dispela taim mi bintok bai mi sapotim em strong long wok pater.

"Yumi olsem i save long kontribusen bilong Bisop long politiks na sios. Em bin wok olsem primia long Is Sepik. Em bin wanpela politisen husat i no bin kempein tasol em i win.

"Mi na famili bilong mi i amamas long kamap bilong em olsem Bisop na mipela i tok tenkyu i go long Pop, Asbisop Brian Barnes, ol kelji, ol lain i redim dispela seremoni na olgeta famili, hauslain na pren na wantok husat i sapotim Bisop long odnesen bilong em olsem Oksileri Bisop bilong Mosbi Asdaiosis.



MAN I BIHAINIM LO BILONG GOD

Olsem wanem na yangpela man i ken wokabout long kilpela pasin? Em i mas bihainim tok bilong yu na bai em i stap klin. Mi gat wanpela ting ting tasol. Mi laik mekim wok bilong yu. Yu helpim mi na mi no ken lusim ol lo bilong yu. Mi putim tok bilong yu i stap long bel na tingting bilong mi. Olsem na bai mi no ken mekim sin long yu. Yu mas lanim mi long ol stretpela lo bilong yu.

Ripot tok CIS menesmen save olsem 18 kalabusman bai ronawe

RIPOT bilong wok painimaut i go insait long Bomana Koreksenal Institusen we 18 kalabusman i bin brukim jel na ronawe long Desemba bilong las yia i redi pinis na ripot i stap nau wantaim nupela Komisina, Richard Sikani. Ripot i tok olsem ol 18 riman diteni o kalabusman i lusim sel blok bilong ol na wokabaut i go long hai perimeta fens inap long 9:30 pm bipo ol i ronawe long 9:45am.

Wanpela Koreksenal opisa (nem i stap long ripot) i bin tok em i bin patrolim kompaun inap long alam i bin kra i na i no bin saspek olsem ol kalabusman i bin ronawe na dispela i mekim ol lain husat i mekim wok painimaut i saspek long em. Ol operesen pesenel i bin lukim opisa ya klostu stret long hap we ol kalabus lain

i bin ronawe bipo long ol i bin lusim kompaun.

Ripot i tok planti ol opisa husat i sapos long wok long dispela taim we ol man ya i ronawe i no bin wok. Duti opisa (nem i stap long ripot) i bin go aut na dring bia long taim bilong eskeip. Opisa ya i no bin go long wok tenpela de olgeta.

Ripot i tok moa olsem menesmen i save pinis olsem kain samting bai kamap tasol ol i no bin mekim wanpela samting olsem stapim ol lain opisa husat i tok sik na laik go long haus na tu ol i no tokim ol koreksenal opisa long no ken lusim wok nating.

Mista Sikani i tok 13 opisa i bin stap long rosta long wok sif namel long 2pm na 10pm na insait long dispela namba, eitpela tasol i bin go long wok. Ol lain husat i no bin go long wok em tupela i bin stap long sik lip, wanpela i bin kisim tok orait long stretim famili problem na narapela wantaim duti opisa i bin absen.

Komisina i tok ol lain

bilong wok painimaut i bin mekim sampela toktok long mekim save long ol opisa husat i no bin wok na bikpela tingting bilong ol em long lukluk long ol opisa husat i gat nem long rosta bilong kompaun sif long 2 i go long 10pm long Desemba 23, 2000. Ol opisa husat i bin sik long Desemba 23 bai nogat sas.

Ol lain husat i bin bikhet long wok bai ol i pinis long fos.

Wok painimaut i toktok moa olsem long Januери 2000 i go long Januери 2001, ol rekod i bin soim olsem 72 kalabusman i bin ronawe long Bomana prisen. Insait long 72, 20 man ol i kisim pinis na insait long 20 man, tupela man i dai taim ol i traim long kisim ol i go bek long kalabus. Long dispela taim em 18 man i stap long kastodi na 52 kalabusman stap aut yet. Wanpela tasol bilong 18 kalabusman em ol i sasim eitpela mun long kalabus bikos em i ronawe tasol ol narapela 17 em ol i no sasim yet.

NCDC sekim ol haus long siti long bringim gutpela sevis long bihain

LYNNE MINIRU i raitim

HELT seksen bilong Nesenel Kapitel Distrik Komisn i wok nau long mekim wanpela sovei o sekap long olgeta haus insait long siti.

Dispela sovei i karamapim ol tripela kaunsel eria olsem Mosbi Saut, Mosbi Not Is na Mosbi Wes.

Man husat i go pas long dispela sekap, Robin Yanopa, i tok dispela sovei i karamapim olgeta ol residensel haus na ol bisnis haus. Ol bisnis haus em ol komesel na industriel eria.

Olsem 30 man olgeta long helt seksen i stap insait long

dispela sovei na sovei i bin stat olsem tupela wik i go pinis.

Mista Yanopa i tok ol helt pesenel i sekim ol haus long painimaut husat em papa bilong haus, husat i stap nau long haus, ol adres bilong ol na ol narapela infomesen long helpim ol luksave long wanem ol manmeri i silip o wok long wanem ol hap na bai NCDC i ken plen gut long bringim ol sevis i go long ol pipel.

"Dispela sovei bai helpim mipela long bringim gutpela sevis i go long ol manmeri insait long siti," Mista Yanopa i tok.

Sovei bai helpim mipela

long save. long wanem ol olpela lain i stap na wanem nupela lain i muv i kam."

Em i tok bai ol i traim long sekim olgeta haus insait long siti long wanpela mun. Nau yet ren i wok long mekim wok bilong ol i hat liklik na ol i no go long planti haus tumas long mekim sovei bilong ol.

Mista Yanopa i tok: "Mi laik edvaisim ol residens bilong ol haus olsem ol i mas redi i stap wantaim ol aidi bilong ol taim ol helt pesenel bilong mi i go long ol."

Dispela sovei em i olsem wok bilong ol helt lain bilong NCDC na ol residens mas no ken tingting planti.

Ol Koreksenal Sevis opisa paulim planti mani bilong dipatmen

WANKAIN wok painimaut i go insait long ronawe bilong ol kalabusman long Bomana prisen i painimaut tu olsem long las yia Nesenel Kapitel Distrik Komisn (NCDC) i bin donetim K75,000 we K30, 570 (sek namba 132887) i bin go long alowens bilong ol opisa husat i bin wok long Krismas na Nu Yia. Long wankain de yet (21/01/00) K40,000 (sek namba 132888) i bin go long baim ol hap yunifom long Wikila Holsel. Tupela sek wantaim i bin stap long han bilong wanpela opisa (nem i stap long ripot) tasol opis long Bomana i no bin givim ol dokumen we i soim ol risit bilong pemen. Nau yet K4,430 long dispela donesen i go lus nating.

Wanpela opisa (nem i stap long ripot) i bin kisim wanpela dipatmentel sek we mak bilong mani i stap olsem K3,440 long yusim long planim daiman na tu opisa ya i bin yusim K200 olsem peti kes nau yet em i no givim rekod bilong hau em i bin yusim mani.

Welfe seksen long Bomana i bin kisim wanpela sek mani long mak bilong K2,000 (sek namba 40685) long Sentrel Provinsel Gavman long yusim long ol kalabusman bilong Sentrel. Insait long dispela mani, K1,051.72 i gat rekod bilong em na K948.28 i nogat rekod bilong em.

Long Oktoba bilong las yia, NCDC donetim gen K11,308.53 long baim ol samting bilong dai man na mani ya ol i bin dipositim long Bomana Tras Akaunt. Wanpela sek namba 0139026 long tras akaunt long mak bilong K5,000 i bin go long han bilong wanpela opisa (nem i stap long ripot) husat i bin yusim K3, 997.62 na narapela K1,002.38 em nogat ripot long en.

Ripot i tok long dispela donesen yet, wanpela opisa (nem i stap long ripot) i bin kisim K3,000 olsem sek mani (sek namba 0139027) na dispela mani em nogat rekod bilong em yet.

Lens Minista John Pundari i bin donetim K1,500 olsem sek mani (sek namba 20805) i go long Bomana long ol kalabusman i ken selebretim Krismas 2000. Wanpela Non-Komisn Opisa i bin yusim mani na opisa ya i no givim ripot yet long hau em i bin yusim mani.

Dipatmen bai askim ol opisa husat i yusim mani long soim ol risit bilong mani ol i bin yusim.

Mista Sikani i tok bihain long em i lukim ripot, em i bin kisim tingting olsem ol woda husat i bin wok long Desemba 23, 2000 i bin save long wanem samting bai ol kalabusman i mekim tasol ol i no bin mekim wanpela samting long stapim. Gol Komanda long dispela taim i bin kisim longpela lip stret na go long provins bilong em na em i no bin stretim sekuriti gut long jel long Krismas na Nu Yia taim.

Komisina i tok em bai inap sasim yet ol opisa husat i bin mekim rong bikos sampela bilong ol i stap long lip malolo bilong ol na ol i no go long wok yet.

Tasol em i tok bai em i no inap isi long ol Komisn Opisa, ol NCO, na ol Woda husat i no bin mekim gut wok bilong ol long taim ol kalabusman i bin ronawe.

Komisina bai tokim ol plis tu long sasim ol opisa husat i no bin toksave long ol mani bilong dipatmen ol i bin yusim.

Em i tok dispela kain pasin em i stil pasin na sapos i tru bai ol opisa ya i kisim taim stret.



• Apil bilong Jerry Singirok i abrus. (lephan) Jerry Singirok wantaim loya bilong em Moses Murry (raitim) i kam aut long Waigani kot haus bihain long kot i mekim disisen egensim apli bilong Singirok long disisen bilong Lidasip Traibunel long hevi em i stap insait long 1997 Sandlain hevi.

TOYOTA

4X2 SINGOL KAB

2.4 Lita Diesel • 4 Silinda engin • 5 Spid Manuel Transmisin, na planti moa.

SPESOL OFA !

K500 KAS SKUL FI

LONG KISIM MOA TOKSAVE LUKIM MIPELA LONG ELA MOTORS BRENS KLOSTU LONG YU

PORT MORESBY PH 3229400
 LAE PH 4722322
 KOKOPO PH 9829100
 MADANG PH 8522188
 GOROKA PH 7321844
 MT HAGEN PH 5421888
 WEWAK PH 8562255
 KAVIENG PH 9842788
 KIMBE PH 9835155
 TABUBIL PH 5489060
 VANIMO PH 8571254
 PORGERA PH 5479367
 BUKA PH 9739915
 LIHIR PH 9864099
 ALOTAU PH 6410100

Baim Niupela Toyota Hilux 4x2 singol kab long Ela Motors brens Kantri wido na bai mipela givim yu **K500 CASH** long skul fi long pikinini bilong yu. Dispela spesol ofa em i inap long ol kar yu baim namel long 24th Januери inap long 28th Febuери 2001. Go insait long Ela Motors ne lukim mipela na askim long niupela Toyota Hilux 4x2 singol kab Spesol Dil Nau.

Igo beke long skul !

x 1 HILUX + Skul FI !

BITIM PRAIS I GO ANTAP !


Ela Motors

TOYOTA


WHEELS FOR THE NATION
 VISIT OUR WEBSITE - <http://www.ela-motors.com.pg>

AGG APPROVED FINANCE AVAILABLE

HARIAP! NOGUT OFA PINIS!



• Lephan: Bisop Cherubim Dambui i kamaut na bungim ol manmeri bilong Mosbi husat i witenesim lotu bilong em long kamap bisop.
 Antap: Konfemesio ... Ol sios bilong ELCPNG St John's Lutheran kongregesen long Goroka, Isten Hailans, i blesim ol konfemesio sumatin. Ol poto: SAPE METTA.



• Stail bilong ol Samarai long danis long soim amamas na pasin kastom bilong ol. Aninit: Minista William Ebenosi i go raun long ilektoret bilong em long Kiriwina Gudinap na givim helpim long wanpela skul.

Great for a picnic **2 in 1** Great for the office
 Great for the village

NATIONAL No.1 Sugar and Tea Pack

A combination of 25 Ramu Sugar sachets of sweet cane sugar from the Ramu Valley and 25 National No.1 Tea bags of carefully selected tea leaves from the Highlands

Now that's refreshing



I no gutpela long rausim ol skul pikinini

HELEN REI I raitim

RAUSIM ol skul pikinini long ol skul stat bilong yia bikos ol i no peim skul fi i egensim polisi o lo bilong Dipatmen bilong Edukesen we i sut long helpim we gavman i laik. mekim long givim kwaliti edukesen progrem (GAQEP) long kantri.

Edukesen Seketeri Peter Baki i tok dispela lo i no nupela. Em i bin tok em i go wantaim polisi bilong wok patnasip long edukesen na long tem tingting we olgeta man meri na pikinini insait long kantri i mas skul.

Aninit long GAQEP progrem, gavman i bin katim K25.65 milien bilong helpim ol skul i peim ol skul metiriel na saplai long dispela yia 2001.

Na i peim tu ol skolasip bilong ol skul pikinini husat i bungim hevi.

Mista Baki i tok em i egens long spirit bilong nesanel konstiusen o mama lo na ol objektiv bilong nesanel edukesen long rausim ol skul sumatin bikos long ol kain hevi i kama na ol i no inap long peim ol skul fi.

"Ol papamama i gat risponsibiliti o wok long helpim peim skul bilong ol pikinini bilong ol tasol ol skul tu i mas luksave long situesen bilong ol papamama," Mista Baki i tok.



Singautim ol pikinini i go long skul! • Wapela manki long Ufaufa komyuniti skul long Gudnap Ailan, Milen Be i winim sel long singautim ol skul pikinini i go long ol klas.

Nupela marasin bilong sik malaria long PNG

PNG nau i yusim nupela marasin bilong tritim sik malaria bikos klorokwin marasin i no wok gut.

Dispela i bibainim wapela rises we disis kontrol yunit bilong Helt Impruvmen Divisen bilong Helt Dipatmen i bin karimaut .

Wol Helt Ogenaisesen i bin helpim long karimaut dispela rises long olgeta hap bilong kantri.

Rises i soim olsem marasin klorokwin i no moa strongpela long daunim sik malaria.

Wapela konsalten bilong Wol Helt Ogenaisesen disis kontrol divisen em Steve Bjorge i tok nupela marasin ya bilong kisim long daunim sik malaria em long "Fensida".

Dispela marasin em ol bai kisim long wapela taim tasol. Wantaim klorokwin, em ol i save kisim long tripela de.

Tasol Mista Bjorge i tok ol malaria siklain i ken kisim tripela de klorokwin marasin taim ol i kisim wapela de fensida marasin. Na ol dispela i gat mani i ken baim wapela marasin

bilong ol Saina long stapim sik malaria long en. Ol i ken baim marasin ya long ol kemis.

Ol siklain i ken kisim dispela Saina marasin taim ol i kisim bikipela sik malaria long en.

Em i tok taim ol sikman i kisim wapela de fensida marasin, em i no inap long pinisim sik na olsem ol i mas kisim kombain marasin bilong klorokwin, fensida na Saina marasin.

Em i tok Saina marasin bai daunim skin i hot tasol fensida bai kilim binatang bilong malaria long blut na olsem ol i mas kisim dispela tupela marasin wantaim.

Mista Bjorge i tok dispela yia em yia bilong Rausim Birua Malaria na progrem ya bai i go het long ol yia i kam long traime daunim kila sik malaria ya.

Em i hap tu bilong Helt Promosen progrem na olsem sampela pepa we i mekim kila ol samting na ol aweanes long sik ya em ol bai givim long ol skul na komyuniti insait long kantri.

Aitape Daiosis skul tras fan bod i bung

SYLVIA AVITU I raitim

WANPELA bung i bin kama long glasim na skelim ol eria bilong yusim Aitape Sunami Disasta skul tras fan.

Dispela em ol mani we Aitape Daiosis i bin putim long Tras Fan bilong helpim ol skul pikinini long eria we sunami i bin bagarapim ol long 1998.

Ol Fan memba i bin bung long Februari 5 long toktok long dispela samting na wokim plen long bihainim na yusim hap mani we i stap yet long en.

Namba wan plen o rot we ol i laik bihainim em long yusim tasol ol fan i stap nau long Wes Kos. Namba tu em long fandim tasol ol lain bilong eria na husat i bin stap na bungim bikipela, a hevi long sunami na namba tri em long helpim ol lain bilong disasta eria na ol na lain bilong ol i bin kisim bagarap tasol ol i stap ausait, man husat i lukautim fan Dikon Joe Amanos i tok.

Dikon Joe i tok nogat bikipela senis i kama long tras fan tasol dispela tripela rot long bihainim na ol i no inap long tromolm nating na pinisim mani.

Em i tok bikos mani i wok long sot nau, ol bai yusim tasol long helpim ol dispela husat i bin bungim hevi long en.

Em i tok narapela samting we ol i sanapim tripela mak bilong skelim na yusim mani long en em

I no bin gat spesel donesen yet bilong sapatim dispela eria i kam long taim bilong hevi.

Em i tok donesen i kam long skul tras fan em i bin kam long jenerel donesen long taim bilong sunami.

I nogat fan bilong dispela samting i kam dairek long ol dona," Dikon Joe i tok.

Dispela skul tras fan ya em ol i bin stat long yusim long las yia bihain long ol i redim na fainalaisim ol polisi gaidlain na kisim tok orait aninit long lo.

Ol i bin kirapim Skul Tras fan long 1998 taim sunami i bin kama long Wes Kos eria we i karamapim ol ples olsem Arop, Sissano na Malol. Ol pipel long ol dispela ples i bin bungim bikipela hevi nogut tru na ol i lusim olgeta samting.

Long 1999 inap long 2000 Tras Fan ya i bin peim ol skul fi bilong ol skul pikinini long ol dispela eria.

Pastaim long dispela, Aitape Rihabilitesen progrem i bin wok long peim skul bilong ol pikinini.

"Ol bin kirapim tras fan ya long helpim ol pipel inap ol i kisim gutpela sindaun. Na mak bilong helpim ol bai inap long makdonesen mani i stap long en. Em i no wapela pamanen samting," Dikon Joe i tok.


I kam inap nau, Tras Fan sabdi i helpim 2462 praimer i na teseri skul pikinini.



NESENEL HEART FAUNDESEN BILONG PAPUA NIUGINI INC.

LEWA BILONG YU I MAS KISIM GUTPELA KAIKAI BILONG KAMAP STRONG NA HELTI.

KAIKAIM OL DISPELA KAIKAI TASOL



P.O. Box 158, Mount Hagen, WHP. Phone: 542 2199 - Fax: 542 2384
Email: mount-hagen@guinnpkf.com.pg

Kerosin lam kukim ol pipel long Madang

• Bikpela hevi tru i kamap long Madang long las wik we kerosin i lait na kukim planti manmeri na ol i kisim bagarap long skin bilong ol na go Madang haus sik.

Ol ripot i kamap i tokaut olsem ol manmeri i laik laitim lam tasol ol i harim nois i kamap na lap i pairap na kerosin i kalap long skin bilong ol lain i stap klostu na paia i kukim ol nabaut.

Ol poto bilong ol manmeri i kisim dispela bagarap i soim tu ol bagarap we i kamap long skin na bodi bilong ol bikpela manmeri na ol liklik pikinini tu wantaim.

Dispela hevi i mekim Gavman i stapim bikpela fiul kampani, Shell long noken salim ol kerosin long Madang inap ol saveman i go sekim na ol kerosin i stap long teng pastaim.

Olgeta sevis stesin long Madang i no op long salim kerosin na ol i wetim yet ripot bilong wok painimaut igo insait long dispela hevi.

Ripot i tok ol lam i pairap taim ol lain i slekim masin na i laik laitim lam long haus. Bai ripot bilong dispela hevi wé i tokaut long as tru bilong hevi ya i kamap olsem wanem bai kamaut bihain taim ol saveman i mekim painimaut bilong ol i go insait long ol kerosin long Madang Shell kampani.

• Toktok namel long Gavman na Wol Beng i no klia tumas yet long rot bilong kisim namba tu helpim o

dinau mani i kam long Wol Beng long strongim baset bilong kantri long dispela yia.

Pastaim Wol Beng i bin laikim sapos haus mani bilong kantri, PNGBC beng i ken gat gutpela rekot na mani pastaim long Gavman i ken salim PNGBC beng. Na Gavman i tokaut las wik olsem PNGBC beng i gat gutpela rekot nau na em i ken mekim gutpela mani nau na ol i redi long salim.


Gavman bai redi nau long salim balus kampani, Air Niugini liklik taim. Na dispela em ol sampela laik we Wol Beng i laikim aninit long Straksarel Edjasmen Program (SAP) o rifom program bilong Gavman. Mak we PNG Gavman i kamap long en long kisim dispela namba tu dinau mani, mak long K290 milien i no klia yet.

• Ol kampani na bisnis long Taiwan i wok long amamas long kam kirapim wok na bisnis insait long Papua Niugini bihainim nupela rot bilong Fri Tred Jon long Vanimo Sandaun provins.

Long dispela wik wanpela bikpela Taiwan kampani i kamap na sainim pepa wantaim Minista bilong Tred na Industri John Tekwie long go het long bilding olgeta bikpela haus na masin bilong statim wok bilong Fri Tred Jon. Dispela Fri Tred Jon bai mekim isi long wok bilong salim kago na ol bisnis i kamap gut insait long kantri long bihain taim. Dispela



inap kamapim mak olsem 10,000 wok bilong ol Papua Niugini lain na tu mekim Vanimo taun i kamap wanpela bikpela taun olgeta insait long kantri.



• Minista bilong Tred na Industri, John Tekwie.

• Beng Saut Pasifik (BSP) na Credit Corporation i tokaut olem tupela bai bung wantaim long mekim wok bisnis bilong tupela insait long kantri. Tupela kampani ya i mekim dispela toksave long dispela wik.

Taim tupela i bung wantaim, tupela bai i gat mani moa long K110 milien bilong strongim bisnis bilong tupela long go het.



Apim pe bilong ol liklik woka

SAPOS Nesanel Gavman i laikim ol liklik wokmanmeri i kisim K60. long potnait, ating bai planti manmeri long kantri bai sindaun nogut yet. Bikos K60. i no inap tru long baim kaikai na lukautim famili i go inap long narapela fotnait.

Gavman yet i save gut olsem prais bilong ol kaikai na ol samting long stua i go antap tru. Taim ol stua i karim kaikai long taun i go long ples, ol i save apim prais bikos ol i save lusim mani long baim PMV o sip. Sip na ol PMV i save sasim sampela ekstra mani long karim ol kago bilong stua i go long ples o ol autstesin. Olsem na ol stua i save sasim liklik toea i go antap long prais bilong kaikai long kisim bek mani ol i lusim long baim trenspot.

K60. long dispela taim nau em mani bilong ol sumatin husat i save skul long koles o trening skul bikos ol bai kaikai long mes tasol ol i mas baim ol sop, buk na pen, kolos bilong werim na arapela samting moa. K60 em i no mani bilong famili long dispela taim tude bikos em i liklik mani tumas.

Minimum Wejes Bod i apim pe bilong ol wokmanmeri i go antap long K120 potnait. Dispela disisen i kamap bihain long 1992 inap nau dispela senis i kamap. Tasol K120. em pe bilong ol singel wokmanmeri long taun husat i gat haus long slip. Ol ples wokmanmeri ating em bai orait liklik bikos ol i ken sevim wanpela K20. i stap long olgeta fotnait long baim skul fi bilong ol pikinini. Em sapos dispela wokmanmeri i asples long hap kampani o plentesen i stap long en. Sapos em i bilong narapela provins, em bai hat laip olgeta long sevim mani bikos em i mas tromoi mani yet long lukautim famili bilong em. Em bai wetim pinis pe tasol long kisim famili i go bek long ples.

I gat luksave olsem sampela kampani na plentesen long ol autstesin na distrik i save baim ol wokmanmeri bilong ol mak long K100. Sampela long K80 na K90. Olsem na Gavman i mas skelim dispela na wanbel long mak bilong pe i ken kam antap liklik klostu long K100 potnait.



TOKSAVE BILONG GAVMAN BILONG PAPUA NIUGINI NA WOL BENK



The World Bank

POT MOSBI, SYDNI na WASHINGTON DC. Februari 18, 2001 - Wol Benk na Gavman bilong Papua Niugini i tokaut tude olsem planti bikpela samting i kamap bihain long ol i paitim toktok inap wanpela wik long ol rifom program long ikonomi bilong kantri.

Tupela wantaim i wanbel long wok wantaim long kamapim ol senis bilong strongim ikonomi bilong Papua Niugini. Tupela i luksave long wok i kamap pinis long kamapim ol rifom program, strongim wok bilong gavman na stopim korapsen.

Gavman bilong Prais Minista Sir Mekere Morauta i mekim bikpela wok tru long dispela sotpela taim em i kisim wok bilong bosim kantri.

Wol Benk i amamas na sapotim Prais Minista Morauta long stopim korapsen long olgeta hap.

Long dispela samting, Wol Benk i luksave long bikpela wok Prais Minista i mekim long kamapim strongpela gavman na stopim ol pasin i brukim lo na kamapim wok bilong strongim ol lain olsem Ombudsmen Komisn, Odita Jeneral na Palimentri Pabluk Akauns Komiti na sanapim dispela Komisn bilong Inkwairi long Nesanel Providen Fan.

Gavman bilong Prais Minista Morauta i luksave olsem gutpela gavman em i bikpela samting na i mekim wok long strongim dispela samting.

Gavman na Wol Benk i amamas long ol gutpela senis i kamap nau aninit long program bilong Morauta Gavman long lukautim na strongim wokman bilong kantri, givim sevis long ol rural eria, 2 pabluk sevis, pralvetaisesen na wok bilong bosim forestri.

Ol wok i kamap pinis long ol dispela eria tasol Gavman bilong Prais

Minista Morauta i luksave olsem i gat moa wok i stap yet long mekim. Prais Minista Morauta i tok em yet na gavman bilong em bai i strong long kamapim dispela rifom program.

Wol Benk na Gavman bilong Papua Niugini i amamas long ol dispela wok i kamap pinis.

Sapos wok i strong yet long dispela program bai i gat gutpela sans long Papua Niugini i kisim olgeta mani em Wol Benk i promis long givim aninit long Gavenens Promosen Adjasmen Lon, em i stap aninit long agrimen PNG i gat wantaim Wol Benk.

Konsaltativ Grup Miting bilong Papua Niugini wantaim ol ovasis lain i save givim dinau mani, bai i no inap kamap long mun Mas, bai ol i makim narapela taim gen long kamapim dispela miting. Long dispela mun, bai Wol Benk i bung wantaim Intenesenel Moneteri Fan (IMF) long skellm ol program em ol i askim Gavman long mekim.

Wol Benk i laik wanpela mausman bilong en i stap long Mosbi na bai ol i paitim toktok wantaim Gavman long dispela samting.

Tupela wantaim i wanbel olsem Mista Klaus Rohland, Kantri Dairekta bilong Papua Niugini bai i bosim dispela opis na olgeta wok i stap aninit long program bilong Gavenens Promosen Adjasmen Lon. Mista Rohland i toksave long Gavman bilong Prais Minista Morauta olsem em bai yusim sevis bilong Mista Dan Weise husat i makim Wol Benk long Mosbi na em i konsalten bilong Wol Benk long Gavenens Promosen Adjasmen Lon Program, bilong Sidni opis bilong Wol Beng.

Prais Minista Morauta na Mista Rohland i tok ol i wanbel long wok bung wantaim long dispela agrimen na wok gut long kamapim dispela rifom program.





Amerika:

Husat i asua na birua i kamap?

KOSGAD bilong Amerika i lukautim wanpela kru bilong Ehime Maru wanpela fising bot bilong Japan we nevi samarin sip bilong Amerika USS Greenville i bin bamim long las wik klostu long nambis bilong Pearl haba long Hawaii.

Piksa i kam long Weekend Australian niuspepa. Ol painimaut long dispela trabel i go het nau. 34 kru bilong Ehime Maru, ol i no painim yet nainpela we i gat long en tupela skul tisa, na foapela sumatin bilong fising skul.



Ol Blekpisin i singsing

Australia:

Lapun wantaim 89 krismas, em i sindaun tasol em i strong yet. Taim em i stori long ol taim bipo na pasin we ol waitman i bin kisim ol long kam wok long ol plantesen long Kwinslen nogat man i ken daunim em.

Em i poin i go long matmat daunbilo long Walkerstown rot we bipo em i bin gat suga plantesen long en. Tasol nau em MacKay taun i i stap long em..

"Aninit long ol bikipela matmat i go inap long rot, mi tokim yupela stret em matmat bilong ol wansolwara ya (Saut Si Ailanda lain), "Andrew i tok taim em i poin i go na ol belpela ai bilong em i lukluk strong olsem em i no trastim mi.

Em i tok gen olsem "Aninit em ol blekpela pipel husat i bin kamapim suga bisnis long Australia long en."

Em i sindaun long sia na stori i go i go long histri bilong ol pipel bilong en we i bin mekim bikipela wok olsem ol wokboi na i no kisim wanpeal gutpela luk-save." Mi sori tru long lukim ol dispela matmat," Mist Andrew i tok.

Ol i kolim ol yet "the forgotten people" o "Ol pipel we ol i lus tingting long ol."

Tasol wanpela pikinini bilong ol, Mal Meninga em foma Kepten bilong Ragbi Lig long Australia i bin kamap wanpela biknem long kantri na wol bikos long pilai bilong em.

Mista Andrew i tok stori em ol yangpela pikinini bilong ol blekpisin i no save na i no harim em rot we ol waitman i bin fosim na kisim ol yangpela manmeri bilong ol ailan long wansolwar olsem Pentekos, Tanna, Malaitana ol arapela moa, pulapim ol i go long ol sip na kisim ol i go long Australia. Na pasin we ol i bin fosim ol long klinim bus bilong ol wait papa bilong ol plantesen husat inap dai sapos ol i mekim dispela wok long bikipela san bilong Kwinslen.

Em i stori long dispela pasin bilong Blekpela pisin ol i stilim na fosim ol, stat long 1863 em sem yia we Abraham Lincoln, Presiden bilong Amerika i bin tokaut olsem pasin bilong yusim ol manmeri olsem ol slev o wokboi i pinis. Em i tok dispela pasin bilong baim na salim ol humen kago o ol manmeri i bin go het moa long 40 krismas,

"Moa long 800 sip i bin raun long wara bilong wansolwara na givim kontrak long samting olsem 62,000 ol pipel we ol i kolim ol long "Kanaka", em boi long tokples Hawaii.

Long tude, moa long 15,000 pikinini bilong ol Blekpisin na suga paionia i stap na na wok na mekim Australia olsem asples bilong ol. Planti bilong ol i stap long Kwinslen na noten Nu Saut Wels. Tasol nogat wanpela long ol i papa long wanpela suga plantesen.

Isi isi gavman bilong Australi i wok long givim luk-save long ol pikinini na bubu bilong ol blekpisin lain.

Long Oktoba las yia, samting olsem 400 wansolwara pikinini lain long Australia i bin bung long palamen haus long Kwinslen bilong kisim luksave na wokim seremoni long en. Long 1970 Bjelke Peterson na long 1994, Praim Minista Paul Keating i bin wokim ol strongpela toktok i sapatim ol tasol ol i no lukim tumas kaikai long en.

Long katim stori i go sotpela, planti ol pikinini na bubu bilong ol blekpisin lain i wok long laik save long ol tumbuna bilong ol. Sampela i go long Vanuatu na Solomon Ailan na tru yet, ol i painim ol hauslain na famili bilong ol.

Na ol famili long ol ailan ya i amamas nogut tru bikos ol i ting olsem ol hauslain bilong ol i bin lus tasol nau ol pikinini na bubu bilong ol i wok long go bek na ol i save olsem ol i no lus tasol ol i stap long sampela hap.




• Cedric Andrew (antap) husat i bin wok olsem sugaken boi long ples bilong em long Homebus, MacKay na daunbilo em Monica na man bilong em Joe. Ol tumbuna bilong ol i bin sindaun long eria pastaim. Monica i visitim haus we em i bin groap long en taim em i bin liklik. Ol piksa i kam long Weekend Australian niuspepa.



• Bonita Mabo, meri bilong biknem blekman bilong Tores Streit Ailan husat i pait hat long gavman bilong Auatralia i givim luksave long ol bleklain i kam long ol wansolwara ailan.


• Ol pikinini bilong ol Blekbet o Blekpisin lain o ol lain we ol waitman i bin stilim long ol sip i go wok olsem ol slev o wokboi long ol suga na kokonas pntesen long Kwinslen.

Antap: Ol yangpela blekpisin i wok long sugaken plantesen, namel: laspela grup bilong ol blekpisin i go bek long Solomon Ailan long 1895 na klinim graun long wokim suga plantesen na daunbilo em Noah na Joyce Sabbo.



• Stefani De Pieri i wanpela profesenel kuk i soim ol kindam bilong Mari Wara na wain bilong Mildura long Saut Australia.

Stat long taim em i kam long Itali na sindaun long Mari wara hap 10-pela krismas i go pinis, em i kamap wanpela biknem kuk long eria. Mari Wara i gat ol pis, kindam na ol kain abus bilong wara i stap long en tasol long narapela sait tu, wara i wok long bagarap bikos long wok nogut bilong man na ol animel na ol wok developmen long en. Dispela em namba tu wik Australian niuspepa i karimaut wok sevei long dispela wara long traim sevim em (wara).



• Ol reskyu lain i helpim wanpela pikinini i kam aut long sip klostu long Frans Riviera long dispela wik.

Hevi i wokim na planti i lusim ples

Turkey:

Moa long 900 Kurdis manmeri na pikinini bilong kantri, Turkey klostu long Greece long Yurop i ronawe long hevi insait long kantri bilong ol na ol bin kam sua long Sen Rafael insait long Frans Riviera long kantri Frans. Ol lain i nogat pepa bilong tok oraitim ol i kam insait long kantri na ol i kolim ol loing iligel imigrens.

Ol Kurds em ol i narakain pipel wantaim kastom, tokples na ol arapela samting moa i no wankain wantaim ol pipel bilong kantri Turkey na long sampela yia nau ol i wok long pait long kisim luksave long Turkey na bruk lus long fomim wanpela kantri bilong ol yet. Ol i stap insait long hevi long Turkey na tu long ol arapela kantri olsem Iran, Irak na Afghanistan. Planti tausen bilong ol i dai pinis. Na olsem olgeta yia planti i wok long ronawe lusim Turkey na ol arapela kantri long painim fridom long ol kantri olsem Inglen, Frans na ol arapela kantri moa. Namel long 1998 na 2000, ol i rekotim olsem 40,000 iligel Kudis pipel i bin ronawe i go olsem long Ingran long ol sip bilong painim rot long sindaun long ol ples we ol i ken stap gut long ol. Mak i wok long dabel insait long olgeta yia.





KLAIN SEVIS SENTA ISTAP LONG HELPIM OLGETA NPF MEMBA

"Putim ol memba i go pas"

Long taim mipela i bin opim dua long widrowol aplikesen long Februari 2001, mipela i bin gat:

- Mak olsem 300 memba long wanpela de ikam insait long Boroko opis long lukim mipela
- Moa long 550 telepon kol i kam long ol memba long klain sevis senta long helpim ol long widrowol aplikesen, arapela infomesen long NPF, na bikpela samting em long pe-aut long kontribusen.



Jan 01-Feb 14, 2001	Amount Paid	No. of Members
• Unemployment	649, 593	321
• Disabled	1,665	1
• Emigration	13,041	2
• Death	49,568	7
• Retirement	16,217	4
• Redundancy	205, 026	35
• Housing Advance	64,415	30
• Transfers	5,492	5
• Education	547, 752	1,058
Total	1, 552, 770.	1, 463

Long wanem rot tru bai mipela ken helpim yupela ol memba?

Mipela iken helpim yupela ol memba long ol kwesten long NPF akaun bilong yupela, mekim senis long NPF akaun sapos yupela igat sampela nupela senis: Mipela tu ken helpim ol memba long hevi o kwesten ikamap widrowol aplikesen bilong hausng edvens, edukesen na refan bilong NPF seving bilong yu. Plis ringim dispela ol hotlain namba long helpim yu:

Service operator Phone Facsimile


- Mr Sibona Varo 325 9522 325 5503
- Ms Irene Kasnari 325 9522 325 5503
- Ms Delilah Naio 325 9522 325 5503
- Ms Cecilia James 325 9522 325 5503

Long ol kampani husat i gat kwesten long NPF, yupela ken ringim Ekting General Menesa, lan Tarutia long 323 5595 o salim pas long dispela email adres ian@daltron.com.pg

Ol kwesten long sait bilong NPF yet, yupela ken ringim Ekting Menesing Dairekta, Rod Mitchell long 325 8148 o salim pas long dispela email adres: mitchell@hotline.com

- Yupela ken lukim mipela tu long Website adres: www.npf.org.pg o
- Nau igat nupela taim long mipela ken helpim yupela. Nau mipela opim opis long

8.30am - 4.00pm long Mande - Fraide long kaunta sevis.



UN askim ol Israel na Palestain lida long stretim toktok

Wol na Yunaitet Nesens i wari long situesen long Midel Is, moa yet namel long Israel na Palestain na tu long Iraq. Long las wik tu, ol bin makim nupela presiden bilo g Midel Is. Em Ariel Sharon husat i kisim ples bilong Ehud Barak. Wantaim nupela Israel lida, situesen namel long tupela kantri i no gutpela tumas na hevi i wok long go nogut gen.

Taim Mista Barak i stap olsem lida, ol pis negosiesen namel long Israel na Palestain i bin orait bikos Mista Barak i bin save skelim gut tupela sait na wokim ol disisen. tasol wantaim Praim Minista Sharon, em i moa strik.

Nau Israel i putim ikonmik blokot long Wes Beng na em i hat tru long Palestain long kisim mani long karimaut ol wok bilong em.

Ol paitgrup tu long tupela sait i go het na long dispela wik, tupela man Palestain na wanpela soldia bilong Israel i dai. Namba bilong ol pipel long tupela sait husat i dai stat yet long mun Septemba taim hevi i go nogut em inap nau long 415.


Jenerel Seketeri bilong Yunaitet Nesens Kofi Annan i askin strong ol lida bilong Israel na Palestain bilong tokim ol lain bilong ol long stap isi na ol toktok long stretim hevi i ken go het gen.



Iraq: Wol i wari bikos Briten na Amerika i karimaut ea Reid



• Wanpela Palestain man i sori long ol lain bilong em we i bin dai long dispela wik i singaut long Iraq lida Saddam Hussein long wokim woa egensim Israel. Long antap em wanpela liklik meri Palestain we i bin kisim bagarap taim Briten na Amerika i karimaut ol ea straik long Bagdad long wiken. *Piksa i kam long Weekend Australian niuspepa.* Bihainim ol ripot olsem Saddam Hussein lida bilong kantri Iraq i wok long developim ol nuklia wepon, Briten na Amerika i karimaut ol ea straik long ol nuklia pawa plent long Bagdad. Dispela i mekim na wol i pret olsem bikpela hevi moa i ken kamap.



Goroka redi long kamapim strongpela kompetisen

SAPE METTA i raitim

GOROKA Amata Boksing Asosiesen (GABA) husat bai lukautim Nesenel Boksing Sempionsip dispela wiken i kam aut olsem ol i redi tasol long pait hat na traim long rausim sempionsip taitel long han bilong Bogenvil Boksing Asosiesen bilong Not Solomon provins.

Man husat i go pas long trenim ol boksa bilong Goroka, Connie Lahis (trena) na kosa Gibson Gipmai i tokaut olsem ol boksa i tren hat tru na ol i redi tasol long daunim ol arapela boksa long dispela wiken.


Trena Lahis na kosa Gipmai i gat strongpela tingting tu olsem sampela ol sinia boksa bilong tupela bai i ken kamaut wantaim ol gol medol na tu winim nesenel taitel insait long divisen bilong ol. Tupela i putim tingting long ol boksa olsem Teddy Butama (Bantamweit), Lee Peni (Fedaweit), Toksy Seteme (laitwelwa), John Bili (Laitweit) na Peter Ken (Flaiweit) long kamapim strongpela salens agensim ol boksa bilong ol arapela senta.

"Mipela i nogat wanpela hevi weit boksa tasol strong bilong mipela bai i stap insait long mak bilong 48kg na i go antap long 71kg. Nau yet ol boksa ya, planti long ol i yangpela na i no bin soim pes long ol boksing tonamen tasol ol i tren hat tru long las 8-pela wik na i luk fowat long kamapim strongpela salens insait long dispela nesenel sempionsip," trena Lahis i tok.

Em i tok dispela em i sans bilong GABA long statim gen boksing long nesenel level long wanem dispela spot (boksing) i no bin go het gut long ol yia i go pinis insait long Goroka na tu insait Isten Hailans.

Nau yet GABA i makim pinis tupela sinia tim na tupela Novais (novice) tim. Sampela meri tu i stap insait long trening wantaim ol man na ol tu i ken i gat sans long pait insait long ring sapos ol arapela senta i kisim ol meri boksa bilong ol i kam.

GABA sinia tim 1 em - Rex Oapa (51kg), Teddy Butama (54kg), Lee Peni (57kg), Peter Ken (60kg) Toksy Seteme (63kg), Tuvire



• Ol boksa husat i tren hat tru long traim long rausim sempionsip taitel long han bilong Bogenvil Boksing Asosiesen taim ol i salens wantaim ol arapela boksa long dispela wiken.

Simian (67kg) na Mathew Yawe (71kg).

na sinia tim 2 em - David Tom (51kg), Seva Laki (54kg), Peter Thomas (57kg), Ahe Waho (60kg), John Bili (63kg), Simian Mongai (67kg) na Steven Elias (71kg).

Novais tim 1 em - David Peni (48kg), Brian Famundi (51kg), Carl

Ekena (54kg), Paul Nemese (57kg), Bobby Toby (60kg) na Amos Eri (63kg).

Novais tim 2 em - Jayjay Riho (54kg), Norihane Rex (57kg), Joe Joshua (60kg), Spid Asoi (63kg) na Robinson Koro (67kg).

GABA i tok amamas tu long lokol bisnisman, Robin Essano husat i

papa long Atape Motors long kamap na donetim moa long 30-pela 'T'-siot i go long ol boksa na opisel.

Mista Essano em i vais presiden bilong GABA na tu em i provinsel tonamen dairekta.

Em i singaut strong na apil i go long ol arapela bisnis lain long Goroka long kamap na givim ful sapot long hom tim.

Mista Essano i tok GABA i bin salim ol pas long ol bisnis haus long Goroka tasol ol i kamap wantaim sampela bekim yet.

Em i tok ol yangpela boksa ya i karim nem bilong Goroka na Isten Hailans olsem na ol bisnis lain long Goroka na Isten Hailans i mas kamap na sapotim ol so ol i ken redim ol yet gut na tu helpim asosiesen long stretim ol haus slip, trenspot na kaikai samting bilong ol arapela lain boksa husat bai kamap long dispela tonamen.

Ol senta husat bai tekat long dispela tonamen em ol lain husat i holim nesenel taitel - Bogenvil, Rabaul, Lae, Pot Mosbi, Simbu, Mt Hagen, Wau/Bulolo, Ramu na Kainantu.

Volibal statim pri-sisen

VOLIBAL RIPO

MADANG Volleyball Association (MAVA) i statim pinis pri-sisen bilong en long las Sarere. Ol pri-sisen pilai i bin kamap long Laiwaden Spots oval.

Pri-sisen kompetisen ya i pulim 10-pela tim olgeta na ol i kam kirapim das. Planti nupela tim bilong ol asples arere long Madang taun i bin kamap wantaim ol tim olsem Riwo klab. Riwo em i sempion tim bilong ol man long las yia i putim tupela tim olgeta na resis pinis long las Sarere.

Tupela moa nupela tims husat bin kamapim strongpela pilai em ol lain manki bilong Pot Mosbi, Raukele na Malabor. I gat bilip olsem dispela tupela tim ya bai wanpela hatpela tim tru long winim ol insait long dispela yia.

Mamba bilong Madang na Patron bilong MAVA, Hon. Jacob Wama i bin opim dispela pri-sisen long Sarere. Moa long 100 pipel, pilaia na sapota i

bin witnessim dispela opening.

Mista Wama i tokim ol lain bilong volibal olsem taim em kirap yet olsem Patron bilong Madang volball, em bai givim yet bikipela sapot na helpim i go long asosiesen long ronim olgeta wok bilong insait long dispela yia. Wankain sapot olsem las yia bai stap yet inap taim em i lusim sia bilong en olsem MAVA Patron.

Long las yia Spot Opis bilong mamba i bin givim sampela helpim we i bin helpim MAVA long salim ful Madang skwat i go pilai long Nesenel taitel long Pot Mosbi.

I gat bilip olsem dispela em i wanpela bikipela skwat tru long makim wanpela senta insait long volball sempionship. Planti bilong ol skwat mamba nogat wok na ol i gat bikipela amamas tru long mamba long helpim ol i go long Mosbi na lukim siti bikos planti i no bin lukim Mosbi long laip bilong ol. Tupela bikman bilong MAVA Willie Bagore na Steven Kadam i makim maus bilong asosiesen

na tok tenk yu long mamba long soim sapot long volibal insait long Madang MAVA tu bai holim Patron (Wama's) Kap resis. Tupela bikman Bagore na Kadam i singaut nau long ol tim husat i laik pilai i mas kam na rejistarim tim hariap. Tupela i tok i nogat tambu long ol lain insait long distrik long kam na pilai tu bikos bungim olgeta em i we bilong developim volibal insait long taun na distrik tu.

MAVA tu nau i wok long redim sempionsip bilong namba 5 Momase Coca Cola Risinel volibal Sempionsip we Madang bai holim gen long namba 2 taim long Jun (Queens' Birthday). Tupela bikman Bagore na Kadam nau singaut long Wewak, Aitape na Vanimo long kam na pilai tu bikos dispela 3-pela senta i bin no kamap las yia. Nau yet em AXIL tim bilong ol manki Nazab i stap olsem sempion bilong man insait long Momase na Huon Galp em i sempion tim bilong ol meri.

Malangan i soim pawa long Goroka

SOFBAL RIPO

DIFENDING sempion Malangan i soim arapela tim olsem ol i gat tingting yet long winim bek taitel taim ol i waraim stret ol lain Brown Eagles 24-3 long sofbal resis bilong ol man long Goroka. Gem bilong ol ya i kamao long Nesenel Spot Institut.

Ol Malangan i mekim save long ol laing Matupit bihain long bikipela ren i kamdaun long namba tri ining.

Dispela win em olsem kompensesen bilong han bilong lapun ketsa Likut Stokitale husat i no holim gut bal bilong pitsa Apelis Mapua. Klab dokta Sibok Selan i stapim Likut long noken pilai inap 6-pela wik i pinis.

Dispela nau i givim sans long yangpela Bobby Buburu long pilai insait long fainel. Brown Eagles i lus bikos sampela ol biknem pilaia i no stap. Kosa na pilaia

Sebby Womola i no pilai bikos wanpela lain long famili i dai. Kepten bilong ol Ivan Tamenao na John Womda i no stap.

Na arapela gem namel long Karanas na Lopi Brothers i dro long fultaim 2-2. Dispela gem i mekim planti ol opisel na pilaia i ges husat tru bai winim gem.

Wanpela olupela pilaia bilong Goroka Lahanis Martin Wilson i wok long kamapim nem long paitim bal bilong sofbal. Em i go pas long ol lain biknem pilaia olsem Vincent Moani, Amos Kaminie, Amos Kassin na Gaulim Kaminie Tags.

Na insait long narapela gem, Gazelle autim Burma Hawks 9-6. Olgeta gem bilong ol meri i no kamap bikos long ples i bagarap.

Poin i sanap olsem Malangan 18, Lopi Brothers 14, Brown Eagles 11, Karanas 6 na Burma Hawks 6.

Unicats sekim NGI

POST Unicats i mekim save long biknem tim, Coca Cola NGI 10-5 insait long priliminari fainel bilong wimens sofbal long Mt Hagen las wiken. Dispela gem ya i kamap long Gomis oval.

Difending primia, Unicats i soim pawa bilong ol long winim dispela gem. Ol i putim ol yangpela pilaia we tupela i kamap ples klia olsem gutpela na namba wan pilaia insait long dispela gem. Tupela yangpela ya em Rose Jerry na Lynne Marudi.

Tupela tim wantaim i pilai strong tru na nogat wanpela skoa i kamap insait long namba wan foa ining.

Lynna Kami bilong NGI i brukim kiau long namba six ining taim Gumini Koroka i painim wanpela gutpela bal long kisim em i kam hom.

Taim bilong Unicats bet, ol i no paitim gut bal. Maski planti ol pilaia bilong ol i stap long bes, nogat wanpela bilong ol i kamap long hom bes long skoa.

Naomi Norlick i kam

hom taim senta outfil bilong Unicats Esvin Jerry i no stapim graun bal na em i go sanap long namba tu bes. Orait em i kam hom taim Tigel i paitim bal. Maggie Wak tu i kam hom taim Lynne Maradi i no pits gut na ketsa Fidelma Siddy i no holim bal. NGI nau i go pas 4-0.

Unicats stat long skorim poin. Namba wan poin i kam long Rona Maradi long mekim skao i luk nais 4-1.


Kosa bilong Unicats Mistil Jerry i mekim sampela senis long outfil. Dispela senis i karim kaikai taim ol i skorim 9-pela ran na winim dispela gem. Ol lain i skorim ran em Rona, Nancy, Regina, Esvin, Georgina, Janet na Rose. NGI i skorim wanpela ran tasol i kam long Gamini Koroka.

Fainel skoa i sanap 10-5. NGI nau bai kamdaun na bungim Malangan long lukim sapos em i gat sekens sans long bungim Unicats o nogat.

Insait long gem bilong ol man, Brown Eagles autim NGI.



IKEN WOKIM GUTPELA SAMTING LONG YU



• Ol boksa bilong Goroka husat bai soim pes long Nesanel Boksing Sempionsip long Goroka long dispela wiken. Poto: SAPE METTA.



• Judith Sauto bilong NBC i laik rausim bal egen-sim ol meri NAQIA long Pablik Sevan soka resis. Ol susa long NBC win 2-0.



• Pablik Sevan netball kompetisen long Sarere. Golkipa bilong Difens Misis Keapu (GK) i painim hat na lukluukk long rua tim i skoa.



• Fulbek bilong Pangtel i laik rausim bal long straika bilong Difens (14) long Pablik Sevan wimen soka resis. Difens i win 1-0. Lephon: Wanpela pilaia bilong B Bears i tanim lek taim em i abrus long ketsim bal egensim MSC long Pot Mosbi men sofbal resis. Bears i win.

Goroka redi long holim intanesenel gem

RAGBI LIG RIPOT

NUPELA presiden bilong Goroka Ragbi Futbol Lig (GRL) Pat Siwi i kisim bikpela tok amamas i kam long ol sapota bilong ragbi lig.

Taim em i kisim opis, em i no wes-tim taim long stretim Sir Danny Leahy oval we bai holim sampela ol bikpela intanesenel gem long dispela yia, na tu 2001 SP Kap ragbi lig resis.

Pat Siwi husat i wok long helpim

keateka edministreta Lawrence Acanufa amamas tru long driman bilong em karim kaikai. Em i planim gras long ples pilai na mekim em i kamap gut tru.

Sir Danny Leahy oval nau i gat gutpela ples pilai bihain long bikpela wok ol i mekim long stretim fil.

Siwi i tok ol i save katim gras tupela taim long wik na dispela i mekim ples i gutpela stret long pilai. Ol mama i save go raun long fil long kamautim ol gras nogut na larim ol gutpela gras tasol i stap.

Nupela presiden i tok em i gat bikpela laik tru long holim dispela tupela bikpela intanesenel gem namel ong PNG Kumuls na French Roosters.

Em i gat bilip olsem Goroka bai holim planti SP Kap long wanem Mt Hagen Rebiatul oval tu i bagarap. Na tu Goroka i stap namel, planti ol senta bai makim yet Goroka long ples bilong pilai.

Mista Siwi i tok ol klab bai kisim helpim long nupela "rebate" sistem. Na em i apim fi bilong ol pilaia long

K2. Nau ol i surikim pe bilong afil-iesen i go long K1000 long wanwan klab. Bipo ol klab i save baim K750.

Em i singaut i go long olgeta klab long bihainim rul na baim ol fi bilong ol. Olgeta klab bai statim trening bilong ol neks wik.

• Nowek Royals nau i askim olgeta nupela na olpela pilaia long kamap long trening long Pis Pak.

Presiden Tony Wagambie i askim ol pilaia long lukim hetkosa Joe Lumaris na tu Peter Danga long rejistresen bilong ol.

Taekwando holim resis bilong Presiden Kap
TAEKWANDO RIPOT

REBEL taekwando asosiesen, Papua Niugini Taekwando Council (PNGTC) bai go pas long holim taekwando salens bilong Presiden Kap long dispela wiken long Sir John Guise stadium.

Ol ogenaing komiti i tokaut olsem dispela resis bai pulim ol paitman i kam long Goroka, Mt Hagen, Lae, Rabaul, Buka, Sogeri, Rigo, Kikori na tu Pot Mosbi.

Komiti i askim ol lain paitman husat i laik givim nem long stap insait long resis bilong Presiden Kap i mas givim nem. Nominesen i no pas yet.

Rejistresen na skel bilong ol paitman bai kamap long Fonde na Fraide long Sir John Guise stadium.

Sampela ol biknem paitman bilong taekwando insait long kantri bai kamap long soim stail bilong ol olsem Simon Ohue, Raymond Kaola, Andrew Stone, Nelson Stone (Pot Mosbi), Mek Wilson, Steve Pia (Goroka), Abel Nakin, David Wallace (Buka), Danny Uounne, Desmond Sam (Sogeri), Peter Toua (Kikori), Kiragu Raka, Teddy Babona (Rigo) na Albert Deswin (Rabaul).

Fi bilong stap insait long dispela taekwando sempionsip em K30 long ol memba na K40 long ol lain i no memba.

Mazda wilwilim Admiralty

POM WIMENS SOFBAL RIPOT

MAZDA Carps i soim tru strong bilong ol taim ol i wilwilim Admiralty 5-0 long primia gem bilong wimens sofbal long Pot Mosbi.

Dispela em wanpela primia gem tasol long wanem ol i no bin pilai long Januari 3.

Mazda i statim gem wantaim gutpela poin i kam long Selina Karai taim Pauline Wakit i paitim wanpela gutpela bal.

Helen Singiat i paitim bal na givim stret long pitsa bilong Admiralty Pat Iwaroi. Orait Wakit i kam paitim bal na winim namba wan na namba tu bes.

Emma Kalas i wokabaut i go long namba wan bes, Alice Kalas i paitim bal i go long Gloria Mattes na sanap long namba wan bes na Wakit i aut.

Tu daun nau, Alice Kalas i kam rekotim namba tu ran bilong em taim Dorcas Horris i paitim wanpela bal i go long autfil.

Shirley Taman i paitim bal tasol nogat wanpela skoa i kamap. Olsem na long namba wan ining, skoa i sanap 2-0.

Tripela beta bilong Admiralty i no skorim wanpela poin tu. Ol i bihainim rot bilong namba wan tripela beta long namba wan ining we ol i autim ol isi tru.

Mazda i no skorim wanpela ran long namba tu ining tasol long namba tri, mama Emma Kalas na pikinini, Alice Kalas, i kam hom.

Long pinis bilong namba foa ining, Selina Karai i skorim wanpela ran. Dispela gem i bin kamap gut. Mazda i tingting long win olsem na ol i no givim sans liklik long ol lain Admiralty.



• Susa bilong Sunkist ya i smail tasol tu leit. Meri nogut long namba wan bes bilong Dolphin i autim yu long B gret gem bilong Popt Mosbi wimen sofbal. Foto: HENRY MORABANG.

Hawks kirapim das long Bisini

POM SOFBAL RIPOT

HAWKS husat i wok long painim hevi long putim tim nau i soim pawa bilong em taim em i winim tupela gem long wiken, Sarere na Sande.

Long namba wan gem long Sarere, Hawks i wilwilim stret MSC 17-1 na long Sande, em i nekim Tisa Jets 10-5.

Klab ya, Hawks, i painim hevi long putim A gret tim. Olsem na ol eksekutiv i pasim tok long joinim Norths. Taim tupela tim i bung, ol i kamapim gutpela gem tru long winim tu poin.

Planti ol pilaia bilong Hawks em ol Norths pilaia long B gret. Ol olpela pilaia bilong Hawks i stap yet em Albert Baiiai na Sydney Wesley.

Elcom i mekim save stret long Manalos 8-4. Ol lain i skoa long Elcom em Edward Sena (2), Simon Daniel, Eddie Simba, John Campbell, Alistar Taval (2) na Isikiel Tovia jnr.

Olpela pilaia bilong Gazelle

Titus Kabi husat i save pilai wantaim Norths i mekim bikpela wok olsem kosa. Em i tok namba wan taim em i painim hat liklik tasol nau ol pilaia i save gut long ol yet.

"Em i no isi long lusim B gret kompetisen na kam antap long A gret long namel bilong sisen na kamapim gutpela gem, Kabi i tok.

"Mipela bai pilaiim gem bilong mipela. Mipela bai salensim wanem ol tim i kam na sapos mipela i winim arapela ol strongpela tim, em bai gutpela long strongim sans bilong mipela long neks sisen," kosa i tok.

Keta na pitsa bilong Hawks Eugene Lavutul na Patrick Tolom husat i kisim dispela wok i mekim ai bilong ol birua pilaia i op stret.

Infil tim bilong Hawks olsem Anton Joe, Fabian Tadoi, Brian Boze, Kabi na Baiiai i putim wanpela strongpela gem long stapim ol pilaia bilong ol birua tim long winim ol ya.

MSC wantaim nupela pitsa bilong ol i kam long Vulcan klab long Rabaul, Michael Warium i

no mekim gutpela wok. Pitsa tru bilong MSC Apisai Guguna i no kamap long sofbal fil long pilai.

AB Bears i amamasim kambek bilong tupela brata Chris na Joe Avuculas i tokaut olsem ol i gat namba yet taim ol i nekim MSC 13-5. Dispela win bilong ol em ol i bekim dinau bihain long NGI i wilwilim ol wantaim 17-3.

Pitsa bilong NGI Patrick Gili na ketsa bilong Nason Albert i wok long kamapim gutpela pilai stret.

Tupela gutpela pilaia bilong NGI Blaise Tatai na Blaise Paivu i lusim klab na stap nau long Lae. Ol i joinim Aviat klab.

Tasol ol arapela pilaia olsem Junior Ilikis, Alois Odis na Joe Laur i strong yet long mekim dispela tim i mas winim gem bilong ol.

Gazelle i dro tupela taim egen-sim NGI 4-4 na Jets 2-2. Dispela dro i soim olsem pawa bilong Gazelle i pinis nau.

Long bikpela gem long wiken, Brown Eagles i soim moa pawa long mekim save long ol yangpela pawa mangi long Elcom klab 9-1.

**WINIM
K100
PRAIS
MANI**

**PAINIM BAL
RESIS**

RUL BILONG PILAI:

1. Makim X long wanem hap long poto yu ting bal i stap.
2. Makim X long pen tasol.
3. Katim poto long sisos na salim long: PAINIM BAL RESIS, Wantok Niuspepa, P.O. Box 1982, Boroko, NCD.
4. Sapos moa long wanpela wina i makim stretpela hap bal i stap, em bai mipela putim long bokis. Na pulim aut wanpela wina tasol.
5. Las de bilong kisiem ol entri em 28 Febueri, 2001. Nem bilong wina long mun Febueri bai kam aut long Wantok bilong Mes 1, 2001.
6. Long Wantok bilong Mas 1, 2001 bai gat nupela K100 prais mani resis bilong Mun Mas. Bai gat resis bilong olgeta mun i go inap mun Desemba, 2001.
7. Disieen bilong komiti i makim wanpela wina em i fainel.
8. Wina bai kisim sek mani, na i no long kes.
9. Raitim nem na sdres bilong yu: **Nem**..... **Address**.....
..... **Kriemas**.....
10. Yu ken salim moa long wanpela entri, tasol noken yusim poto kopi.
11. Ol famili o pikinini bilong ol wokman meri bilong Wantok i no inap stap insait long dispela resis



PORT MORESBY WOMENS SOFTBALL ASSOCIATION

2000/2001 SEASON - Week 10 Saturday, February 24, 2001.

Diamond 3 09.00 B All Stars vs SP 10.30 A Chebu vs Admiralty 12.00 A Mazda Carps vs Norths 13.30 A AB Bears vs Wantoks 15.00 A All Stars vs Gazelle

Diamond 2 09.00 C Mazda Carps vs Tarangau 10.30 B AB Bears vs Wantoks 13.30 B Chebu vs Admiralty 15.00 B Tarangau 16.00 C Manolos

PORT MORESBY MEN'S SOFTBALL ASSOCIATION

Saturday, February 24, 2001. Washed Out - Round Two

Game 14 Diamond 1 12.00-13.15 B Gazelle vs B/Eagles 13.30-14.45 B MSC vs Kopex 15.00-16.15 B Bears vs Manolos

Game 16

Diamond 1 09.30-11.00 A NGI vs T/Jets 11.15-12.45 A Elcom vs Bears 13.00-14.30 A Gazelle vs MSC 14.45-16.15 A B/Eagles vs Manolos

Diamond 2 09.30-11.00 B Bears vs Norths 11.15-12.45 B MSC vs B/Eagles 13.00-14.30 B T/Jets vs Norths 14.45-16.15 B Manolos vs Gazelle

Diamond 3 09.30-11.00 C K/Kopex vs Aigobians 11.15-12.45 C NGI vs T/Jets 13.00-14.30 C Manolos vs Samurui 14.45-16.15 C Aigobians vs T/Jets

PORT MORESBY SOCCER ASSOCIATION

FKC CUP 2001 Saturday February 24th, 2001

Pool 1 ANZ University Babaka PS Kandibang Ela United Pool 2 Cosmos YM2 Mungkas Rapatona 2 Pool 3 BFW PS United J.KE Club HLB Pom United Gerehu 1 United

Pool 4 Rapatona 1 Dobo Futz Buresong LBC Defence Momase Women Pool Orogen BFW PS United ANZ University Cosmos Telikom

Bisini One 08:00 Pool 1 PS Kandibang vs Ela United 09:30 Pool 1 ANZ University vs Babaka 11:00 W Pool ANZ University vs Cosmos 12:30 Pool 3 HLB Pom United vs Gerehu 1 United 14:00 Pool 3 BFW PS United vs J.KE Club

Bisini Two 08:00 Pool 2 Rapatona 2 vs Mungkas 09:30 Pool 2 Cosmos vs YM2 11:00 Pool 4 LBC Defence vs Buresong 12:30 W Pool Orogen vs BFW PS United 14:00 Pool 4 Rapatona 1 vs Dobo Futz

Sunday February 25th, 2001

Bisini One 08:00 Pool 4 Buresong vs Momase 09:30 Pool 4 Rapatona 1 vs LBC Defence 11:00 W Pool ANZ University vs Telikom 12:30 Pool 3 BFW PS United vs HLB Pom United 14:00 Pool 3 J.KE Club vs Gerehu 1 United

Bisini Two 08:00 Pool 2 Cosmos vs Mungkas 09:30 Pool 2 YM2 vs Rapatona 2

11:00 W Pool Orogen vs Cosmos 12:30 Pool 1 ANZ University vs Ela United 14:00 Pool 1 Babaka vs PS Kandibang

NCD PUBLIC SERVANTS OFF-SEASON SOCCER

Round 12 Saturday, February 24, 2001.

Ground 2 08.00am M2 NCDC vs Air Niugini 09.05am W2 NCDC vs Air Niugini 10.10am M2 Works vs N/Parliament 11.15am W2 Works vs N/Parliament 12.20pm W2 PNGBC vs Pangtel 01.25pm M2 PNGBC vs Pangtel 02.30pm W2 Telikom vs BPNG 03.35pm M2 Telikom vs BPNG

Main Stadium 08.00am M1 Health vs Elcom 09.05am W1 Health vs Elcom 10.10am M1 Naqia vs Fisheries 11.15am W1 Naqia vs Fisheries 12.20pm M1 NBC vs Commerce 01.25pm W1 Transport vs Police 02.30pm W1 IRC vs NPF 03.35pm M1 IRC vs NPF

Sunday, February 25, 2001.

Ground 2 08.00am M2 N/Parliament vs Air Niugini** 09.05am W2 N/Parliament vs Air Niugini** 10.10am W2 DCA vs POSF 11.15am M2 DCA vs POSF 12.20pm W2 UPNG vs Pangtel** 01.25pm W2 Defence vs 1PIR 02.30pm M2 Defence vs 1PIR 03.35pm M2 UPNG vs Teachers

Main Stadium 08.00am M1 Naqia vs Health** 09.05am W1 Naqia vs Health** 10.10am W1 A/General vs Transport 11.15am M1 A/General vs Transport 12.20pm W1 Harbours vs Police 01.25pm M1 Harbours vs Police 02.30pm W1 Education vs NSO 03.35pm M1 Education vs NSO

** Washout Games Bye: Pool 1 Cellnet (men/women), NBC (Women) Pool 2 POSTPNG (men/women), UPNG (Women)

Points Ladder at Round 10

Pool 1 - Mens Team Gp W D L Gf Ga Pts NSO 9 7 1 1 23 11 22 Education 10 7 1 2 18 6 22 NPF 9 6 3 0 16 7 21 Cellnet 10 6 2 2 20 11 20 IRC 9 3 3 2 13 11 12 Harbours 10 3 3 4 13 15 12 A/General*** 9 3 2 4 12 11 11 Transport 9 3 1 5 10 11 10 Health 8 3 0 4 7 9 9 NBC*** 8 2 2 2 6 9 8 Fisheries 9 2 1 3 3 8 7 Naqia 8 1 2 5 6 13 5 Elcom* 9 1 2 5 4 12 5 Commerce 9 1 1 6 4 15 4 Police 8 0 2 3 0 6 2

Pool 1 - Women Cellnet 10 9 0 1 21 1 27 A/General 10 6 2 2 16 4 20 Education 9 6 1 2 14 5 19 Health 8 5 2 2 10 0 17 NPF 9 5 1 3 15 6 16 IRC 9 4 1 3 8 5 13 NSO 9 4 0 5 8 20 12 Harbours 10 3 1 4 5 8 10 Police 8 3 0 2 10 4 9 NBC 9 3 0 4 6 9 9 Elcom 8 2 0 5 4 11 6

Naqia 8 2 0 6 4 13 6 Transport 9 2 0 7 3 15 6 Fisheries 9 1 0 5 2 11 3 Commerce** (out) 9 0 0 7 0 14 0

Pool 2 - Men 1PIR - Taurama 8 6 2 0 12 3 20 UPNG 10 6 2 1 12 9 20 Teachers 9 5 3 1 15 3 18 PostPNG 9 5 1 2 17 8 16 BPNG 9 4 1 4 10 11 13 Telikom 9 3 3 3 14 12 12 NCDC 9 2 4 3 9 10 10 Air Niugini 8 2 2 1 9 5 8 DCA 8 2 1 3 3 3 7 POSF** 9 2 1 4 8 10 7 Works 10 2 1 3 4 8 7 N/Parliament 9 2 0 4 5 12 6 Pangtel 9 2 0 6 6 15 6 PNGBC* 9 0 1 4 1 8 1 Defence** 9 0 0 4 2 10 0

Pool 2 - Women Telikom 9 8 0 1 36 3 24 BPNG 9 7 2 0 21 2 23 UPNG 9 4 3 1 12 6 15 1PIR - Taurama 7 5 0 2 9 3 15 N/Parliament 9 4 0 2 7 4 12 NCDC 8 4 0 3 8 10 12 Works 10 3 2 1 6 2 11 Air Niugini 8 3 1 1 7 3 10 DCA 8 3 1 2 10 8 10 PostPNG 9 3 0 5 7 19 9 PNGBC* 9 1 0 5 2 16 3 Pangtel* 8 0 1 5 1 14 1 Defence** 9 0 0 5 1 13 0 POSF** 9 0 0 6 0 12 0 Teachers** (Out) 9 0 0 6 0 12 0

Note: Teams have been forfeited for non-payment or partial payment of Association fees.

** These teams did not gain any points because both teams forfeited.

* These teams have been forfeited and the points awarded to their opponents.

NPE's Points have been restored after proof that they have paid before deadline A/genl points after 19-Jan-01 have been restored.

Teams with asterics as being given the next two games to pay up else face the consequences as determined at last meeting.

Result for Round 4, 1PIR - Taurama vs NCDC (W2) was not available.

RESULTS

Round 11 - PSSA NBC drew Attorney 1-1 IRC drew Elcom 1-1 IRC defeated Elcom 2-0 Education lost NPF 0-1 Education lost NPF 1-2 Harbour defeated Fisheries (f/f) 2-0 NCDC drew DCA 2-2 PNGBC defeated 1-0 PNGBC defeated POSF 2-0 Works defeated PX 2-0 Works lost PX 0-2 Defence defeated Pangtel 1-0 Defence lost Pangtel 0-1

Health defeated Commerce 2-1 A/General drew Police 1-1 A/General defeated Police 3-1 Naqia drew NBC 2-2 Naqia lost NBC 0-2 Cellnet lost NSO 0-1 Cellnet defeated NSO 3-0

PostPNG lost Telstars 1-2 UPNG lost 1PIR 0-4 UPNG lost 1PIR 0-2 Telikom lost DCA 0-2 Telikom defeated DCA 7-0 BPNG defeated NCDC 2-1 NCDC drew BPNG 1-1

POMRFU statim pri-sisen long wiken

POT Mosbi Ragbi Futbol Yunion (POMRFU) bai statim Jim Fa'au pri-sisen bilong em long dispela wiken. Ol gem ya bai kamap long Taurama na Murray Bareks long narapela tripela wik.

POMRFU i save yusim Bava Park, em fil bilong nesene ragbi yunion bodi, PNG Ragbi Yunion tasol nau yet i save sampela bagarap i kamap long ples pilai.

I gat bikpela hul long sait bilong kapa banis we ol man i ken lukluk i go long ples bilong pilai. Dispela hul i bin kamap taim ol man i rausim kapa banis long Novemba long yia i go pinis.

Arapela hevi tu em taim bilong ren nau, ples bilong pilai bai bagarap olgeta.

Dispela em ples pilai bilong PNGRFU tasol ol i no mekim wanpela samting liklik. Na PNGRFU i save wokim mani taim POMRFU i yusim long holim ol gem bilong em.

Nau POMRFU i tingting long lusim Bava na go holim gem long ol arapela fil insait long taun, PNGRFL bai lusim bikpela mani stret.

I luk olsem POMRFU bai i no inap yusim dispela fil tasol bai i gat liklik agrimen we ol lai bai stretim wantaim PNGRFU.

Dispela pri-sisen em bilong ol klab i hatim skin long redi long sisen tru na tu painim husat pilaia i ken pilai long A gret. POMRFU bai holim yet wankain namba bilong ol divisen long dispela yia em A, B, Anda 21 na Anda 19.

Ol klab bai putim nem long tim em Dfence, Yunivesiti, Brothers, Harlequins, Wanderers, 1RPIR Taurama, Telikom, Royals na Finpac.

POMRFU bai holim Sevens kompetisen bilong em long Okotba we bai ran inap tripela wik olgeta. Namba foa wik em PNGRFU Sevens satellite tonamen.

Sports wishing to include their draws, points ladder and results must send them to: Sports Desk on Fax: 325 2570 or email: word@global.net.pg Attention: HENRY MORABANG.



LAIPSTAIL

Menyamyia stesin daunim Marawaka stret

NUPELA rifom o senis long provinsel na lokol level gavman i no kamap gut long Marawaka stesin insait long Isten Hailans provins.

Rot we i save go long Marawaka stesin i save go olsem long Bulolo Menyamyia rot. Long sait long Morobe provins. Dispela em bikos nogat rot i stat long haiwe insait long Isten Hailans provins i go olsem long Marawaka stesin.

Nau yet planti manmeri insait long Marawaka eria i no save amamas bikos ol gavman sevis long Marawaka i pundaun olgeta. Em i bringim bikipela sem tru bikos narapela gavman stesin we i stap klostu em Menyamyia i moa gutpela tru na planti gutpela sevis i wok long kirap. Tasol ol lain long "wan bus" long Marawaka i wok long go bihain tru long gavman sevises. Ol lida na provinsel gavman i no tingting long developim dispela stesin we bipo em distrik hetkwata bilong Obura-Wonenara. Nau yet planti ol gutpela haus bilong ol pablik sevans long Marawak stesin i stap nating tru. Sampela ol haus em ol wol na faibro i bruk nabaut. Haus bilong distrik komisina bilong bipo long taim bilong waitman taim i stap gut yet tasol i mas gat sampela meintenens o wok i mas kamap.

Wanpela man husat i go pas long Ogenik kopi developmen long Marawaka Simbari eria, Kaimi Warim i tok planti ol sevis em Marawaka i ken givim em provinsel gavman long Isten Hailans i rausim long ol. Dispela em bikos provinsel gavman i muvim distrik hetkwata bilong Marawaka i go long Kainantu.

Planti ol manmeri long Marawaka i no save amamas tru taim ol i laik bringim hevi bilong ol i go long distrik menesa long Kainantu. Dispela em bikos planti taim em i no save stap. Ol man long opis i save tok em i go long Goroka. Trangu ol man i save hat wok gen na baim PMV na go traim painim em long Goroka.

Ol pipel i save bel hat tru bikos planti taim ol i save tromoi mani long balus long go long Goroka o long Aiyura na bihain kisim ka gen i go long Kainantu na bringim hevi bilong ol i go long distrik menesa. Ol i tok olsem planti taim, taim ol i go kamap long opis long Kainantu distrik menesa i no save stap. Ol lain long opis i save tok "nau tasol em i kisim ka na draiv au!". Trangu ol pipel ya bilong rurel eria i save painim hat taim tru.

Ol visita o lain husat i laik raun i go long Marawaka bihainim Menyamyia rot bai gat sans long lukim wanem kain piksa i soim tru olsem narapela stesin i narakain na i moa gutpela long narapela. Planti lapun i save stori olsem

long taim bilong "kiap" insait long kolonial edministresin Marawaka i save stap wankain olsem Menyamyia. Ol waitman i bringim gutpela sevis na ples o eria long Marawaka i save klin tru. Planti taim balus i save karim moa saplai bilong stua, haus sik, skul na wok didiman i go insait long hap. Ol waitman na ol nesanel pablik sevans i save wok gut tru long bringim ol sevis i go long ol pipel.

Mista Warin i stori tu olsem Marawaka rot i go long Menyamyia i bin gutpela tu long dispela taim. Ol kiap i save tok hat long ol pipel na ol i save harim tok na wok. Tasol sori tumas, nau yet ol yangpela na ol man bilong Marawaka i stap long laik bilong ol yet. I nogat provinsel lida o distrik menesa i stap long go pas na tokim ol long mekim ol komyunuti wok.

Nau yet moa developmen long sait bilong kopi i wok long kamap long sait long Menyamyia long Morobe provins. Nesanel memba bilong ol Mista Thomas Pelika i givim na bringim planti gutpela developmen long Menyamyia stesin. Em i bring TV kebol hukap na gutpela komyunikesen long ol pipel bilong em.

Tasol turangu ol brata susa long Marawaka long sait bilong Isten Hailans i stap baksait yet. Masi olsem Marawaka eria em wanpela ples wantaim ol klostu ples olsem Simbari, Boiko na ol narapela haus lain i save saplain moa gutpela kwaliti ogenik kopi, turangu ol i no save kisim planti gutpela sapot tumas i kam long provinsel gavman na memba bilong Obura Wonenara.

Mista Warin i tok tu olsem nau yet Marawaka i gat sample ol samting olsem haus bilong ol pablik sevans na distrik menesa i stap. Ol i stap gut yet tasol liklik wok tasol bai i ken mekim ol i kamap moa gutpela long yusim. I gat gutpela helt senta na ples balus i stap we i givim sevises. Tasol nau yet menpawa o manmeri long wok i sot. Provinsel gavman i mas kamap wantaim gutpela tingting na yusim ol dispela samting olsem haus na ol samting nau yet i stap long Marawaka stesin.

Mista Warin i tok em i moa gutpela sapos provinsel gavman i muvim gen distrik hetkwata bilong Obura Wonenara i go long Marawaka. Dispela nau bikos Marawaka i save givim moa long Isten Hailans provins long sait bilong kopi prodaksin. Kwaliti bilong Marawaka kopi em i gutpela tru na planti long wol maket i save laikim. Ogenik kopi bilong Marawaka i putim nem Isten Hailans na Papua Niugini antap tru.

Sikawage maunten givim karamap long ren

NAU yet em taim bilong ren long planti eria insait long Papua Niugini.

Yes, ren i bringim gutpela na tu nogut bilong en long planti manmeri insait long kantri.

Planti manmeri insait long ol viles na haus lain long rurel eria i amamas bikos ol gaden kaikai ol i groim i kamap gut na dispela i min olsem planti kaikai tru bai ol i lukim long dispela yia.

Ren i bringim hevi tu long planti manmeri. Ren i mekim na ol bikipela wara i tait na brukim ol bris na pasim rot bilong ol manmeri long go long taun na siti. Ol manmeri husat i wok long taun na siti i bungim hat taim tu bikos ol i mas hait gut long ambrela na sanap long bas stop na wetim bas long kisim ol i go long wok. Planti taim ol gutpela siot na trausis bilong ol i save wet.

Ol manmeri na ol ka husat i save yusim Kundiawa Gembolg rot insait long Simbu provins, tu i bungim hatpela taim long taim bikipela ren i pundaun. Rot namel long Kundiawa na Mt Wilhelm hai skul i save wel na planti taim ol ka i save pas long ol bikipela baret wara. Graun tu i save wel na taia bilong ka i save wel tru.


Tasol taim ol manmeri i ron long ka yet lusim Kundiawa na i go kamap long ples Mindime long hap bilong Nilkande eria, ol i save yusim wanpela gutpela ples long hait na ren bai i no inap wasim ol. Dispela ples em wanpela bikipela maunten we sait bilong en i gat spes we ol ken sanap malolo. Dispela ples o nem bilong maunten ston ya em "Sikawage". Sapos yu wanpela nupela man o meri long raun long dispela rot bilong Kundiawa Gembolg bai yu poret stret. Dispela em bikos rot ya i stap sait na arere tru long maunten. Ol man bai poret tru taim ren na ka i ron bihainim dispela rot. Daunbilo long dispela rot bai yu ken lukim wara Simbu i ron i go daun.

Maunten bilong Sikawage we i sanap stret tru em save luk nais tru long taim bilong san na tupela taim. Bai yu ken lukim gutpela laip bilong rurel PNG stret. Sikawage maunten i save givim karamap na helpim long planti manmeri tu na ol ka na trak husat i yusim Kundiawa Gembolg rot. Taim ren i pundaun ol i save go hait na sanap aninit long Sikawage maunten. I gat hol o spes tu i stap we ol manmeri i ken sanap na



• Antap: Planti ol bikipela maunten long Simbu i gat ol keiv o hul long en. Planti ol stori tumbuna i save go wantaim ol dispela maunten.

Daunbilo: Sikawage maunten i givim karamap long ol dispela lain husat i yusim Kundiawa-Gembogl rot long taim bilong bikipela ren. Ol foto: Yames Kay.



tu wokim paia na hatim skin bilong ol. Spes i bikipela na ka tu i ken surik i go na stap hait na wara bilong ren i no inap pundaun antap long ka. Ol pipel i ken sindaun antap long ka na ren i no inap wasim ol.

Mi bin raun long dispela hap na wanem stori mi tok nau em wanem samting mi yet mi lukim long ai bilong mi. Olsem na mi ken tok olsem dispela hol o spes long sait bilong Sikawage maunten i save givim gutpela helpim tru long ol manmeri bilong Kundiawa Gembolg eria long taim bilong ren i pundaun. Sikawage maunten em ples we God Papa yet i kamapim long bipo yet.

I gat planti stori i go wantaim dispela maunten Sikawage. Wanpela lapun bilong nilkande eria, papa Gigmai i stori olsem bipo long taim bilong tumbuna yet, maunten ya i save givim planti helpim long ol manmeri husat i save wok- about long Gembolg i go

long Kundiawa. Taim ren i pundaun bikipela tru ol i save yusim ol spes insait long hol bilong maunten ya long hait na wetim ren i pinis. Taim ren i go bikipela o sukurim yet i go tulait ol manmeri i save slip insait long dispela hol bilong ston o keiv. Ol i save mekim paia wantaim ol paiawut ol i save karim wantaim. Ol i save kukim kaukau na kaikai na wetim ren i pinis.

Long namel long 1980s wanpela stori i kamap tu olsem sampela sumatin bilong Bembolg hai skul i bin bungim hatpela taim stret taim skul trak bilong ol i bungim hevi namel long Kundiawa na Nilkande. Graun i bin wel na rot i bagarap stret na taim ol sumatin ya wantaim draiva na wanpela tisa bilong ol go kamap long hap rot klostu long Sikawage maunten olgeta i pasim tok na orait long ol i slip long hol bilong ston ya long Sikawage na wetim ren i pinis. Ol sumatin i no wari long rausim ol skul saplai

long ka. Ol i kisim bek na klos bilong ol tasol na go.

Turangu ol sumatin ya wantaim tisa bilong ol i surikim ka i go arere stret long keiv (hol bilong maunten) na ol i slip. Long nait ol i bin mekim paia na kukim rais na tinpis we em skul saplai. Ol i bin stap gut tru i go inap tulait taim ren i stop na ol i go. Dispela i soim bikipela helpim Sikawage maunten i givim.

Stori bilong Sikawage maunten i gat planti hap hap bilong en. Sapos yu laik lukim dispela naispela maunten yu ken go tasol long Kundiawa na bihainim tasol Gembolg rot. Dispela rot i ken bringim yu i go long ol naispela ples insait long Gembolg eria. Yu ken lukim tu bikipela maunten insati long Papua Niugini na Saut Pasifik rijon. Maunten ya em Maunt Wilhelm. Yu bai gat sans tu long lukim ol traut pis fam em wanpela lokol meri i ronim. Fam ya i stap daunbilo long Maunt Wilhelm.

LAI PSTAIL

Diwai wokman pinis wok bihain long 50 krismas

Dispela em stori bilong wanpela man, Alan E. H Ross husat i wok wantaim pabliks sevis insait long PNG moa long 50 krismas olgeta. Hatwok bilong em i lukim planti ples we gras i pulap i kamapim planti diwai. em i helpim long planim diwai long mekim ples i luk gut. Em bin kam long 1951 na pinis wok long Januari 31, 2001. Wok bilong em i kisim em i go long olgeta hap bilong kantri na dispela em stori long wok em i bin mekim:

"WANPELA taim mipela flai long wanpela liklik balus long go wok na dispela balus i kres na pundaun tasol mi o ol narapela manmeri mipela i stap long balus wantaim i no kisim wanpela bagarap.

"Taim mi kamap na kisim wok wantaim Forestri Dipatmen long 1951, ol i salim mi i go long Bulolo. Mi bin helpim long sanapim nambawan pain diwai plentesen long hap.

"Mi bin helpim na lukluk raun long wanem kain diwai i save gro long Bulolo na Wau. I bin hat tru long kisim olgeta ripot long ol dispela dei bikos mipela i nogat helikopta long ol dispela dei. I save hat tru long mipela luksave long wanem kain diwai i stap na long wanem kain ples tasol mipela save hatwok stret. Ol samting olsem kompyuta na setlait we i mekim wok isi nau i no bin stap long dispela ol taim.

"Mi save laik long tingim bek olgeta patrol mipela i save mekim i go olsem long Sepik Wara long dispela taim. Dispela taim mipela luksave long wanem kain diwai mipela i gat bilong salim na narapela samting bilong bus.

"Long 1953, ol bos i muvim mi i go long Kerevat Fores Stesen klostu long Rabaul. Mipela bin karim aut nambawan wok painmaut long wanem kain timba i stap long Trans Kerevat. Mi stap wan yia olgeta long hap na helpim ol man long planim tik na kamarere diwai.

"Mipela i bin traim planim balsa. Nau balsa diwai i gro gut tru na karim planti mani na helpim ol manmeri long Gesel Peninsula.

"Bihain long tu yia, mi lusim Kerevat na kam bek long Bulolo Wau eria na kamap bos long lukautim ol man husat i laik painim aut moa long diwai long eria.

"Bulolo long dispela taim em ples bilong givim trening long ol man husat i laik kamap olsem Foresters o man bilong lukautim ol bus. Ol diwai long Bulolo Wau we ol i katim pinis na nupela ol planim em mipela i stat long plenim long dispeal taim.

"Mi i no bin stap long Bulolo tasol. Wok bilong mi save kisim mi i go olsem long hailans olsem Maunt Hagen long Jimi River, Okapa, i kam i go long Wes Nu Briten long Kandrian, Sag Sag, long Wes Kos na i kam olsem long Aria River na Talasea. Mipela i bin wanpela nambawan man bilong wok wantaim diwai husat i bin go insait long dispela ol eria.

"Bihain long ol dispela de, ol i salim mi i kam wok long Lae. Mi bin trenim ol man husat bai helpim long lukautim ol diwai na mekim wok painim aut. Mipela save makim ples bilong katim diwai bikos Lae i kamap bikpela na plan-



• Man husat i putim planti krismas bilong wok i go insait long Forestri insait long PNG. Alan E. H Ross. Em i ritai bihain long 50 yias.

ti somil i kamap long dispela taim.

"Mipela traim tokim ol manmeri long ples olsem Omsis-Gabensis, Wambit, Yalu, Bususanwep na bihain Kui Paiawa na Maiama long Morobe kos. Dispela wok i mekim na mipela kamapim timba raits bilong Gogol Veli long Madang distrik. Dispela em bipo lon helikopta de na mipela save wokabaut raun long stretim ol dispeal samting.

"Long Ogas 1963, ol i tokim mi long lukautim Goroka opis olsem OIC long tripela mun tasol abrus na mi stap long hap inap long 8 na hap yia olgeta.

"Mi yet save ting olsem ol dispela de mi bin stap long Goroka i moa gupela tru long ol narapela de mi save go long narapela hap long en na mi save amamas taim mi tingim bek ol dispela gupela taim.

"Olsem OIC bilong Goroka, mi save gat planti wok tru long mekim. Mipela sanapim diwai plentesen, toksave long ol manmeri long wanwan viles long wanem samting ol i ken mekim wantaim timba bilong ol, toktok long skul, pablik ples, stretim wok bilong so mil, salim tok i go long gavman dipatmen na tu askim na kisim helpim long gavman.

"Bihain long 1960, ol narapela sku manmeri long fores na diwai i kam aut long Bulolo Forestri Koles tasol bipo long dispela mi wanpela tasol i save liklik long Forestri na mi stap long Goroka. Bihain ol surikim opis bilong forestri i go long Mt Hagen.

"Ples mi lukautim long dispela taim em bikpela tru bikos mi lukautim Isten Hailans, Simbu, Westen Hailans na Enga Distrik tu. Taim ples balus na rot kamap, mi bin helpim long Sauten Hailans distrik tu. Mi bin stap na luksave olsem ol nambawan diwai bilong karamapim gras i kamap long Asaro Veli. Taim mi lusim Goroka long 1972, mi bin amamas tru long lukim olsem bikpela diwai plentesen tru i sanap long dispela gras len nating we nogat diwai bin sanap. Em long Trans Asaro Veli.

"Laipegu Forestri Stesen tu i bin kamap long dispela taim na mipela wokim haus bilong ol opisa long dispela taim. I bin hat tru long planim diwai long mauten nabaut long dispela taim.

Em bin hat tru long kalapim ol

nis man bilong diwai i no moa laik kam insait long kantri na sanapim bisnis. Mi stap insait long kamapim wanpela lo bilong foestri bisnis wantaim gavman long forestri industri long 1979.

"Long 1980, ol i givim promosen long mi na mi kamap olsem Assisten Dairekta bilong Ekonomiks long Hetkwata. Mipela i stap insait long wanpela bikpela projek ol i kolim long Vanimo Timba Projek. Dispela taim tu i lukim nupela forest polisis i go insait. Dispea em ol i putim tupela kampani bilong gavman tu i go insait na dispela em mi tu i stap wantaim na mekim.

"Mi wok na taim bilong fri, mi save stadi na mi kisim Mastas bilong mi long 1980. Bikpela toktok mi raitim em long wok bilong mi, mi lukluk long wanem rot gavman i ken helpim long kamapim Forestri Industri long kantri.

"Namel long 1970 o 1980, gavman i bin askim mi long kamap wanpela bilong tupela dairekta wantaim Gogol Reformation Kamapni (GRC). Long 1977, Jant, Japanese ikampani we i katim diwai ibin kamapim GRC long traim na planim nupela diwai long Gogol we olpela diwai em katim pinis long en. Dispela ol diwai em bai kamapim wudsip o pouda bilong diwai na dispal fektori bilong wudsip i sanap long Madang taun.

"Mi stap dairekta bilong GRC yet inap nau na ol dispela diwai mipela planim i nau helpim na saplaim olgeta diwai long wudsip fektori.

"Long 1984 mi muv i go long Fil sevis Brens husat i kisim hevi long wok bilong givim tok orait long ol man i ken katim ol diwai. Mi raun lukluk long kainkain timba operesen insait long kantri.

"I bin gat provinsi forest atoriti tu na mi givim edvais long ol long kainkain we bilong mekim wok bilong forestri namel long Nesenel na provinsi gavman. I hat long mipela lukluk gut long kainkain timba operesen insait long kantri bikos planti kampani tru i bin katim diwai insait long kantri long 1980. Namba bilong diwai ol i salim i go long narapela kantri i go bikpela tru long dispela taim. Mipela bin sot long wokmanmeri long dispela taim tu.

"Long 1987-1989 mi stap long trening sait bilong Trening Brens. Gavman i no save bisi tumas long trening tasol mi ting trening em wanpela gupela samting sapos gavman i tingting long lukautim olgeta gupela forestri prodak bilong em long kantri.

"Mipela kamapim planti samting long stretim tupela koles, Forestri Koles long Bulolo na Timba Industri Trening Koles long Lae.

"Forestri Industri long kantri bin kisim nem nogut taim ol kamapim wok painim aut na ol i tokaut long wanem samting i kamap insait long Forestri Dipatmen long dispela taim. Tasol bihain long dispela wok apinim aut, i bin gupela tru bikos planti senis tru i bin kamap bihain long dispela taim.

"Ol i kamapim wanpela ripot na tok dispela em ol nupela rul na mipela i bin wokhat tru long sanapim ol dispela lo. Mi stap inait long wanpela task fos husat i sti-

aim na givim gupela tingting long senis bihain long dispela. Mipela kamapim wanpela ripot bilong Forstri Minista bai givim tok orait long en.

"Wanpela bikpela samting insait long dispela nupela ripot em long lukluk na stretim olgeta wok bilong Forestri insait long kantri bai foestri industri i ken kamap aninit long wanpela bodi na stretim bai planti liklik komiti i ken kamap long ol wanwan provins. Ol dispela grup i ken kamapim ripot na salim i go long bod we bai lukluk long olgeta ol dispela ripot na menesim.

"Mipela raitim aut nupela Nesenel Forestri Polisi na Nesenel Gavman i bin tok orait long dispela lo long Julai 1990. Tasol bihain ol tok long olgeta manmeri bai save long dispela lo, mipela i tanim olgeta toktok.

"Mi sindaun na raitim aut wanem ol bikpela toktok i stap long Englis na mi sotim ol kamap isi long ol man bai i ken tanim ol dispela toktok long tok pisin na Motu wantaim. Mipela kamapim planti kopi bilong ol dispela toktok na mipela salim i go long wanwan provins bai olgeta manmeri i ken save long wanem lo i senis na sampela arepela toktok we i stap insait long dispela lo gavman kamapim.

"Aninit long dispela nupela lo, wanpela nupela bodi i kamap bilong luksave long olgeta wok bilong Forestri insait long kantri. 19-pela provinsi na kisim wanwan bod long ripot i go long Nesenel opis na ol i givim wanwan wok long olgeta ol dispela provins.

"Long nambawan bod miting bilong dispela grup long 1993, mi bin stap sekreteri inap long pinis bilong yia taim ol i makim nupela sekreteri long tekova long mi.

"Long Januari 1994, kontrak bilong mi wantaim Nesenel Forestri i pinis. Wok bilong mi em long lukluk long ol spesol projek. Wok bilong mi nau em long givim toktok long bos long mekim wanem na tu sampela taim mi save helpim em long wanem hap tingting na wokman i sot long Nesenel Forest Atoriti na tu lng wanwan provinsi komiti mipela sanapim long wanwan provins.

"Siks mun olgeta mi wok nating bipo long ol i makim mi kamap sekreteri gen bilong Nesenel Fores Atoriti long Ogas 1996. Insait long 1997 na 1998, bod i bisi tru na bin kamapim 8-pela miting olgeta insait long dispela sotpela taim tasol.

"Wok kontrak bilong mi pinis long Januari 31 dispela yia. Mi ritai long dispela taim. Long longpela taim mi wok wantaim Forestri insait long kantri, nau em i taim bilong mi long pinis na mi laik givim dispela wok i go long wanpela man husat i wok aninit long mi longpela na husat inap lukautim wok gut na i no mekim nabaut..

"Mi sindaun nau na mi save lukluk i go bek long longpela taim mi wok insait long Papua Niugini na mi save amamas.

"Mi bin amamsim laip bilong mi gut tru na mi no wari o les long wanem nogat wanpela samting i rong wantaim mi. Mi sindaun i stap na mi ken tok olsem mi bin amamasim stret laip wantaim Forestri insait long kantri," em i tok.



Skul liwa - traim mekim wok fama

• Wanpela bisnisan na lokel fama, Steven Pupune husat i papa long Blue Corner farm long Goroka, Isten Hailans wantaim meri bilong em Jenny i sanap namel long (wheat) gaden bilong tupela. Mista Pupune i bin kisim gutpela edukesen na em i wanpela saveman tasol em i no yusim dispela save bilong em long mekim wok long taun. Em i go bek long asples bilong em long Faniyufa na i mekim wok olsem lokel fama we em i lukim planti gutpela kaikai i kamap pinis na i wok long kamap yet long dispela wok. *Poto: Sape Metta.*

SAPE METTA i raitim

GNAMU Huki em i wanpela yangpela lokel viles fama long ples Kefamo arere tasol long Goroka, Isten Hailans provins.

Long ol yia i go pinis olsem wanpela yangpela man long ples, em i no save olsem gutpela kaikai na planti mani i save kamap long taim ol man na meri i save holim graun, digim na tilim long planim ol kaikai.

Taim em i mangi yet na i save i go long wanpela komyniti skul klostu long ples bilong en, Inamu i save lukim ol ples man na meri i save wok hat tru long wokim gaden na planim ol kainkain kaikai olsem kaukau, poteto, banana, tapiok, taro, kabis, kerot, kon, onion, pinat na ol arapela kumu na prut nabaut.

Sampela long ol dispela ples lain i wokim gaden long wanem gaden em i as tru bilong laip bilong ol we ol i save sindaun na kaikai long en. Na long ol arapela em i olsem rot bilong ol long painim liklik mani taim ol i save kisim ol kaikai ya i go long maket na salim.

Na dispela liklik mani i save helpim ol long baim ol kios, kerosin, sop na ol kaikai samting long stua.

Tasol long lukluk bilong Inamu, planti ol dispela lain i no save wok hat gen long wokim gaden bilong ol namba tu o namba tri taim bihain long ol i save kamautim ol kaikai long namba wan taim.

Inamu i tok taim ol lain ya i statim gaden, ol i noken stap. Ol i mas wokim gaden, planim kaikai, kamautim kaikai na planim gen ol

nupela kaikai sids.

Na dispela pasin bilong go het yet na wokim gaden na planim ol kaikai i noken stap. Sapos ol i yusim gutpela tingting na i mekim olsem, tru tumas, ol i no inap sot liklik long ol gutpela fres kaikai na mani tu," Inami i tok.

Em i laik surukim hap stori ya we em i laik bai sut stret long ol yangpela man na meri husat em ol skul liwa na i stap nating nau long lukim na traim long bihainim. Em i laik kirapim tingting bilong ol dispela lain yangpela manmeri na ol i ken traim long yusim han bilong ol na wok hat long kamap olsem ol lokel fama.

Taim Inamu i bin skul yet, em i save i gat dispela tingting na driman long kamap wanpela lokel

ol tingting nogut long mekim ol bikhet pasin long bekim bek bel hat bilong en long i no go long hai skul.

Inamu i skelim na i tok dispela tingting bilong kamap bikhet manki bai i no inap kamapim gutpela kaikai na sindaun long bihain, na tu em bai givim nem nogut long papamama na famili bilong en.

Na em i tingting i go bek long dispela tingting na driman bilong en long wokim planti gaden na kamap olsem wanpela lokel viles fama na tu long sem taim soim ol arapela insait long ples o ausait long ples olsem i gat planti sans long mekim wok i stap. Wok ya bai i ken kamapim planti gutpela kaikai na planti mani tu.

strongpela tingting long wokim gaden na tupela i givim han na i helpim em.

Bihain long 6-pela wik olgeta wok bilong klinim bus, digim graun na wokim baret i pinis na Inamu wantaim mama bilong en i stat long planim ol gutpela kain kaikai sids olsem kon, poteto, kerot, kebis, tomato na onion.

Inamu i tok em i bin yusim sampela kain stail bilong planim ol kaikai we em i bin lainim long wanpela waitman.

Em i tok long dispela nupela gaden em i bin digim 10-pela baret. Orait long fes tupela baret em i bin planim ol kon.

Bihain long tripela wik taim ol kon i groa, em i go long narapela tupela baret na planim ol poteto.

long skelim na planim ol kaikai olsem long ol baret long gaden, bilong ol dispela kaikai bai i no inap sot em bai i go het na raun olsem tasol. I nogat stap bilong en."

Em i tok em i bin i gat dispela tingting bilong planim ol dispela kaikai olsem poteto, kabis, kerot na onion long wanem ol dispela kaikai i gat gutpela maket bilong ne we em i ken salim na kisim planti mani.

Namel long ol yia stat long 1991 na i kam antap long yia 2000, Inamu i bin raun i go i kam long ol senta olsem Lae, Madang, Wewak na Pot Mosbi long salim ol fres kaikai bilong en.

Long kirapim tingting bilong ol yangpela skul liwa olsem em yet, Inamu i tok i nogat rong long ol i ken painim wok. "Sapos yupela i painim wok mani, yupela i ken go het na wok long wanem dispela wok tasol bai i ken helpim na lukautim yupela. Na yupela ol lain husat i no painim wok na i stap raun nating nau, ating em i moa beta long yupeal i mas i go bek long ples na wokim gaden na kamap olsem lokel fama long viles.

Em i mekim wanpela trupela tok piksa na i tok," man na meri husat i save wok, ol i ken kisim K250 long wanwan fotnait. Tasol tingim, sapos yu i ken taitim bun na wok hat long gaden na kamap olsem lokel fama, yu i ken kisim dispela K250 long wanpela de tasol taim yu salim ol kaikai bilong yu long maket."

Inamu i tok, "mi i save planim na groim ol kaikai long gaden. Long wankain pasin mi groim tu ol sevingis bilong mi long benk. Na yu?"

"Man na meri husat i save wok, ol i ken kisim K250 long wanwan fotnait. Tasol tingim, sapos yu i ken taitim bun na wok hat long gaden na kamap olsem lokel fama, yu i ken kisim dispela K250 long wanpela de tasol taim yu salim ol kaikai bilong yu long maket."

fama we em bai i ken wokim planti fres kaikai gaden na kamapim gutpela piksa long i go pas na soim ol ples lain man na meri olsem i gat moa wok i stap long graun na ol i noken kamap les man na meri long mekim wok gaden.

Bihain tasol long em i bin pinisim gret 6 skul bilong en long 1990, Inamu i bin i gat sans long i go long hai skul, tasol hevi bilong skul fi (papamama bilong en i no bin i gat inap mani long baim skul fi) i pasim em na em i no i go long hai skul long go het wantaim edukesen bilong en.

Long dispela taim em i no kisim

Wantaim dispela gutpela tingting Inamu i no westim taim. Em i kirap na yusim bus naip na sawol bilong papamama bilong en na i stat long klinim bus na digim wanpela hap graun we i stap baksait tasol long haus bilong en long Kefamo ples.

Papamama bilong Inamu i bin wokim tupela arapela gaden we ol i save kaikai long en. Na nau em i stat long wokim narapela gaden we i bikpela moa long dispela tupela arapela gaden.

Taim em i stat long klinim bus na brukim graun long wokim gaden, papamama bilong en i tuk-save olsem i tru, Inamu i gat

Na bihain ken long narapela tripela wik em i yusim tupela baret long planim ol kebis.

Inamu i tok insait long 6-pela mun ol kon i redi na em i kamautim. Na sem taim em i tilim graun na planim ol tomato na onion. Taim ol tomato na onion i stat long groa, em i muv i go long ol arapela baret na kamautim ol poteto.

Em i tok taim em i mekim olsem em i go long pinis bilong ol baret we em i wok long kamautim ol kerot na kabis, em i lukluk i go bek long dispela fes tupela baret, ol tomato na onion i stat long moa na i redi.


Inamu i tok," Sapos yumi go het



OPISEL LONS BILONG PRIVATAISESEN POLISI

Awenes em bikpela samting - Micah

Ben Micah - Eksekutiv Siaman



Mista Ben Micah

Mi gat bikpela amamas tru long welkamim yupela olgeta long dispela bung, we i bikpela samting long dispela komisin we mi go pas long en.

Dispela polisi na infomesen pepa awenes kempen i soim bikpela wok Gavman bilong Sir Mekere Morauta i givim na Komisnin i karimaut wantaim bikpela na strongpela laik tru. Komisnin kisim dispela wok wantaim luksave bilong kamapim gutpela ekonomik sindaun bilong kantri na ol pipel bilong em istap long fran.

Em i bikpela samting long Gavman, ol bisnis komyuniti ol arapela sekta bilong komyuniti na pablik olgeta i mas save gut olgeta taim long dispela wok na rot we praivetaisesen i wok long go long en.

Olsem na mi lukim dispela Praivetaisesen Polisi na Infomesen pepa nau mipela i soim we pablisiti na awenes kempen bai bihainim tupela wik bihain olsem em i bikpela samting tru. Taim Gavman i bin kamapim Praivetaisesen Komisnin, foapela bikpela astingting i bin kamap olsem bun bilong praivetaisesen program.

Ol dispela astingting em:

- Long kamapim gutpela mani long ol bisnis aset bilong kantri
- Long mekim ekonomi bilong kantri i kirap na wok gut
- Long kamapim nesnel fainensel kapitel maket na
- Long mekim ol PNG manmeri i stap insait long dispela praivetaisesen wok.

Yumi olgeta i klia olsem tingting bilong fainensel na kapitel maket, na rot em i save wok bihainim i no klia tru long olgeta pipel bilong mipela long PNG. Kain olsem, planti manmeri i no klia long wanem kain rot em Port Moresby Stock Market i save wok. Gutpela olsem wanpela skul nau kamapim Greduet Skul ov Menesmen long Nambawan Finance House i bin kisim dispela rot long wok bung wantaim RMIT Yunivesiti long Melbon Australia. Dispela greduet skul bai skulim ol manmeri

long pgram olsem sekuyuriti (olsem stok na sea), invesmen analis, treseri wok, benking na fainens. Dispela kain

kos i kamap long skulim save bilong ol PNG manmeri long stap insait long dispela kain wok bilong stok eksens na moa long fainensel na sekuyuriti maket.

Taim Mekere Gavman i bin laik lukuk moa long wok bilong praivetaisesen program, i bin gat planti paul toktok i kamap na tu i no tru olgeta long astingting na wok bilong praivetaisesen. Mipela i bilip ol dispela kain lain husat i wok long egensim tru wok bilong praivetaisesen i nogat bel long PNG. Mipela i ken skelim olsem toktok na tingting bilong ol em bilong ol yet na i bilong politik tingting bilong ol yet.

Morata Gavman i no pundaun long ol dispela kain salens bilong wanwan lain. Gavman i sanap strong long tingting bilong stretim na kirapim gut ekonomi bilong kantri na em i wok long go het yet wantaim tingting na plen bilong em na i mekim kamap ol bikpela na gutpela senis tru.

Mi pilim olsem em i gutpela pasin long olgeta olpela pipel bilong dispela kantri i kisim trupela na klia tingting na save long planti gutpela wok bilong praivetaisesen. Na tu mipela i no inap pret long tokaut long ol pipel long ol sampela bikpela hevi we inap kamap long dispela bikpela wok bilong stretim ekonomi bilong kantri.

Mi no bin askim tu long pasin bilong tok egens na salens long dispela wok long wanpela taim, tasol mi singaut long olgeta lain husat i makim wanwan seksen bilong komyuniti long wok bung wantaim na kamapim tingting wantaim long stretim gut ekonomi bilong dispela kantri.

Mi askim olgeta lida na mamba bilong wanwan wokas union, olsem ol lain i go pas long slet bisnis we i stap long plen na rot bilong praivetaisesen na ol non gavman ogenaisesen long wok wantaim Komisnin long stretim gut ol hevi na painim gutpela rot. Ol eria we tok paul i kamap i mas gat gutpela toktok bung wantaim i kamap long gutpela bilong kantri.

olsem ol rait infomesen i mas go aut klia long ol pablik bai wok bilong praivetaisesen i ken ron gut na ol pipel i ken amamas long astingting bilong praivetaisesen long em i ken wok gut long mipela na ol lain bilong yumi long bihain taim tu.

Sir, mi ken tok klia long yu olsem dispela tim mi go pas long en bai mekim olgeta wok em i ken mekim long

kantri olgeta. Bihainim dispela de bilong soim aut Polisi na Infomesen Pepa, Minista Vincent Auali na mi bai go raun long 6-pela mein senta tupela wik bihain long mekim wanpela wok bilong soim aut ol wok bilong awenes na kempen na bihain go long ol provinsal senta long namel bilong mun Mas. Dispela wokabaut em long mekim ol pipel i



(L-R) Minista bilong Praivetaisesen na Kopresen Hon. Vincent Auali, Praim Minista Sir Mekere Morauta, Eksekutiv Siaman Mista Ben Micah na ekting Manesing Dairekta Mista Joe Tauvasa.

Bikpela amamas tru long Praim Minista i kam stap tude na witnessim dispela bung na ol toktok we i kamap. Sir, kamap bilong yu tude i soim bikpela tingting bilong yu tu long lukim

kamapim dispela laik na plen bilong Gavman bihainim gutpela na klia rot, bihainim lo, wok bilong em i mas kamaut klia bai olgeta lain i luksave na i mas kirapim ekonomi bilong

klia tru long astingting bilong dispela wok bilong praivetaisesen. Long dispela yumi ken tok olsem dispela wok bilong praivetaisesen i kamap bihainim luksave bilong olgeta pipel.

Tauvasa givim ripot long praivetaisesen



Mista Joe Tauvasa

OLSEM Ekting Manesing Dairekta bilong Praivetaisesen Komisnin, mi amamas long tok tok long yupela tude na givim ripot long praivetaisesen program bilong ol gavman bisnis. Gavman na Komisnin i wok long wok hat tru long mitim dedlain bilong dispela praivetaisesen program.

I nogat wanpela arapela kantri long wol inap long kamapim dispela kain program.

Mi amamas long givim ripot olsem planti wok tru i kamap long ol mun i go pinis.

Ol prosek menesa bilong ol wanwan ol kampani we bai mipela bai praivetaisim i stap pinis wantaim tupela arapela speselist konsalten husat bai lukautilim probity na komyunikesen. Olgeta prosek menesa i statim wok bilong ol pinis na planti long ol i stap wantaim mipela tude.

Prosek Menesa bilong Telikom tasol ino stat wok yet.

Wok bilong praivetaisim tupela bikpela kampani, Papua New Guinea Banking Corporation (PNGBC) na Air Niugini i wok long go het na program bilong salim hap bilong dispela tupela kampani i klostu pinis nau.

Olgeta prosek tim i wok long wok hat long mitim dedlain bilong program.

Tupela les hap bilong program bilong salim PNGBC i redi na komisnin i tok orait long em pinis. Nau ol i wok long stretim wanpela infomesen memorandum bai i wetim tok orait bilong gavman.

Long Air Niugini, wok i ron gut na ol i wok long stretim ol ligel pepa bilong tok orait long salim hap bilong kampani.

Long ol arapela liklik kampani, prosek menesa David Drake bai i toktok wantaim Hargy Oil Palm, Ramu Suga na Cape Rodney Raba Esteit long tupela wik i kam.

Long ol arapela liklik kampani gen, tupela prosek menesa, Mike Maurer na Andrew Hynes i wok long mekim bikpela wok long Elcom, Waterbod na Eda Ranu. Ol i wok long redi long salim ol speselist man long statim wok long salim hap long ol dispela kampani tu. Long PNG Harbours Bod, prosek menesa Derrin Davis i stap wan wik pinis insait long kantri na em i tok amamas long wok menesmen bilong bod i mekim bilong redi long praivetaisesen.

Olgeta dispela ol wok praivetaisesen, probity edvaisa bilong komisnin i wok long lukaut long en.

Dispela gavman i tokaut pinis olsem dispela wok praivetaisesen bai ino nap long wok hat, em bai stap long ples klia bai pablik i ken lukim.

Dispela edvaisa, Zoran Radosevic, husat i wok wantaim wanpela bikpela kampani long Brisbane ol i kolim long Horwarths, i wok long putim was i stap.

Wok bilong em long -

- givim edvais long wok praivetaisesen;
- putim was long ol tenda proses; na
- putim was long ol lain husat i wok long praivetaisesen program.

Em bai lukluk tu long sileksen na iveluesen proses i mas ron gut;

- ol i mas skelim gut ol eplikesen;
- ol bisnis sekret i mas stap hat;
- ol man noken yusim dispela program long mekim moni bilong ol yet; na

• olgeta wok bilong program mas stap long fail. Mi wantaim Siaman i laik tokaut olsem bihain long program i pinis, dispela praivetaisesen program bai nogat korapsen, na ol man meri bilong PNG bai inap long amamas long dispela.

Namba tu samting mi laik toktok long em em Unit Trust.

Prosek menesa bilong mipela, Lawrence Hibbert i kamap long Pot Mosbi long wanpela wik i go pinis na em i wok long mekim wok bilong praivetaisesen i stap.

Mista Hibbert i bin pinis long praivetaisim wanpela benk bilong gavman bilong Albania long Balkans na em i gat bikpela save long helpim mipela long kamapim dispela Unit Trust.

Planti bilong yupela i save olsem dispela tras bai rot bilong ol pipel bilong PNG na ol arapela kampani bai inap long sevim moni insait long ol niupela kampani ol i praivetaisim.

Gavman bai putim olgeta sea bilong em insait long olget dispela kampani i go insait long dispela Unit Trust.

Dispela Unit Trust em as tru bilong holim praivetaisesen program bilong gavman. Dispela trust bai lukautilim moni bilong PNG insait long ol kampani ol bai praivetaisim.

Unit Trust bai nonap bringim tasol invesmen na mekim moni, dispela trust bai kamapim wanpela strongpela kepitel maket straksa.

Mista Hibbert i givim sampela gutpela tingting pinis na komisnin bai skelim dispela long Trinde. Minista Auali bai mekim tu wanpela anaunsimen long dispela bihain long dispela wik.

Sentrel Agencies Working Grup i wok long lukluk long lo bilong kamapim dispela Unit Trust na las wik tasol ol i givim mi long wanpela ripot.

Dispela ripot i soim olsem mipela bai mitim dedlain bilong mipela insait long dispela praivetaisesen program.

Mi wantaim mista Siaman i lukim olsem taim mipela i painim Septemba, mipela bai inap long givim veliu bilong ol dispela kampani bai ol i praivetaisim.

Minista Auali i amamas

Olsem Minista bilong Koprotaisesen na Praivetaisesen, mi amamas long Praim Minista i givim mi dispela potfolio bikos bihain long ileksen bilong dispela Gavman, mipela i mekim privetaisesen i kamap tru we planti krismas i go em i bin olsem wanpela tingting na planti politik toktok i save kamap long en planti taim. Mipela i mekim em i kamap tru na mipela bai mekim em i wok.

Gavman bilong Sir Mekere Morauta wantaim bikpela wok em i laik kamapim long mekim dispela i kamap gut bai sanapim strong bilong dispela kantri i sanap long en na go het bihain taim wantaim gutpela bisnis ekonomi bilong kantri.

Maski wanem kain toktok ol lain i save egensim Praivetaisesen i save tok, em i gutpela long ekonomi bilong kantri bikos sapos dispela i nogat, lukluk bilong kantri long bihain taim bai i no klia.

Gavman i mekim strongpela disisen long go fowet na em i laikim helpim bilong olgeta lain long mekim kamap gutpela senis insait long kantri we yumi i save laik kamapim bilong ol pipel bilong yumi. Taim dispela

OPISEL LONS BILONG PRIVATAISESEN POLISI



i kam long narapela pes

Minista Auali i amamas

Gavman i bin mekim dispela disisen long salim olgeta Gavman bisnis, mipela i bin mekim sampela bikpela senis i kamap long kamapim strong na rot we wok bilong praivetaisesen bai bihainim.

Larim mi tokaut long sampela bilong ol;

- Kabinet i makim Ben Micah olsem Eksekutiv Siaman bilong komisin hust i go pas long bod we i gat Seketeri blong Treseri Dipatmen, Atoni Jenerel, man we Minista bilong Koprotaisesen na Praivetaisesen i makim, mausman bilong PNG Samba ov Komes, Praivetaisesen Menesing Dairekta, Gavana bilong Sentrel Beng, Menesing Dairekta bilong Invesmen Promosen Atoriti, Siaman bilong OPNG Stok Eksens, Presiden bilong PNG Tred Yunion Kongres na Presiden bilong Publik Emplois Asosiesen.

- Wok bilong glasim na rivium wok bilong Fainens Pasifik Grup na putim kamap ol toktok na rot bilong salim ol wanwan han bilong em i pinis nau.

- Praim Minista na mi bin opim step 1 na 2 bilong praivetaisim Air Niugini. Deloitte Touche Tohmatsu, Ambidji Group Pty Ltd na Allens Arthur Robinson i mekim wok insait long dispela olsem edvaisa long sels bilong ol samting Air Niugini i salim.

- Komisn i makim Melbon kampani, Crawford and Associates olsem komyunikesen konsalten long givim edvais long Praivetaisesen Komisn long redim na givimaut ol infomesen long komyuniti long luksave long olgeta wok bilong praivetaisesen.

- Gavman i laik sanapim wanepla Yunit Trast, rot we ol wokman bilong ol Gavman bisnis bodi na ol pipel bilong Papua Niugini i ken invest insait long ol praivetais kampani.

- Wanpela eksperiens na biknem kampani bilong Brisben husat i save wok olsem Probiti Edvaisa bai wok insait long praivetaisesen wok long lukim olsem olgeta wok i kamap gut na stret na ol rekot bilong em i klia. Kampani ya em Zoran Radosevic bilong Brisben Chartered Accountants Howarth Pty Ltd.

Mi amamas tru long wok bilong PNGTUC na PEA insait long komisn na stap bilong tupela insait long ol toktok bilong komisn. Toktok na stap bilong tupela insait long bung bilong praivetaisesen em bikpela samting long kamapim tingting na maus bilong olgeta lain wantaim long dispela disisen.

- Kabinet i makim Sir Henry ToRobert olsem menesing dairekta bilong komisn we Joe Tauvasa i wok long holim posisen bilong em yet olsem ekting. Wok bilong menesing dairekta em long lukautim ol wok bilong mani insait long komisn



• Mista Vincent Auali

na makim ol wokman, lukluk long projek menesmen tim na ripot i go long eksekutiv siaman, komisn na NPC.

- International Advisory Group (IAG) we igat ol saveman bilong ovasis bai givim ol tok stia (edvais) long ol rot bilong karimaut ol wok na tokaut long wanem hap wok i go kamap long en wantaim program we i bin helpim Gavman long stat bilong dispela wok i kam.

- Kabinet i oraitim tu long kamapim Sentrel Ejensi Woking Grup we i gat dipatmen bilong Fainens na Treseri, Nesenel Plening na Monitoring na Tred na Indastri long kamapim banis bilong wok i ron insait na bihainim bilong ol publik entaprais husat i kisim luksave long praivetaisesen. Dispela bodi bai kamapim ol polisi we i sut long komyuniti sevis.

- Ol i makim tu ol projek menesa bilong wanwan eria long redim ol long dispela praivetaisesen. Ol dispela menesa em; Asia Pacific Centre for Aviation bai lukluk long Air Niugini, KPMG bai lukluk long PNG Benking Kopresen (PNGBC) Australia Power and Water bilong Elcom, Burns Bridge and Katalyst 21 bilong wara bisnis wantaim Eda Ranu na PNG Waterboard, D.C David bilong PNG Harbours Board, DFC bilong Invesmen Kopresen na ol yunits, na David Drake bilong ol liklik bisnis wok. Wanpela projek menesa bilong tokaut long ol sel bilong Telekom em ol bai makim bihain.

Olgeta lain ya em ol eksperiens lain wantaim save bilong mekim ol kain wok olsem long ol ovasis kantri na stap bilong ol insait long dispela praivetaisesen ekksesais long lukim olsem dispela wok i ron gut na kamap gut.

Dispela developmen wantaim moa senis we inap kamap bihain i soim olsem mipela i no toktok nating tasol. Morauta Gavman i sanap strong long wanem samting em i laik mekim na nogat wanpela samting bai stapim em long kamapim gutpela risa we i gutpela bilong kantri. Olsem Minista i go pas long dispela wok, mi tu i strong long dispela wok bilong kamapim gutpela risa.

Nau mi amamas long invaitim Praim Minista Sir Mekere Morauta i kam long dispela stat bilong dispela praivetaisesen ekksesais.

Sir Mekere tok amamas long praivetaisesen

OL man meri, dispela lons tude i makim narapela step ken insait long program bilong salim ol kampani bilong gavman.

Insait long dispela mun, gavman bai raun long kantri na eksplenim gut ol dispela polisi.

Komisn bai givim ripot tu long wok ol i mekim long dispela praivetaisesen program.

Ol dispela raun bilong komisn bai poromanim ol arapela program bilong tokaut long praivetaisesen bai tokaut stret long ol pipel long praivetaisesen program.

Praivetaisesen i wok long kisim bikpela sapat i kam long ol pipel na dispela pepa bai i stretim tingting bilong ol.

Mi laik toktok long wanpela samting long ol kampani mipela bai praivetaisim.

Planti man i gat rong tingting long ol dispela kampani aninit long praivetaisesen program. Planti long ol pipel i save lukluk olsem ol dispela kampani em bilong olgeta pipel long kantri. Tasol nogat wanpela bisnis em bai i stap long lukaut bilong publik.

Sapos yu lukluk long ol bisnis bilong ol dispela kampani, planti long ol ino mekim moni.

Ol sevises bilong ol dispela kampani em impoten samting. Ol sevis olsem komyunikesen, pawa, wara, ea trenspot, benk sevis na ol arapela.

Olgeta dispela sevis i stap long as bilong ekonomi bilong kantri.

Sapos ol dispela sevis i no ron gut, ekonomi tu bai nonap long ron gut.

Narapela rong tingting planti man i gat em long onasip bilong ol dispela kampani.

Tasol onasip ino namba wan samting. Pefomans bilong ol dispela kampani em bikpela samting.

Gavman i nap long stretim sindaun bilong ol dispela kampani, tasol publik bai nonap long amamas sapos gavman i mekim bikos ol teks bai i go antap, na prais bilong olgeta samting long stoa bai i go antap.

Long praivetaisesen, sevis long ol dispela kampani bai i wok gut tasol ol prais bai inonap go antap tumas.

Olsem na sapos pipel i laikim sevis bai gutpela, i mas gat senis. Em nau, onasip bilong ol dispela kampani bai kamap bikpela samting.

Sapos ol ona bilong ol dispela kampani ino nap long menesim gut, yumi mas senisim ol na kisim ol niupela lain. PNG i kamap long dispela stej long taim yet tasol mipela no save luk save. Nau mipela mas senisim onasip long gavman i go long ol praiwet sekta, na wanwan bisnisman.

Tasol bai inonap long senis olgeta, Papua New Guinea pipel bai gat sans olsem wanwan man or kampani o grup long gat liklik onasip long ol dispela kampani yet.

Long wanwan long ol dispela kampani ol bai gat kain kain level bilong onasip o sea bilong ol. Wanem kain sea gavman i holim, bai go long ol pipel bilong lukautim.

Mipela i mas statim wanpela Unit Trust bai i nap long holim ol sea bilong ol pipel. Olgeta bikman na meri bai i gat rait long baim i wok insait long dispela tras long ol diskaun prais. Ol pipel bai gat planti taim long mek yus long dispela rait bilong ol. Bihain long sampela yia i go pinis na pefomans bilong ol dispela kampani i gutpela, ol pipel husat i no bin baim ol yunit bai inap long benefit yet long ol dispela sea.

Long dispela we, bai i gat planti diskaun long prais bilong ol sea na bai kirapim tingting bilong ol pipel bilong baim sea insait long ol dispela kampani.

Planti pipel i gat tupela tingting long menesmen bilong dispela Unit Trust, olsem na ol independen lain bai lukautim dispela tras. Em bai inonap long stap aninit long lukat bilong gavman.

Ol pipel i gat rait long pret long mani bilong ol. Mipela lukim pinis long sait bilong ol kampani olsem NPF na ol lain husat i bin stilim planti moni long hap.

Praivetaisesen bai no inap long larim dispela kain pasin i kamap. Olsem na ino ol kampani tasol bai ron gut, dispela Unit Trust tu bai stap independen.

I gat wanpela probity ofisa to bai gat dispela wok long lukaut long ol paul pasin insait long menesmen bilong dispela program.

Dispela ofisa em gavman i kisim kam em i wok long wanpela bikpela akauting kampani long Australia.

Praivetaisesen i wok long singaut long ol bid bilong Air Niugini, na i lukluk long tokaut long husat tru bai i kamap pat ona bilong Air Niugini long pinis bilong dispela mun.

Klostu long 30-pela arapela ealain i luk olsem bai ol inap long bid bilong baim liklik hap long Air Niugini. Nau yet, sampela tasol i stap yet long resis bilong dispela.

Las wik tasol NEC i apruvim ol kondisin bilong salim Air Niugini.

Long Air Niugini, bikpela hap bilong onasip (51 pesen) bai stap bek long PNG. 49 pesen bai ol i salim long wanpela pasel seil i go long wanpela eksisting ealain.

Dispela niupela ealain bai i menesim Air Niugini tu. Na ol i mas inkrimis strong bilong bisnis bai i helpim ekonomi bilong kantri.

Dispela bai inkrimis tu velu bilong gavman seaholding.

Long bihain taim 30 pesen bilong Air Niugini bai i go long PNG gavman insait long Unit Trust na 5 pesen bai i go long ol Air Niugini wok manmeri. Ol dispela sea bai ol i salim long diskaun.

Insait long dispela seil, em polisi bilong gavman olsem nesaneliti bilong Air Niugini bai stap yet.

- Nem Air Niugini bai i mas stap;

- Ol hed ofis bilong Air Niugini bai mas stap insait long Papua New Guinea; na

- Bod bilong Air Niugini i mas gat planti PNG sitisen.

Gavman i luksave olsem planti manmeri i gat bikpela wari olsem praiwetaisesen bai stopim ol sevis i go long sampela hap. Dispela mipela luksave long em, na gavman i laik tok olsem aninit long praiwetaisesen, bai ol sevis bai i stap yet na bai mipela impruvim ol sevis.

Gavman i wok long wok wantaim Intanesenel Evaseri Grup long developim ol polisi bilong wan wan kes bai ol sevis bai ron gut bihain long praiwetaisesen. Fes step em mipela laik lukim olsem ol bisnis we ol i provaidim komyuniti na developmen sevis bai ron gut na ol i gat teknikal save long mekim wok bilong ol gut.

Mipela i save olsem mipela bai gat gutpela pawa, gutpela telefon na imeil sevis na baim mipela i gat gutpela benking sevis tu.

Ol dispela tasol bai givim bikpela samting i go long bisnis na welfe bilong planti pipel na bisnis invesmen.

Tasol mipela laikim olsem praiwetaisesen i mas mekim moa long dispela. Mipela laik lukim olsem ol niupela ona bai i wok aninit long givim sevis i go long komyuniti na ekspandim ol impoten sevis i go long ol pipel.

Air Niugini bai praiwetais nau na gavman



• Sir Mekere Morauta

i laik givim komitmen olsem ol dispela eapot we Air Niugini i save pundaun long em bai i sef na bai ol i mentenim.

Air Niugini, bihain long ol i praiwetaisim, bai i kompit wantaim ol arapela ealain na bai em i mas givim ol gutpela prais bilong sevis bilong em tu.

Long sait bilong PNGBC, kompetisen bai lukautim ron bilong PNGBC long ol bikpela taun, tasol long ol liklik ples, mipela bai lukluk long holim ol sevis i go long olgeta hap bihain long praiwetaisesen.

Gavman i luksave olsem benk netwok bilong PNGBC em wanpela impoten developmen eset.

Kontrak bilong seil bilong PNGBC i bai lukaut long givim seim sevis nau ol i wok long givim long ol liklik ples.

Gavman bai givim kompensesen i go long PNGBC long givim sevis i go long ol liklik taun.

Dispela bai helpim sevis bilong benk na kamapim ol niupela brens.

I laik olsem bikpela developmen bai kam taim ol sevis olsem pawa, komyunikesen wara na ol arapela yutilitis bai i ron gut.

Long ol yutilitis, gavman i nogat gutpela teknikal save olsem na ol seves long ol yia i go pinis i no ron gut.

Praiwetaisesen bai strongim menesmen, teknical na fainensel kepesiti bilong ol yutilitis.

Gavman i laik luksave olsem ol sevis bilong pawa, komyunikesen na ol arapela sevis bai i go long ol ples i nogat. Mipela bai mekim dispela long wanpela Furel Infastraksa Fan.

Dispela Fan ba kisim kontribusen long baset. Takis bai kam long ol yutilitis bihain long praiwetaisesen i strongim gavman bilong putim moni long sait bilong developmen. Gavman bai putim wanpela askim i go long intanesenel komyuniti long ol kontribusen bilong dispela Fan.


Fan bai stap independen na ol politisen bai inonap long bagarapim. Bai i gat lo long lukluk long developmen long moni bilong Fan.

Mipela i amamas long lukim komyuniti i kam insait long dispela program bai i ken stopim ol politisen or ol narapela publik seven long kam na yusim publik ofis long stilim moni.

Moni gavman bai kisim long praiwetaisesen bai i go long stebelaisim baset na fainensel sistem. Mi tok pinis olsem dispela stebelaisesen em impoten long kamapim gutpela developmen.

Em dairek eim bilong gavman bilong me. Praivetaisesen bai pinisim pasin long yusim ol gavman bisnis olsem praiwet benk bilong ol.

Na tu em bai strongim ol sevis i go long ol pipel. Praivetaisesen em as bilong developmen bilong kantri bilong yumi.



Wel dok kamap papa



BIPO bipo tgru i ga wanpela yangpela meri wantaim wel dok i bin stgap long bus. Tupela i no bungim pes na save long narapela arapela.

Wanpela taim meri i stap i go na i gat bel nating na karim wanpela pikinini man. Mama bilong pikinini i sindaun tgasol i go na as bilong em i pas long wanpela ston. Em i painim hat tru long sanap na wokabout i go i kam long painim kaikai samting na skin bilong tupela pikinini i doti nogut tru.

Wanpela taim wel dok i laik wokabout arere long ston na em smelim skin bilong pikinini. Na em i go klostu long ston na lukim tupela mama wantaim pikinini i sindaun na luk sori tru i stap.

Dok i kalap antap long tupela na rapim tang bilong em antap long skin bilong tupela na wasim tupela gut tru. Bihain dok tekov i go painim paia. I no long taim na dok i kam bek wantaim paia. Mama i gat bikpela amamas tru. Nau dok i go na brukim diwai bilong paia na taim paia i lait, dok i givim siksti i go long gaden bilong ol narapela man na em i stilim kaikai bilong ol na karim i kam bilong mama i ken kuk na kaikai. Mama kukim kaikai na em kaikai hap na givim hap long dok. Tupela kaikai na stap wantaim na dispela dok i kamap olsem papa bilong pikinini, taim papa i lukim pikinini bilong em, em i save gat bikpela amamas tru.

Papa lukim pikinini yet i stap na pikinini i gro na kamap bikpela man stret. Dok i givim siksti i go long ples bilong ol man na em isi stilim samting bilong ol man long wokim

bunara na spia. Mama i sindaun nlainim pikinini bilong em long sut long bunara na spia. Papa kisim pikinini i go lainim em hau long sut wantaim bunara na spia. Taim papa lukim olsem pikinini i save sut gut tru long bunara, em i go long bus na brukim diwai bilong wokim bunara na spia. Em kisim ol dispela diwai i kam na givim long mama. Mama i sindaun na lainim pikinini bilong em long wokim trep na kisim ol wel abus. Taim mama wokim trep yet, em save tokim pikinini man bilong em olsem em mas noken wokim trep long graun. Nogut ol dispela trep long graun bai kisim papa.

Papa bilong manki i no save lusim tupela, olgeta taim em save sevimm tupela long kaikai na long sait bilong abus tu. Wanpela dei i no save go nating, olgeta dei kaikai i save pulap stret long haus.

Wanpela taim pikinini lukim papa i sindaun long haus i stap na em i givim siksti i go long bus long wokim trep. Em i lus tingting long olgeta toktok mama bilong em i bin tokim em bipo olsem em mas noken wokim trep long rot we papa bilong em i save raun long en.

Pikinini i wokim trep pinis na em i kam bek long haus na i sindaun wantaim mama bilong em i stap.

Apinun nau na bikpela ren tru i pundaun. Turangu, papa

ren i bagarapim tasol em i tingting long pikinini bai slip hangre na ren bagarapim em wantaim em givim siksti stret na laik go bek long haus. Ren i bagarapim em na em i no lukluk gut long rot tasol em save raun long en olsem na em ran i kam.

Papa i no lukluk gut. Trep kisim em stret long nek bilong em. Olgeta kaikai bilong pikinini em karim long maus bilong em i pundaun nabaut na stap long rot. Tang bilong em i kamaut na turangu, papa i hangamap long trep bilong pikinini bilong em na dai pinis.

Mama wetim papa i go na tokim pikinini olsem nogut yu wokim trep long graun na trep i kisim papa bilong yu. Tupela mama pikinini i wet i go tasol papa i no kamap long haus inap long bik moning.

Pikinini i ting papa bai raun i go na givim siksti i go sekim trep. Em i go longwe liklik long trep na luksave olsem wanpela animel i hangamap long trep bilong em i stap. Em i kirap amamas na ting olsem wanpela kapul i hangamap i stap.

Em i go klostu na luk save olsem papa bilong em tang kamap aut na hangamap long trep bilong em.

Boi ya bikmaus kra wantaim katim trep na kisim papa bilong em i kam daun na karim i go long mama bilong em i stap long en.

Mama krosim pikinini nogut tru na tupela i planim papa arere long hul bilong ston tupela i save stap long en. Nau mama i tokim pikinini olsem yu noken i go long bus moa. Yu kilim papa bilong yu pinis na nau em tambu long yu singsing na go long bus.

Boi i no bisi long toktok bilong mama bilong em. Em kirap moning tru na karim bunara bilong em na go antap long mauten. Em i go antap na lukim wanpela diwai i sanap i stap.

Em wokim paia pinis arere long dispela diwai pinis na em yet i kalap i go antap long dispela diwai na mekim save stret long singsing.

Em singsing yet i stap na man, wanpela meri i sindaun long gaden na harim nek bilong boi i singsing i stap na lewa bilong em i paia stret.

Meri i lusim gaden wok bilong em na kam long lukim husat i singsing i stap. Meri kamap long as bilong diwai na singautim manki ya long kam daun.

Manki i kam daun na meri i tok em laik maritim em na tupela i marit na i go sindaun long ples bilong man.

Dispela stori i kam long Berok, Nenext na Yalumet insait long Kabwum distrik bilong Morobe provins.

**Maroxs D Dogi
Rabaul**



Nem: Sion Yakumbu
Krismas: 16 (man)
Adres: P O Box 282, Waigani, NCD.
Save laikim: Bungim ol nupela pren, pilai soka, ragbi, kriket, boksing na masial ats.

Nem: Luson Yakumbu
Krismas: 8 (man)
Adres: P O Box 282, Waigani, NCD.
Save laikim: Kik boksing, bungim ol nupela pren, pilai ragbi na soka na kriket.

Nem: Napa Anton
Krismas: 15 (man)
Adres: P O Box 380, Mt Hagen, WHP.
Save laikim: Lukim TV, stori na mekim fani stori nabaut wantaim ol poroman.

Nem: Alfie Sire
Krismas: 15 (man)
Adres: P O Box 126, Finshafen, Morobe Province.
Save laikim: Pilai ragbi, lukim ol muvi piksa, mekim pani wantaim ol poroman na planti moa.

Nem: Kun Tobia
Krismas: 7 (man)
Adres: Tarangau Community School, P O Box 877, Mt Hagen, WHP.
Save laikim: Go lotu, lukim piksa, go Sande Skul, pilai ragbi na serim ol panui stori.

Nem: Yoba Gore
Krismas: 12 (man)
Adres: Tarangau Community School, P O Box 877, Mt Hagen, WHP.
Save laikim: Pilai ragbi, lukim TV, mekim pani, harim musik, go lotu na ritim Baibel.

Nem: Betty Ambandi
Krismas: 16 (meri)
Adres: Hagen Secondary School, P O Box 380, Mt Hagen, WHP.
Save laikim: Go lotu, mekim pani, harim lotu musik, singsing lotu n aplanti moa.

Nem: Wendy Michael
Krismas: 14 (meri)
Adres: Mt Hagen Secondary School, P O Box 380, Mt Hagen, WHP.
Save laikim: Go lotu, harim gospel musik, danis, waswas long wara na planti moa.

Nem: Titus Pelandi
Krismas: 23 (man)
Adres: P O Box 325, Badili, NCD.
Save laikim: Tok pilai, lukim EMTV, lukim ragbi, tok pilai wantaim ol yangpela meri na raun pilai wantaim ol.

Nem: Samuel Dimi
Krismas: 18 (man)
Adres: Catholic Mission Tokembi, P O Box 107, Wewak, East Sepik Province.
Save laikim: harim musik, go lotu, rit na rait, serim ol samting, pilai spot na gita.

Nem: Noel Kata
Krismas: 18 (man)
Adres: Kapiura Plantation, Bilomi Division 2 P O Box 451, Kimbe, WNP
Save laikim: Pilai soka, basketbal, lukim TV na vidio, wokim gaden na bai mi bekim olgeta pas ol manmeri i salim i kam long mi.

Nem: Ben Pora
Krismas: 22 (man)
Adres: P O Box 282, Waigani, NCD
Save laikim: Rauri wantaim ol yangpela, mekim pani, serim ol samting, lukim narapela ples na sindaun wantaim ol famili ion haus. Mi bai traim bekim olgeta pas mi kisim.

Papamama i no laikim mi marit ausait

mekim ol bikpela disisen long ol samting we i karamapim laip na sindaun bilong mi, mi yet. Wanem tingting bilong yu long dispela samting?

CAPABLE

Dia Pren,
Situasen bilong yu em i kamap planti moa insait long kantri long tude.

Plantil ol yangpela pipel i painim ol nupela rot long mekim ol samting taim ol papamama bilong ol i save tasol long ol pasin bilong tumbuna.

Yu bin traim long glasim situasen long sait bilong papamama bilong yu? Long ol pasin tumbuna i bikpela samting yet. Em i tru ol i laik olsem yu mas stap klostu long ol na lukatim ol taim ol i lapun.

Tupela papamama bilong yu bai sori na behat long lusim yu i go. Tasol ol bai no inap long pilim gut long tingting long ol yet. Ol dispela wari i no

narakain, planti lain i save gat ol dispela kain tingting. Tasol long daunim ol dispela kain wari, yu mas gat ol samting we i strongim prensip. Dispela em ol samting olsem pasin bilong luksave long wanpela arapela, na gutpela toktok namel long wanpela arapela.

Long soim luksave long papamama bilong yu, yu traim na mekim pren wantaim ol manki long ples bilong yu yet? Na inap ol i makim yu long wanpela manki long ples bilong yu yet?

Yu sindaun na toktok wantaim ol papamama bilong yu long tingting bilong yu long dispela boipren bilong yu? Sapos dispela rot i no wok, i moabeta long yu i kisim wanpela hauslain bilong yu long helpim yu long en. Bai i hat tasol sapos yu laikim luksave long papamama bilong yu long dispela samting.

Taim tupela pipel husat i no bilong wanpela hap na ol i gat ol wanwan kastom bilong ol i bung na marit, em i min olsem

ol mas senisim sampela samting long stap gut wantaim wanpela arapela insait long famili. Tupela papamama bilong yu i mas luksave olsem moa hevi i ken kamap namel long marit long tupela pipel husat i no kam long wanpela provins na ol i gat ol narakain pasin tumbuna. Bikos ol i laikim yu na ol i tingim gutpela sindaun bilong yu long bihain taim, ol laik bai yu maritim wanpela gutpela man husat i kam long wan provins yet wantaim yu.

Ol papamama bilong yu i bungim pinis boipren bilong yu pinis? Sapos i no yet, i moabeta yu kisim em i go long bungim ol bikos sapos ol i lukim na bungim em, ol ken senisim tingting bilong ol na laikim em. Sapos ol i bungim em na ol i save moa long en, ol bai glasim na skelim em gut na larim em i maritim yu. Na dispela tu bai rausim pret pasin we ol i gat long ol ausait lain.

LAIPLAIN



Dia Laiplain

Tupela papamama i laikim mi long marit long asples provins yet na i no long ausait. Ol i tok ol laik bai mi stap klostu long ol bipo ol i dai.

Mi stap long las yia bilong kolis wantaim planti sumatin bilong ol arapela provins.

Mi bin gat wanpela boipren tasol tupela papamama i tokim mi long lusim em. Nau mi gat nupela boipren gen tasol em i bilong narapela provins. Mi laikim em, tasol long wankain taim tu, mi laikim tu papamama bilong mi.

Mi gat 19 krismas na mi ken

KANAGE



Wanpela taim long Sarere long belo na baga man Kanage i tingting long go waswas na em givim siksti i go daun long raun wara. Taim em i go klostu long wara ya nogat em harim ol nek bilong kas plaua Simbu stret. Em nau Kanage brukim bus stret long nil nil gras i go antap long maunten na spai i go daun i stap. Yu save pasin ya na lek han bilong em na olgeta hap bilong en i no sindaun stret olsem na taim i laik subim nek i go daun moa yet, hai glas bilong em i pundaun i go daun na tu graun em krungutum i stap long en i bruk. Nau sem taim Kanage i flai i go daun stret long wara ya. Taim ol yangpela kas i lukim em, ol i sem nabaut na laik i go painim ol kolos bilong ol. Turangu Kanage painim hat long toktok na em kirap bikmaus i go antap na tok olsem. Yu husat man tru pusim mi kam daun ya, yu laik pai, yu mas paitim man stret okay! Naken pusim man nating nating olsem. Yu bliari binatang samting nogut. Na taim ol yangpela meri i lukluk i go antap long lukim husat man tru i bin pusim em i kam daun. Kanage i das pinis long haus bilong em. Yu save em les long ol bai luk-save long em.

Francis Yaka
Kundlaw

Wanpela taim bilong Independens De selebresen. Em long Septemba 16. Kanage i go salim skin stret long plai graun i stap. Na em wanpela man bilong pret long ol kainkain snek. Em nau em i go lukim wanpela bikpela pilai ol i kolim swimin resis. Na long dispela swimin pul ol i bin lusim wanpela traipela mama bilong moran i go insait. Na ol so komiti i raun na toktok long spika na tok olsem. Yu husat manmeri i swim i go long hapsait bai yu winim mani, em K10,000 prais. Planti manmeri tru i raunim dispela swimin pul o raun wara long lukim husat man tru bai swim i go long hapsait bilong wara ya. Kanage tu i no laik sindaun i stap long lukim tasol, em sekim sekim ol manmeri na em kam pinis long fran bilong ol man. Em nau taim em lukluk i go daun pinis. Yu save lek han bilong em i guria na em givim i go daun stret ya. Na em yet em i no save long swim wara long laip taim bilong em. Ating em i pes taim tru bilong em long lainim long swim. Em mekim i go i go na sua long hap sait, na trangu lek han bilong em i les olgeta. Taim ol manmeri tok olsem yu win na tok hurei, hurei. Na ol man i go pas long so o pilai kisim prais mani K10,000.00 sek i kam long givim em. Kanage kirap isi tasol na tokim ol olsem. Mi les long kisim prais, mi no wari long mani bilong yupela. Wanpela bikpela samting em olsem. Mi lak save tasol long husat man tru i bin pusim mi kam daun. Yu save em i mas tingim laip bilong em, em i bikpela samting.

Francis Yaka
Kundlaw

Kanage em bilong Simbu na em i go raun long Hagen So. Na insait long So graun em i ekting olsem wanpela opis man, painim meri sapim tupela pen long siot poket bilong em wantaim olpela pas buk bilong ol narapela man. Long apinun taim olsem 5 kilok em i guria long painim bas long go bek long ples. Laki tru wanpela sans bas bilong go daun long Lae. Kanage i kalap na askim kru bilong bas go na tok "On leg one may i go long Simbu?" Taim em i tok olsem ol pasindia i lukluk strong long en. Long dispela taim em i kisim moa pilings. Na bos kru i bekim tok na tok olsem "never mine kam inside yumi ol ailance ya". Taim Kanage i kisim sit pinis draiva i kukim i kam long Simbu. Long bas Kanage sindaun wantaim 3 bel long dispela hap tok "never



mine".

Bobyee Kulpa
Simbu

Kanage em wanpela bos long Dredging kampani i stap long en. Kanage em papagraun bilong ples we Dredging Kampani i stap na wok long en. Insait long hap i no dredging-kampani tasol, Ok Tedi Kampani save wok tu. Wanpela taim ol bikman bilong Dredging na OTML. Kampani tokim ol papagraun long lowa Ok Tedi komiti bilong ples na ol man husat ol fil long toktok long graun kampani i lusim. Wanpela Fraide ol waitman na blekman save wok wantaim ol kampani i bin kam long toktok. Dispela taim nau Kanage wantaim ol kampani, papagraun na ol komiti bin bung. Taim bilong toktok stret Kanage i senisim nem bilong em na tok Kehen. Bilong statim mitim wanpela waitman bin statim. Taim waitman i laik statim toktok, em introdusim em yet na tok, Hellow my name is Mr Ken I came from JDA. Waitman toktok pinis na em askim ol papa graun long toktok. Kanage kirap na laik tok. Mr Ken, my name is Kehen and its done to your name." Na em i skruim tok moa na tok "Mr Ken, my name is very very close to your name-shake." Kanage kolim nem bilong em pinis i no laik toktok long bipo waitman i no bin kam long ples Bige. Kanage statim toktok na laik tok, "taim mi stap yangpela man long Bige" na em kirap na tok, taim mi stap yangpela man long Bige dispela hap ples em bus tasol. I no planti manmeri bin stap na nau yupela ol waitman kam bagarapim ples.

Mettie Emlee
Klunga

Kanage em i wanpela sensus wokman na em bilas gut tru na raun long taun i stap. Yu save Aitape i no bikpela taun em hap kuiboi taun tu ya. Em werim "t shirt bilong sensus 2000 na karim tu bek na sanap i stap wetim bas long go long Raihu Helt Senta. Tru tru em lukim ol nes meri na em kisim pilins stret. Na taim bas i kam na stap em lukim wanpela nes meri karim stret sindaun na em go sindaun klostu long em. Bas i pas stret na Kanage pas o tasim meri ya na plisman ya sindaun olsem Electric Shock kisim em stret na singaut "Ai yo mama mi ya, asua nau lewa. Kanage mekim planti nois na meri i tokim em "acting yet" na baga nogut tokim em, yu save harim kaset bilong ol Wali Hits tu na yu tok olsem, wanem "Maliu welwel bai orait o. Plis lewa kam bek na sindaun." Meri ya tokim em "westim taim bilong yu mi marit pinis. Sori tru Kanage gat 50t stret long poket na laik go bek na nogat mani long baim bas gen na em tuhat stret na wokabaut go bek long Aitape taun.

Killian K.
Aitape

Kanage mekim longpela toktok i go na em i no givim spes long sampela kaunsil long toktok. Em i pulim toktok i go yet na em lukim ol kaunsil, ai bilong ol slip na ol i painim sia nabaut i go i kam. Na kaunsil Kanage isi tasol i go ausait na em i

go sanap long bas stop long Okapa rot na draiva bilong Okapa i kam na Kanage i tok lusim mi long Onamug.a Na Kanage i kalap tasol long dispela ka na tupela i go i yet long rot na Kanage tokim draiva long tanim ka i go bek long taun. Na draiva i tanim ka na tupela i go bek long taun. Long rot Kanage i tokim draiva olsem em i mas i go na kisim pe bilong em pastaim. Em i trikim draiva na em i go lukim ol kaunsil ol i stap na em tok yupela ol kaunsil yupela tu i sapotim toktok bilong mi. Em i tok olsem lidasip i givim mipela so mipela i lidim ol pipel i go long gutpela rot em bai gutpela tasol sapos i nogat mipela ol lida bilong Papua Niugini bai wip long em.

Konex Venio
Kainantu

Kanage i gat wanpela liklik brata. Liklik brata i gat wanpela yia na Kanage i gat tupela yia. Olsem liklik brata i save gat gridi pasin long Kanage. Kanage i bikpela pinis tasol em save dring susu yet. Olgeta taim liklik brata i save painim susu na Kanage i belhat nogut tru. Wanpela taim Kanage i kirap krosim brata bilong em na tok, yu papa bilong susu? Mi em mi pas ya. Mi bin bikpela long em. Yu em yu nau tasol na gridi tumas traun na givim sans long mi tu. I no longtaim, Kanage i tingting long kilim brata bilong em long nait, taim papamama na liklik brata i slip pinis. Kanage i kisim marasin nogut na i go rapim long susu bilong mama bilong em. Em i ting sapos liklik brata i dring long nait bai em i dai. Tasol liklik brata slip i go na long tu lait em i kirap. Long moning taim Kanage i kirap long bet. Em i harim ol manmeri i krai long haus bilong em. Em i ting liklik brata i dai pinis. Bel bilong em i amamas tru. Tasol nogat mama i kam holim pasim em na tok olsem papa idai. Kanage i wari nogut tru na askim mama, olsem wanem na em i dai. Mama i tok long nait papa i dring susu na em idai. Kanage i tingting i go nogat na kirap tokim mama bilong em. Mi ting susu bilong mipela ol manki tasol, tasol nogat.

Khmael Dau
Lae

Kanage i bilong Bogia. Wanpela taim danis i kamap long ples Tobenam na Kanage i gat bikpela laik tru long go danis. Tasol trangu em i nogat su. em i go long haus painim su nogat, em lukim hap gambut na hap sendol i stap long kona bilong haus. Baga man ya kisim tasol 2-pela hap miks su tasol na painim so ken long werim wantaim miks su bilong em. Kanage i tingting nogat em katim tasol 2-pela hap han bilong ko siot bilong em na samapim long string bilong hukim pis. em nau Kanage i werim so ken pinis putim miks su bilong em na boi, em askim man long geit "hamas long gel". Man ya tok K1.00. taim em peim geit pinis na go insait man em lukim olgeta man kisim ol meri na danis wantaim. Tasol wanpela girile meri tasol putim hat na smuk na sanap arere long pawa ben i stap. Kanage isi tasol saitim long arere na go askim long em na 2-pela kirapim das. Kanage i ting olsem wanpela kumul stret ya em kisim na 2-pela kirapim das klostu tulait nau 2-pela laik holim pas na wokim hula

hula danis. Man Kanage pilim olsem sanpepa, sutim em. Na meri tu lukluk i go daun long lek bilong em na lukim miks su. Em nau 2-pela bruk isi isi na go longwe long 2-pela yet. Kanage pilim wari tru na krai wantaim na tok. Sanpepa o wainis mi kisim.

John Dee Waunada
Bogia

Kanage i bilong liklik ples Malot insait long Aitape, Sandaun provins. Wanpela taim Kanage i go raun long Vanimo taun tasol Kanage ya i no save gut long tok pinis. Tasol baga man ya em i save tru long tokples. Wanpela taim nau Kanage i go raun long nambis taim em i wokabaut i go na wanpela waitman i kam bungim em long nambis. Waitman ya i tokim em olsem yu sanap, em nau baga ya i sanap. Em nau yu save waitman ya i sanapim em man baga ya i kisim pilings stret na i wokabaut i go long haus. Kanage i kam kamap long haus baga man ya kirap na tokim ol lain wantok long haus olsem wanpela waitman i holim mi tripela taim. Man ol lain wantok ya i harim na ol i kilim ol yet long lap stret na kaikai das bilong Vanimo.

Richard Mirik
Aitape

Kanage em bilong Pamba Paka insait long Westen Hailans provins. Wanpela taim Kanage i bin go raun long Hagen taun em bin lukim wanpela meri Not Wahgi. Kanage i go klostu long meri ya na em tok-tok wantaim em. Kanage em bin konim em gut tru na kisim em i go long ples bilong em. Tupela stap long ples wok gaden na ol narapela wok stap i go sampela mun i go pinis. Wanpela taim meri bilong Kanage i gat bel na taim bilong em long karim pikinini. Long wanpela nait trangu meri ya em i no slip inap moning taim tru. Tupela susa bilong Kanage kam kisim meri i go long haus sik. Long haus sik meri ya i karim pikinini boi. Wanpela nes i kamaut long haus sik na tokim Kanage. Kanage meri ya karim wanpela boi. Kanage i tok top sot top sot tasol nes i belhat long dispela tok Kanage i mekim. Na nes i askim em yu tok wanem? Kanage i tok nogat ol PX3 manki ol i stilim stret ya. Na em i tekov.

Leo Neil
Mt Hagen

Kanage em miks blut pikinini bilong Aitape. Long wanpela taim nau na Kanage wantaim kas bilong em manki Luma na tupela i go tromoi, tromoi long Aitape taun. Em nau Kanage i raun i go sindaun wantaim kas bilong em long aninit long wanpela diwai arere long fil na i wok long tromoi, tromoi i stap. Hey! Wantu na Kanage tromoi ai i go antap long sait bilong buksop na lukim ekting kekeni bilong Sepik na ailan i wok long ron long basikol i go daun long supra maket. Hariap tasol na Kanage lus nating na spin insait long supra maket na lukim kumkatim bilong Sepik na ailan i raun insait i stap. Baga ros ya hariap tasol na saitim em na tokim em yu tasol ron long basikol ya. Man taim em blut bilong Sepik na ailan i laik tanim na krosim Kanage sori. Kanage i lus nating na han tasol i paitim ol mit insait long supra maket i kapsait na sekyuriti i singaut na Kanage i singaut tu long sait na tok sori mi laik tromoi long nil pis bilong ailan ya tasol abrus na sak i ronim mi.

David Nene Kou Mela
Aitape

Kanage em bilong Aitape liklik ples bilong em Nuruau. Wanpela taim nau na Kanage kisim tupela poro bilong em i go wok i stap long bus arere long wara. Man tupela poro bilong Kanage i wok long bisi long wok i stap na Kanage i pilim olsem em i hat pinis. Hariap tasol em i rausim trausis na sanap wantaim anda pens bilong en na wok i stap wantaim tupela poro bilong em i stap. Tasol yupela save, Kanage em kain man olsem tu. Taim Kanage i wok i stap na tu em save ai sait nabaut na lukim wanpela meri i wokabaut i kam stret long em. Sori Kanage i lus nating na as bilong em i kirap olsem Muruk na das tu i kirap na Kanage i tekov.

Macheal Amapos
Aitape

Makim man Marawaka stret long 2002

Dia Edita,
 Mi wanpela boi bilong Marawaka distrik. Na mi bilong ples Yamuru long hap bilong Isten Hailans provins. Na mi i laik sapatim tok bilong tupela brata hia Kotoye Gulauye na Joe.
 Yes tupela brata, mi laik tokim yutupela olsem. Tok bilong yutupela em tru. Mi baim

nuspepa long mun Novemba 30, 2000 na mi lukim toktok bilong yutupela na mi amamas nogut tru long tok bilong yutupela.
 Em olsem na mi laik tokim ol lain bilong mi long Wonenera Marawaka olsem.
 Long neks yia 2002 yupela i mas tingting gut na votim wanpela raitpela man, wankain olsem olpela memba bilong yumi Peter

Gaige.
 Lukim yumi ol Marawaka i no kisim wanpela sevis yet na 5-pela yia bai i go nating stret.
 Bikos han mak bilong Peter Gaige stap pinis tasol i no gat memba bilong mentenim rot i kam olsem long Marawaka Umba Menyanya rot.

Olsem na yumi ol yangpela bilong nau. Mipela i mas tingting gut na givim vot.
 Em tasol na yu brata o susa yu laik sapatim mi o egensim mi yu welkam tasol na mi bai lukim long Wantok nuspepa.

Hiso Mat P Yamuru

Stretim prais bilong kopi

Dia Edita,
 Mi wanpela manki long ples yet, na mi laik autim wanpela bel hevi bilong mi long Wantok nuspepa.
 Tok mi laik tok olsem, gavman i mas lukluk moa i go insait long Kopi Maketing Bod na tu putim sampela sapat prais i go insait long Kopi Maketing Bod.
 Wanpela bikpela samting mipela ol liklik manmeri long ples i save stap long lukaut bilong kopi tasol. Olsem wanem na prais bilong ol samting long stua i go antap tru, na kopi prais i go daun tru.
 Dispela tasol i mekim mipela ol manmeri long ples i kisim hat taim

stret. Olsem na gavman i mas lukluk moa long dispela hevi long prais bilong kopi long K.M.B na toktok long dispela hevi pastaim long long ol narapela samting.
 Bikos dispela em i bikpela samting tru long toktok. Mi laik tok gen olsem mipela ol liklik manmeri long ples i save stap na sindaun antap long kopi tasol olsem na nau taim prais i go daun mipela i kisim bikpela taim nogut stret.
 Em tasol tenkyu.

John Topo M Banz, WHP

Politisen noken kamap pasto long sios

Dia Edita,
 Mi wanpela manki Kompiam long Enga provins nau mi stap long Mt Hagen na laik putim aut wari bilong mi.
 Mipela makim ol memba i go daun long Nesenel Palamen long ol ken wokim tok tru na bringim gut sevis i kam long pipel bilong em yet long ilektoret tasol maus bilong ol memba save kamapim planti tok giaman.
 Tok giaman em kam long banis bilong satan. Mi save lukim long sabat taim wanpela memba yu

save autim baibel tok bilong God olsem pasto em gutpela wok tu tasol, yu mas was gut long maus bilong yu. Bilong wanem? Yu save tok giaman planti taim long ol pipel.
 Sapos yu kristen man na tok giaman long ol pipel bilong yu, orait yu no inap go insait long Kingdom bilong God.
 Mi tokim yu stret, brata yu no inap go long heven. Sapos yu laik go long heven yu mas senisim tok na pasin bilong yu pastaim na bihain yu bai go long heven. Yu

bin giamanim planti pipel bilong yu na ol i no wan bel long yu.
 Yu mas pilai politiks na wokim wok bilong memba tasol na noken kamap pasto gen long sios.
 Olsem na yu husat brata na susa laik sapatim o egensim plis yu rait tasol i go long Wantok nuspepa, mi amamas tasol long ritim bekim bilong yu.
L. W. Johnson PSK, Enga

Nogat wokman tru long Jimi open

Dia Edita,
 Mi wanpela man long Tabubuga sesen, ples bilong mi em long Waramis viles.
 Na mi laik autim wantaim wari olsem, mi bin go raun long Lae na mi kam antap long Isten Hailans na kam long Simbu provins.
 Na mi lukim olgeta wokman na meri ol i stap long opis na ol i wok na lukim wari bilong ol pipel na ol i wok long opis i stap. Tasol olsem wanem long Westen Hailans gavman i salim wok-

man i go long ol arapela distrik o mi no save.
 Tasol long Jimi distrik bilong mi nogat ol wokmanmeri i stap long opis, dispela opis i luk olsem opis bilong ol kokros na rat i pulap insait. Dispela em i wanpela bikpela hevi na ol Helt Dipatmen na Edukassen Dipatmen tasol i mekim save long wok na ol arapela dipatmen ol i no stap long ples bilong wok.
 Olsem na mi laik askim Gavana Robert Lak na memba bilong Jimi Open, Mista

Beven Tambi. Inap long yutupela i lukluk long dispela ol wari bilong ol pipel long Jimi o nogat.
 Dispela pas mi i no raitim long laik bilong mi, mi makim maus na tingting bilong olgeta lida manmeri long Jimi na mi raitim. Olsem na yu husat i laik sapatim o yu laik tok egensim mi, em i orait yu rait tasol i go long Wantok nuspepa.
Daniel Banga Konts Waramis, Tabubuga, WHP

Tingting gut na yu vot

Dia Edita,
 Mi laik autim wanpela tingting bilong mi. Mi save ritim ol pas long Wantok nuspepa.
 Planti i save komplem long ol memba bilong ol i no save mekim gut wok. Na tok memba i stap we? Em i no lukluk long mipela, vot i lus nating.
 Sapos yu husat wantok i save raitim dispela kain pas long memba bilong yu mi laik tok olsem. Yu waso taim bilong yu long rait nating.

Yu no laik tingting gut pastaim long yu vot.
 Em tu leit long toktok. Memba bilong yu i no kikim as bilong yu na tok yu votim em, em yu yet.
 Em tasol liklik tingting bilong mi. Yu husat laik sapatim o egensim rait tasol na bai mi lukim.

Clement Walker Maprik

Go bek long lotu na kisim amamas

Dia Edita,
 YES, inap mi toktok liklik long helpim ol husat manmeri i gat sik nogut HIV/AIDS long laip bilong ol. I no AIDS tasol ol arapela sik tu.
 Toktok bilong mi i go olsem. Yu husat manmeri yu stap long sios bilong Krai. Yu stap skin lotu na yu wokabaut olsem longlong manmeri na yu bungim dispela sik nogut HIV/AIDS.
 Yu nogat sans bilong yu. Na tu yu save i nogat sut marasin bilong daunim dispela sik. Tingting bilong yu i sot pinis. Wanem taim strongpela malaria o sik pekpek wara bungim yu. Yu bilong dai tasol.
 Mi laik helpim yu husat brata o susa i gat sik nogut pinis olsem. Yu mas tok sori long ol sin bilong

yu long God. Papa bilong mari-mari na bel isi. Pastaim yu stap skin lotu na yu wokabaut nabaut i go na yu bungim birua.
 Nau yu mas tok sori na yu go painim bun tru go insait tru long bun bilong lotu. Em sios tru bilong Jisas Krai. Em i save harim singaut bilong mama bilong em Santu Maria, Kwin bilong heven na graun. Kwin bilong sekan na bel isi. Mama bilong sios bilong Krai.
 Harim gut AIDS manmeri. Yu no inap baim dispela samting long mani. Nogat tru. Fri tasol. Mi tok long yu mas beten korona o prea rosari wantaim tambuim kaikai o mekim penens. Daunim laik bilong bodi na yu prea rosari long sik bilong yu. Bai yu lukim kaikai bilong em bai kamap.

Prea bilong Santu Maria i go long Jisas pikinini bilong em mirakel i save kamap tru. Yu husat manmeri bungim ol dispela kain sik nogut na yu lukim pas bilong mi yu mas bihainim. Yu luk wari. Yu bihainim tok bilong mi, bai yu lap na yu amamas.
 Yu husat i egensim o sapatim, mi tok welkam tasol

Joseph Kua Kimbe

Sapos yu laik salim ol pas bilong yu i kam long dispela nuspepa. Salim i kam long dispela adres:
 THE EDITOR
 WANTOK NEWS PAPER
 PO BOX 1982 BOROKO, NCD.

Maket stret long maket

Dia Edita,
 Mi wanpela manki Morobe nau mi stap long Bialla, Wes Nu Briten provins.
 Na mi laik autim wari bilong mi long Wantok nuspepa na ol publik i ken lukim. Taim mi save raun long Kimbe taun mi no save amamas long lukim ol Hailans manmeri.
 Bikos pasin bilong rispek i no i stap long ol. Na ol save bagarapim Kimbe taun stret. Taim mi raun long Kimbe, mi lukim ai bilong stua mi lukim ol maketim buai simuk i stap o arere long opis bilong gavman tu.
 Buai simuk i stap na mi ting nogat mein maket. Tasol bikpela maket

bilong gavman i stap.
 Plis yumi man i gat save na tingting na i gat het. Maski long bagarapim provins bilong arapela lain na tu i noken bagarapim gutpela nem bilong Hailans. Planti gutpela hailans i stap na yupela wanem kain ol man tru ya? Traim harim tok sampela taim tu. Yu gat yau o?
 Em tasol liklik wari bilong mi. Plis yu husat brata o susa yu laik egensim mi o sapatim mi em orait tasol rait tasol long Wantok nuspepa mi amamas long ritim.
Kundip Hingi Bialla

Noken raun nating tumas

Dia Edita,
 Mi laik autim liklik wari bilong mi long ol sampela manki bilong Kero, Kongibul na Kolep husat i save stap nating na kalap long ka na raun nating tru olgeta dei.
 Mi bilong dispela ples tu. Mi bin lukim ol manki i no save mekim wanpela samting. Ol i stap nating na olgeta taim ol i save kalap long ka na givim siksti i go long Lipite na Koutol nabaut na kam olgeta long Walume. Yupela save painim wanem samting. Traim na sindaun long haus na hait liklik tu ya?

Na tu yupela i no save sori long tripela ka. Taim ol man i pulap tu, man yupela save hangamap long sait na tingting long go raun long haiwe yet.
 Nogut yupela painim birua long rot. Traim helpim papamama long haus na sindaun i stap. Yupela i traim na givim malolo long ka tu ya. Bilong wanem na yupela olgeta save raun tumas.
 Sampela bilong yupela i save sindaun long arere long kas kandis na lang save flai i go insat long maus. Traim na hait wanwik o samting.

Givim malolo long ol ka tu. Ating ol ka i man, ol bai komplem na pait wantaim planti bilong yupela pinis tasol ol ain nating olsem na yupela save givim i go kalap long laik na bikhet nabaut i stap.
 Dispela em liklik wari bilong mi taim mi lukim ol manki i raun long ka na we mi lukim olsem ol bai painim birua.
 Traim na mekim sampela wok gaden na kisim mani taim yu salim dispela ol gaden kaikai. Em tasol. Tenk yu tru na laikim yupela.
Ben T Pora. Mosbi Kapolo.

Bas mas pinisim rut long siti

Dia Edita,
 Mi wanpela man husat i save raun long ka olgeta moning i go long wok. Planti apinun mi wok long kalap long tu o tripela bas long go kamap long haus. Mi ting olsem dispeal foapela finga i kam aut long bas bos kru i stap taim ol i toktok planti na hapim bas fi i go antap long 50t.
 Nau planti bas draiva na bas kru i wok long putim dispela foapela finga bilong ol kam aut long bas long tok 4 Mile.
 Wanem kain nau ya. Ol les long pinisim olgeta mak long rot Len Trempot Bod i putim. Bilong wanem na ol i wok long tanim namel, namel long ol rot na givim i kam bek gen. Mi bin peim dabol bas fi long tripel; a o foapela taim pinis.
 Ol bas opereta i komplem na mipela publik givim bas fi stret, bilong wanem na dispela pipia pasin bilong kapsaitim ol manmeri long hap rot i stap yet. Inap ol man husat i go pas long Len Trempot Bod i lukluk i go insait long dispela na tok klia long mipela

husat i wok long kisim bagarap long wanwan dei sapos i bai gat sampela senis gen o nogat.
 Ol bas komplem na mipela harim na givim mani i go antap, nau ol bas i no kipim dispela promis olsem ol bai pinisim olgeta rut long ol.
 Em wanpela pipia pasin stret. Nau ol bas i kisim bikpela mani i go antap na hariap tasol ol i tanim long hap rot kona klostu klostu na karim ol manmeri sot-pela hap tasol na stilim mani bilong ol-pipel gut tru. Nogat wanpela manmeri i toktok o komplem long dispela na ol bas i stat long go bikhet gen.
 Ating i gutpela sapos ol manmeri yumi pasim tok na givim 30t bas fi olsem yumi save mekim bipo na larim ol bas kru na draiva kraik liklik.
 Mi les pinis long dispela kain trik pasin bilong ol bas draiva na bas kru. Mi ting ol wok long stilim mani bilong mipela ol pipel nating tru.
Janet Ate Erma Maunten, Pot Mosbi

Husat bai putim mani insait long kantri?

Dia Edita,

Mi wanpela grasrut manki bilong bik bus long Lowa Nebilyer ausait tasol long Mt Hagen taun WHP. Wari o komplon bilong mi i go long ol memba bilong haus palamen.

Olgeta memba bilong yumi long Papua Niugini i gat bikpela intres o laik long inves o bisnis long narapela kantri na i nogat laik long wokim bisnis o putim mani hia long Papua Niugini.

Yupela ol palamen memba wok long karim ol meri na bisnis bilong yupela i go na putim long narapela kantri. Wantaim ol pikinini bilong yupela long skul long hap. Na putim bikpela mani bilong yupela long hap na bai i stap sef na sapatim famili, bisnis na skul i bilong pikinini.

Em bikpela asua yupela ol lida i wokim. Husat bai kisim mani bek na putim insait long kantri? Na olsem wanem bai kantri i sanap strong long

ikonmik na wok developmen? Taim yupela ol lida i go inves long narapela kantri.

Long olgeta niuspepa yupela save bikmaus olsem man i gat save long strongim ikonomi na sevim kantri tasol samting tru em nogat. Mi save kisim bikpela sem bikos toktok bilong yupela i save kamaut long pablik i no tru na tu i no save helpim kantri long sanap strong long wok ikonomi.

Pablik yupela i ken isi tru giaman na kusai long ol arapela tasol mipela sampela em bai i hat tru. Bilong wanem na Papua Niugini i no develop yet na ikonomi i no sanap strong? Asua i stap long grasrut man o yupela ol lida, save-manmeri na bisnis man?

Yupela i no save tingim long sevim kantri bilong yupela? Kantri Papua Niugini i bagarap long ikonomi em yumi olgeta harim. Tasol yet yupela i inves long narapela. Salim ol pikinini long bikpela skul long narapela

kantri. Putim bikpela mani olsem K100,000 long beng long narapela kantri. Inap long yupela mekim ol dispela samting hia long asples kantri bilong yupela Papua Niugini?

Na sevim ol grasrut wantaim kantri? Mi wari long ol lida na bisnis man i go inves long narapela kantri moa yet long Australia na lus tingting long asples kantri bilong ol Papua Niugini. Noken kam kusai long 2002 nesenel ileksen olsem developmen.

Tasol samting tru em yupela laik kisim biknem na ronawe long kantri Papua Niugini na givim mani o inves long narapela kantri taim mipela tok orait long developmen.

Tenkyu tru long ritim pas. Egensim o sapat em laik tasol. Rait i go long *Wantok niuspepa* na bai mi amamas long ritim.

**Tano Wati
Mt Hagen**

Maski jeles long wok bilong narapela

Dia Edita,

Mi wanpela manki long ples Hailans insait long Mendi, Sauten Hailans provins. Mi laik tromoi tok pisin long *Wantok niuspepa* olsem. Sampela manki long ples ol i kolim Kaweri na liklik klen bilong ol em Aworokendim i lusim ples bilong ol na kam long Kimbe oil pam kantri.

Taim ol bin kam insait long wanpela plentesen ol i kolim Bebere divisen 2 ol manki ya komplon long asisten menesa na ol wokmanmeri olsem wanpela bosboi hap long Hailans (Mendi) nem bilong em Philip Ipsu save paulim mani bilong kampani na em ronawe kam na kam stap.

Ol brata husat yu komplon long assistens mensea, wokmanmeri long

Bebere divisen 2 ya, bara em klia wan mi ken tok olsem, pasin bilong jeles olsem na sapos yu wanpela skul manki kam na komplon em mi ken tok olsem yu jeles nating na kam komplon raun nabaut nabaut long plentesen long Bebere divisen 2.

Bara stil bai mi wok yet long sampela hap kona tasol yu husat komplon ya bai yu no inap painim wok raun raun tasol na kisim 6,4 long hap we yu stap long en.

Em tasol mi autim bel hevi bilong na na wari bilong mi. Husat yu laik sapatim o egensim mi rait i kam long *Wantok niuspepa* na bai mi lukim.

**Sendex Nycoo
Mendi**

Castan Maibawa mas givim sevis long olgeta Okapa pipel

Dia Edita,

Mi wanpela mangi bilong Keiyagana Constituency insait long Okapa distrik (EHP) tasol mi bikpela long Kainantu. Mi laik autim bel hevi na wari bilong mi, na tu supotim brata Yawas Kisawa long wankain tingting em i bin tok long *Wantok niuspepa* long mun Novemba 30, 2000.

Orait insait long Isten Hailans provins, Okapa em bikpela distrik tasol wanem taim em bai senis. Mi harim na lukim tu hevi bilong ol pipel bilong ples. Sampela taim mi yet tu i save kisim taim nogut tru wantaim kago long Kuru i go long ples o kam bek long taim. Olsem na mi ting em wankain long ol arapela tu. Ol lain i stap olsem long Sautfo, Anyana, Gimi na baksait tu ol save wokabaut i kam long mein bus stop long Kuru. Inap memba bilong Okapa Castan Maibawa wokim

sampela senis liklik o nogat?

Rot tasol em bikpela tingting bilong olgeta manmeri na i no olgeta samting. Ten yia long palamen em longpela taim tumas na yu i no wokim liklik mentenens long distrik yet. Wanem taim bai yu ek olsem konsen memba bilong ilektoret?

Mi bilip i gat projek fan i save kam quarterly long distrik olsem infrastructure mentenens olsem rot, haus sik, skul na stesen tu. Mipela i gat Okapa lokal level kaunsel wantaim ol masin i stap inap yu givim sapat long stretim o gradim rot. Em taim nau bai yu mas senis bikos mipela laikim man we i ken tingim pipel na i no em yet.

Em tasol na yu husat man o meri i laik sapat yu welkam.

**Abel A. Koia
Kainantu**

Askim Gavman long kirapim wanpela hausing skim

Dia Edita,

PLIS inap yu givim mi hap liklik spes long *Wantok niuspepa* na mi i ken autim wari bilong mi long pablik i ken lukim na autim tingting bilong ol antap long pas.

Wari bilong mi i go olsem. Mi wanpela yangpela man bilong Lowa Nebilyer ausait tasol long Mt Hagen taun WHP. Mi laik wokim liklik toktok o askim gavman long kirapim hausing skim long kantri.

Toktok bilong mi i sut long sait bilong haus lotu, Mi laik tok klia long pas bilong mi olsem gavman i ken kirapim hausing skim long sait bilong kisim mani na wokim haus lotu.

Bikos long ples bilong mi long bikbus mipela i gat siks 6-pela sios save lotu. Em ol Lutheran Sios, Katolik Sios, SDA, Lokol Sios, PNG Baibel Sios na Nebilyer Baptis Sios.

Olgeta i nogat haus kapa long lotu bikos ol prais bilong baim ol

samting na wokim haus lotu i go antap tru. Mipela save lotu long haus kunai i go na ol haus kunai i no save sanap longpela taim. Olsem na nau mipela plen long wokim haus kapa tasol mani i no inap na tu ol memba bilong mipela i no save helpim long sait bilong lotu wantaim mani.

Na nau mi kirap na askim gavman long kirapim wanpela hausing skim long kisim mani tasol na wokim haus lotu. Gavman i mas noken wansait na askim long lukluk long sait bilong lotu na givim liklik helpim.

Bilong wanem, bikos long Nebilyer em ples we i nogat developmen na nogat sevis olsem haus sik, skul na planti moa. Planti ol bikhet mangi husat save rot blok, stil, repim meri, simok mariwana na planti arapela bikhet pasin.

Tasol dispela ol 6-pela sios mi tok aut pinis antap i save helpim ol bikhet mangi long stap isi na

tanim bel na lotu. I tru ol bikhet mangi save harim toktok bilong ol pasta na evejlis na tanim bel na lusim ol pasin nogut tasol nogat gutpela haus lotu long lotu.

Gavman save feil long daunim hevi bilong lo na oda tasol sios bilong God i save mekim wok tru na sevim pipel na kantri wantaim. Gavman i mas opim ai na lukluk long helpim lotu tu olsem olgeta lotu long PNG i ken go long dispela hausing skim na kisim mani na wokim haus lotu tasol.

Sapos gavman i feil long givim sevis ok helpim sios tasol na ol manmeri i ken lotu long gutpela haus lotu na stap isi na wetim kam bek bilong bikpela antap.

Tenkyu tru long ritim pas na God blesim yupela wanwan.

**Tano Wati
Mt Hagen**

We stap memba bilong Huon Galp

Dia Edita,

Mi wanpela mangi Wampar insait long Potsie viles, klostu long Gebenisi ples na mi no save lukim pes bilong Hon. Tukape Masani, long hap bilong mipela.

Mipela ol lain bilong maus rot bilong Wau Bulolo i go inap long Maralena i no save husat em memba bilong mipela long dispela hap.

Ating Hon. memba em, memba bilong ol Morobe Patrol Post tasol, na tu ol lain manmeri husat i stap arere long nambis. Mipela ol lain bilong bus i no save kisim wanpela helpim na tu i no save lukim pes bilong Hon memba long hap bilong mipela.

Taim bilong yu i kam inap nau, na nau mipela i gat wanpela man bilong traim yu long dispela ileksen.

Mi tokim yupela ol sapota bilong memba, mipela ol bus lain i gat namba i stap.

Taim i kam pinis long kona bilong em bai pinis, na bai yumi traim na lukim.

Em tasol na yu husat i egensim mi rait tasol long *Wantok* na mi bai amamas tasol long ritim.

**Nim Gunem Koni
Lae**

Maski long sasim pe bilong meri go antap

Dia Edita,

Mi wanpela mangi long bus hap long Hailans nau mi kam raun long Kimbe. Mi laik autim wari bilong mi long papamama bilong ol meri olsem yupela noken soim pe bilong ol pikinini bilong yupela i go antap na tasim skai.

Mi wanpela grasrut mangi mi nogat pikinini long maritim ken pikinini bilong man olsem na mi pipia mangi laik tromoi tok pisin bilong mi olsem yupela papamama bilong ol meri noken sasim pe bilong pikinini meri bilong yupela.

Taim God i putim Adam na Eve long gaden Eden, Adam i no putim sampela kain pe long Eve. God i wokim bilong Adam nating na stap tasol. Tasol yumi kainkain manmeri long dispela graun wok long sasim pe bilong ol pikinini meri go antap ya orait long heven yupela papamama bai sanap long kot stret bikos yupela stilim ol pe bilong narapela brata bilong yupela.

Givim pikinini meri nating em bai rait na rait olgeta. Em mi autim kain wari we i save kilim mi taim mi raun, slip, kaikai na wok. Sapos husat yu laik sapatim o egensim mi orait rait i kam long *Wantok niuspepa* na bai mi lukim.

**Sendex Nycoo
Mendi**

Anglimp Saut-Waghi memba i go we?

Dia Edita,

Mi laik autim bel hevi na wari bilong mi olsem yumi statim nupela yia 2001 na yumi gat wanpela yia moa long narapela jenerel ileksen, em long 2002. Tasol mipela ol pipel bilong Anglimp Saut-Waghi i no lukim wanpela liklik sevis i kam long haus lain yet.

Long 1997 ileksen Mista Kuk Kuli i promisim mipela olsem em bai putim mani long ol sios grup, yut grup, putim kolta long ol liklik han rot, wokim bris na planti ol arapela samting tasol dispela ol sevis i no kamap long haus lain yet. Man, kainkain toktok giaman i kamap na nau mipela i no lukim sampela hanmak yet na nupela 2002 ileksen kamap pinis.

Mista Kuli inap yu kamaut long ples klia na tokim mipela wanem taim stret ol dispela samting bai kamap long haus lain? Yu tingting long winim gen sia bilong yu long 2002 ileksen na givim

sevis em i orait.

Sapos yu no klia gut long wok bilong gavman na paul long haus man long Mosbi, mipela i sori tru, yu ken lusim sia long han bilong sampela ol save man husat i redi long i go insait. Nogut ol memba i wok long pusim yu i go-kam olsem wilbaro.

Mipela i redi pinis long makim yu kamap kaunselagen. Mista Kuli, sori tru olsem, mipela i no kros long yu tasol, i luk olsem yu go longlong olgeta na mipela ol pipel bilong yu long Anglimp Saut Waghi i stap long tudak nau.

Yumi ol pipel bilong Anglimp Saut Waghi noken longlong gen long 2002, na salim ol man i nogat save i go long palamen. Em tasol na tenkyu tru long olgeta i harim. Husat yu sapatim o egensim, welkam tasol.

**Al Bunda Nai
Timgole Kup**

Noken paulim Baibel tok

Dia Edita,

Mi wanpela mangi bilong Kaintiba distrik. Mi laik toksave long pipel bilong Kaintiba olsem, husat laik sanap long 2002 ileksen.

Yupela i noken votim ol long 2002 ileksen bipo long 1975 Mista Aron Waihavo i bin memba long Kaintiba open. Na em i no wokim wanpela gutpela samting.

Namba tu Mista Chris Haiveta tu, em i no giamanin ol papamama long map na tamiok klos, nau papamama i kirap nogut long samting nau, ol papamama i votim em na nau em i kamap memba na minista na em i no bekim dispela dinau bilong em.

Mista Latab Banakato em yu wokim sem pasin. Tarangu ol papamama karim ol bikpela bikpela kopi bek na wokabaut olsem 145 kilomita. Mipela save karim kopi i go long Kaintiba. Na tu long Kaintiba distrik epot em i bus i karamapim na tu long ples olsem Hawabaku, na Koyama, Bema, Kanapeh, Kutitaka.

Yupela ol memba bilong Kaintiba i dai pinis o yupela stap laip yet? Sapos yutpela stap, mipela i no harim nek bilong yupela long haus palamen.

Papamama ol i tok wanem long yupela? Ol tokim yupela i go skelim long haus palamen.

Wanem taim bai yupela developim Kaintiba distrik na Bema rot i go antap long Hawabaku, Koyama, Kanapey? Wanem taim haiwe bai kam insait long Kaintiba distrik?

**Issac Yabety
Kaintiba**

Aussie Ruls bai stat long Mas

AUSSIE RULS RIPOT

PRESIDEN bilong NCD Ruls Futbol Asosiesen Dominic Kaumu i tokaut long kalenda bilong 2001 las wik.

Kaumu i tokaut olsem pri-sisen bai stat long Mas 17 na sisen propa long Mas 31. Fainel bai kamap long namba wan wik bilong Septemba. Wanem o klab i laik stap insait long 2001 kompetisen i mas baim K500 afiliesen fi bilong ol bipo long Mas 31.

NCDRFA bai statim wantaim launs long ParkRoyal Hotel we ol bikman AFL na tu ol pilaia bilong Westen Bulldogs na Brisbane Lions bai kam long Pot Mosbi.

Long semtaim tu ol bai givim Cleland Medal i go long ol wina bilong 2001 sisen. Dispela awot i stat long 1960 na pinis long 1980's.

Kaumu i tok NCDRFA i stretim tu tiket bilong ol lain bai go lukim gem bilong Westen Bulldogs na

Brisbane Lions. Prais bilong ol dispela wokabaut em K899.

Em i askim olgeta klab long redi long dispela sisen.

Ol arapela samting stap insait long program em Auskick Program we bai stat long Epil na tu ol bai redim wanpela tim long Not Kwinnsen sempionsip we bai kamap long Jun. Dispela program bilong Auskick bilong ol pikinini krismas bilong ol i stap long 5 na 12.

Olpela biknem boksa bai pait gen

BOKSING RIPOT

OLPELA biknem boksa bilong PNG Henry Kunsie i stap insait long tim bilong Pot Mosbi long pait long nesanel boksa sempionsipsip long Goroka long dispela wiken.

Kunsie i makim kantri long planti Saut Pasifik Gems we em i winim gol medal. Na tu i makim PNG long Commonwealth Games long Amerika we em i lus long kwata fainel.

Kunsie, James Miviri,

Eddie Dai na John Deklam em ol sampela boksa husat bai karim nem bilong biksiti bilong PNG.

Presiden bilong Pot Mosbi Amata Boksing Asosiesen (PABA) Sam Paulus i tokaut olsem em i amamas long dispela tim na bai pait strong long traim bringim taitel i kam long Pot Mosbi.

Mista Paulus i tok Pot Mosbi i makim tupela tim. Wanpela i karim nem Pot Mosbi (Tim Wan) na narapela em

NCD (Tim Tu).


Nem bilong ol boksa long tim wan em: Simon Kilo, Jack Willy, Tony Waisa, Paul Lare, Issac Saliki, Ricky Berua, Steven Elias, John Deklam, Eddie Dai, James Miviri, Peter Raphael, Michael Mondo, Alois Bekema, Henry Kunsie

Ol boksa bilong tim tu em: Alfred Michael, Steven Ivaroa, Gabriel Jack, Theo Torot, Rodney Jackson, Andrew Biagary, Tobin Rowa, Kevin Ragu,

David Tazig, Petrus Powa, Peter Guare, Rowin Robert, Kevin Sauto, Paul Dom

Ol opisel em Peter Raphael (kosa), Dick Larry (teknikel opisal), Mamai Koupa (liasesn opisa) na Kau Boi (PRO)

Presiden Paulus i tokaut olsem wanpela sempion boksa Chavis Kora bai i no inap kamap long pait long wanem em i gat stadi long yunivesiti. Arapela Dominic Bauai i kisim skul kosa na referi ya.



• Wanpela sofbal ampaia Moses Tolingling i sanap redi long kisim piksa. Em wantaim ol wantok ampaia i laikim nupela ol yunifom. Hia yu ken lukim, em i dress hap kas stret.

PNGRFL laik strongim zon sempionsip long 2001

YAMES KEI i raitim

PNG Ragbi Futbol Lig (PNGRFL) bai lukluk long strongim jon sempionsip stat long dispela 2001 sisen.

Dispela plen na luksave i stap insait long 2001 kalenda bilong PNGRFL ol i bin putim aut las wiken long Goroka taim ol bikman bilong lig insait long kantri i bin go bung long Nesanel Spots Institiut.

Insait long dispela kalenda zon-lig sempionsip bai stat long Epril 6 na ol fainels bai kamap long Epril 21.

Jenerel Menesa bilong PNGRFL, Kevin Murphy i bin tokim ol lain husat i kam long ol lig senta olsem zon sempionsip em wanpela bikpela lokal kompetisen insait long 2001 kalenda. Olsem na wan wan ol lig senta i mas afiliet na peim pilaia registresin pastaim long ol i stap insait long dispela resis.

Mista Murphy i tok olsem las yia (2000) dispela sempionsip i no bin kamap bikos planti ol senta i no bin pinisim sisen o fainel bilong ol long taim stret me PNGRFL i bin makim. Dispela i mekim na planti senta i no bin redim ol pilaia long makim senta bilong ol long pilai long zon-sempionsip.

Em i tok tu olsem las yia

RAGBI LIG RIPOT

British Amerikan Tobacco i bin redi long sponsarim dispela sempionsip, tasol bikos nogat planti senta i bin redim tim na ol progrem bilong ol, dispela sempionsip i no bin kamap.

Dispela ol toktok Mista Murphy i bin mekim long tok klia long ol lig sentas insait long kantri long redim ol yet gut na tu peim ol afiliesin fi na pilaia registresin bilong ol.

Planti ol bikpela toktok bilong developmen bilong ragbi lig insait long Papua Niugini na ol narapela toktok bilong ol lig sentas insait long kantri i no bin kamap bikos PNGRFL i no bin holim bikpela anuel jenerel miting bilong (AGM) en.

PNGRFL i no inap holim AGM bilong en las wiken bikos i nogat inap namba bilong ol lig senta i afiliet yet i go long nesanel bodi.

Long miting ol i bin painimaut olsem tupeal senta tasol i peim afiliesin fi bilong ol i go long PNGRFL. Ol dispela senta em Rabaul na Minj.

Dispela i wanpela bikpela sem stret olsem ol bikpela lig senta long kantri olsem Mosbi, Lae na Mt Hagen i no peim afiliesin bilong ol.

I bin gat wanpela muv o plen long kamapim wanpela vot i

nogat bilip long menesamen bilong PNGRFL. Presiden bilong Lae Ragbi Lig, Daniel Nandoma i bin laik muvim dispela mousen long Goroka las wiken. Tasol, sore tumas dispela i no bin kamap bikos Lae tu i no bin afiliet na i no redim em yet bipo em i laik mekim dispela samting.

Planti ol lig predisen bilong ol senta insait long kantri i bin go long stap insait long dispela AGM. Sampela ol senta husat i bin go long Goroka em ol lig presiden bilong Tabubil, Kerema na Rabaul na Kimbe.

Jenerel Menesa bilong PNGRFL, Kevin Murphy na siaman John Numapo i bin stap long Goroka tasol bikos nogat inap senta i bin afiliet, ol i no bin holim dispela AGM. Ol i surukim taim bilong miting i go long Mas 3, 2001.

Mista Murphy i tok strong tru i go long olgeta senta husat i laik pilai long dispela 2001 sisen long peim afiliesen fi na pilaia registresin fi bilong ol kwiktaim. Dispela bai mekim na ol senta i ken go bihainim kalenda bilong 2001 sisen.

PNGRFL i bin tokaut tu long 2001 kalenda bilong en long las wiken.

Mista Murphy i tok ol senta i mas redim ol yet gut na kamap long dispela AGM long Mas 3.

Hailens Soka singaut long AGM

SOKA RIPOT

HAILENS Soka Asosiesen bai holim anuel jeneral miting bilong em long Mas 17 long Nesanel Spots Institiut long Goroka.

President bilong HSA David Chung i singaut long olgeta soka senta long hailens long kamap long dispela miting. Em i askim tu sapos wanem nupela asosiesen o grup i laik

putim soka tim insait long soka tonamen bilong Hailens Soka i ken kamap tu long dispela miting.

Ol bikpela toktok bai kamap long miting em, 2001 Baset, Ripot bilong ol Ektiviti long 2000 na Soka bilong ol Pikinini insait long hailens.

Soka em wanpela spot we olgeta liklik mangi i save pilai taim ol i liklik bihain na ol i

go pilai ragbi lig. Olsem na em i gutpela olgeta pipel insait long hailens i mas givim sapot long soka.

Mista Chung i tok wanem ol senta i laik kamap i mas ringim sekretari Dimirit Mileng na Victor Simon long NSI. Em i tu tu olsem wanem ol senta i laik putim wanem agenda bilong ol, ol i mas salim kwik long feks.

Cellnet mekim save long NSO

HENRY MORABANG i raitim

CELLNET i hamarim stret kompetisen lida bilong Pul Tu, NSO, 3-1 insait long Pablik Sevans Soka resis long Sande.

Dispela win nau i helpim Cellnet long go sindaun long namba tu ples wantaim Edukesen na NSO.

NPF i winim Edukesen 2-1 na go sindaun long namba wan ples.

Dispela resis we foapela strongpela tim i brukim bun i soim olsem bai i gat strongpela resis yet i stap long fainel.

Gol bilong NSO i kamap insait long 15 minit taim Desmond Waku i setim straika bilong em long skorim. Na dispela em las gol bilong ol.

NSO i gat ol sampela gutpela pilaia olsem Richard Songo, Desmond Waku, Peter na Steven Mune tasol ol i no difen gut. Ol NSO i tingting tasol long skorim gol tasol nogat long banisim mak.

Olsem na Cellnet i yusim dispela

sans long skorim tripela gol. Straika bilong Cellnet, Henry Bae i gat planti gutpela sans tasol em i no yusim gut tingting long skorim gol. Sapos em i tingting gut, ating gol bilong Cellnet bai inap long faiv o siks.

Na long Bisini Graun 2, BPNG i strong tru long banisim gut ol NCDC na tupela tim wantaim i dro.

NCDC i gat intanesenel pilaia olsem Joe Aisa i go pas long tim. Em i kisim gutpela sapot long planti ol nupela pilaia.

BPNG em tim bilong namba tu Gavana Ben Popotai. Tasol nau em i kamap bikman na i painim hat liklik long kamap long trening na tu em i gat planti wok.

Wanpela bikpela stori long wiken em 1PIR tim bilong Taurama Bareks i daunim stret ol UPNG 4-0. Dispela em bikpela stori stret olsem nupela tim i mekim save long lapun bilong soka. Win bilong ol boi Taurama i mekim ol i stap yet long namba wan ples.


IKEN WOKIM GUTPELA SAMTING LONG

WANTOK

Classifieds

FAX: 325 2579 - PH: 325 2500

EMAIL: word@global.com.pg

LINEAGE ADVERTISEMENTS

Lineage: Advertisements are charged at K4.40 per line of 23 letters incl. space. Photo K10.00 each and appear 3.5cms. All advertisements inclusive of VAT. See Rate Card for conditions.

Office Hours:

8.30 to 4.00 Monday to Friday
Classified Advertising Available in the following formats

Lineage: Available in single line, minimum two lines deep

Display: Available per single, double or four column wide, minimum size 3 cms deep.

Single Column Display Advertisement are charged K4.42 per single column centimetre. Costing is dependent on Logo and Artwork which may appear in the advertisement. Minimum charge is for 3cm x 1col.

Display Classifieds are charged at K4.78 per single column cm. They may be double column, four column or full page with or without borders. Costing is dependent on space, logos and artwork which may be requested. Minimum size is 3cm x 4 columns.

Wantok is published on Thursdays. Deadline for camera ready work is 12 noon Wednesday; prior all other 12 noon Tuesday.

Classified Index
AUTOMOTIVE

- Boating
- Motorcycles
- New & Used Cars
- Parts & Auto Spares
- Trucks & Tractors

NOTICES

- Electoral Notices
- Government Notices
- Law Notices
- Public Notices
- TENDER

EMPLOYMENT

- Position Vacant
- Position Wanted

SEASONAL NOTICES

- Easter Greetings
- Father's Day Greetings
- Mother's Day Greetings
- Christmas Greetings
- Season's Greetings

GENERAL

- Amusement
- Auctions
- Business for Sale
- For Hire
- For Sale
- Going Finish
- Lost & Found
- Machinery for Sale
- Pets

- Wanted to Buy
- Wanted to Sell

PERSONAL

- Bereavement
- Birthday Greetings
- Births
- Condolence
- Deaths
- Engagements
- Funerals
- In Memoriam
- Wedding

PROPERTY/REAL
ESTATE

- Factories

- Warehouses
- For Rent
- Share
- Accommodation
- Holiday Resorts
- Houses for Sale
- Houses to Let
- Industrial Properties
- Properties for Sale
- Investment
- Properties
- Leave House Rooms
- Board Vacant
- Wanted to Rent
- Overseas Investments



**Opis bilong Infomesen, Komunikesen na Hai Teknoloji
Departmen bilong Praim Minista na NEC**

NESENEL POLISI LONG INFOMESEN NA KOMUNIKESAN RIVIU

Long 1994, Nesenel Gavman i tokaut long Nesenel Polisi long Infomesen na Komunikesen (NPIC). Dispela polisi i karamapim olgeta wok bilong infomesen na komunikesen.

Dispela yia, Nesenel Gavman na Minista i makim Infomesen, Komunikesen na Hai Teknoloji bai mekim wok bilong skelim NPIC. Ol i makim wangepela komiti long mekim dispela wok. Dispela wok em i stap insait long progrem bilong Gavman long luksave long ol senis na bikpela wok i kamap long eria bilong infomesen na komunikesen.

Dispela Komiti i askim ol pablik long givim tingting bilong ol:

- Raitim na salim i kam (long Hiri Motu, Tok Pisin o Inglis)
- Autim tingting long Redio Progrem
- Autim tingting long Pablik Semina
- Autim tingting long Intanet

Ol pablik semina bai kamap long Rabaul, Goroka na Wewak.

Taun	De	Ples	Lain i go pas
Rabaul	Fonde 22 na Fraide 23 Februari	Kaunsil ov Wimen Konfrens Rum	Is Nu Britain Provinsal Gavman
Goroka	Fonde 22 Februari	NSI Konfrens Rum	Goroka Univesiti
Wewak	Friday Mas 2	Toksava bihain	Is Sepik Provinsal Gavman

Yu ken kisim moa toksave long:

Rev. Oria Gemo (Kodineta) o Mista Noel Mohiba (Siaman - Riviu Komiti NPIC II) long
Telipon: (675) 325 7585, (675)300 5458. Fax: (675) 325 0412 Email: npic@tiare.net.pg

Tokorait i kam long: *Henao Iduhu, Dairekta, Opis ov Infomesen, Komunikesen na Hai Teknoloji, P.O.Box 639, Waigani.*

For your Classifieds adverts,
Call our Advertising Sales Team on
Telephone: 325 2500 or Fax: 325 2579



WANTOK SPOT



PNGRFL laik strongim zon sempionsip long 2001

RAGBI LIG RIPO

JAMES KEI i raitim

PNG Ragbi Futbol Lig (PNGRFL) bai lukluk long strongim jon sempionsip stat long dispela 2001 sisen.

Dispela plen na luksave i stap insait long 2001 kalenda bilong PNGRFL ol i bin putim aut las wiken long Goroka taim ol bikman bilong lig insait long kantri i bin go bung long New South Wales Spots Institiut.

Insait long kalenda zon-stat long Epril 6 map long Epril 21

bilong PNGRFL

FL, Kevin Murphy i bin tokim ol lain husat i kam long ol lig senta olsem zon sempionsip em wanpela bikpela lokol kompetisen insait long 2001 kalenda. Olsem na wan wan ol lig senta i mas afiliet na peim pilaia rejistresin pastaim long ol i stap insait long dispela resis.

Mista Murphy i tok olsem las yia (2000) dispela sempionsip i no bin kamap bikos planti ol senta i no bin pinisim sisen o fainel bilong ol long taim stret me PNGRFL i bin makim. Dispela i mekim na planti senta i no bin redim ol pilaias long makim senta bilong ol long pilai long zon-sempionsip.

Em i tok tu olsem las yia British Amerikan Tobacco i bin redi long sponsarim dispela sempionsip, tasol bikos nogat planti senta i bin redim tim na ol progrem bilong ol,

dispela sempionsip i no bin kamap.

Dispela ol toktok Mista Murphy i bin mekim long tok klia long ol lig sentas insait long kantri long redim ol yet gut na tu peim ol afilietin fi na pilaia rejistresin bilong ol.

Planti ol bikpela toktok bilong developmen bilong ragbi lig insait long Papua Niugini na ol narapela toktok bilong ol lig sentas insait long kantri i no bin kamap bikos PNGRFL i no bin holim bikpela anuel jenerel miting bilong (AGM) en.

PNGRFL i no inap holim AGM bilong en las wiken bikos i nogat inap namba bilong ol lig senta i afiliet yet i go long nesanel bodi.

Long miting ol i bin painimaut olsem tupeal senta tasol i peim afilietin fi bilong ol i go long

PNGRFL. Ol dispela senta em Rabaul na Minj.

Dispela i wanpela bikpela sem stret olsem ol bikpela lig senta long kantri olsem Mosbi, Lae na Mt Hagen i no bin afilietin bilong ol.

I bin gat wanpela muv o plen long kamapim wanpela vot i nogat bilip long menesamen bilong PNGRFL. Presiden bilong Lae Ragbi Lig, Daniel Nandoma i bin laik muvim dispela mousen long Goroka las wiken. Tasol, sore tumas dispela i no bin kamap bikos Lae tu i no bin afiliet na i no redim em yet bipo em i laik mekim dispela samting.

Planti ol lig predisen bilong ol senta insait long kantri i bin go long stap insait long dispela AGM. Sampela ol senta husat i bin go long Goroka em ol lig presiden

bilong Tabubil, Kerema na Rabaul na Kimbe.

Jenerel Menesa bilong PNGRFL, Kevin Murphy na siaman John Numapo i bin stap long Goroka tasol bikos nogat inap senta i bin afiliet, ol i no bin holim dispela AGM. Ol i surukim taim bilong miting i go long Mas 3, 2001.

Mista Murphy i tok strong tru i go long olgeta senta husat i laik pilai long dispela 2001 sisen long peim afilietin fi na pilaia rejistresin fi bilong ol kwiktaim. Dispela bai mekim na ol senta i ken go bihainim kalenda bilong 2001 sisen.

PNGRFL i bin tokaut tu long 2001 kalenda bilong en long las wiken.

Mista Murphy i tok ol senta i mas redim ol yet gut na kamap long dispela AGM long Mas 3.



• Straika bilong PNG Percy Mataiao i banisim birua bilong em bilong Vanuatu insait long namba wan gem bilong ol long Osenia Anda 20 tonamen long nesanel stedium long Raratonga, Cook Ailan : Photo: Cook Islands News.

Anda 20 kisim bikpela bagarap

BIKPELA ren i wok long bagarapim kik resis bilong Osenia Anda 20 i wok long kamap long biktaun bilong Cook Ailan, Raratonga.

Ripoti i kam long Cook Islands News i tokaut olsem Papua New Guinea i kisim bikpela bagarap tru long Vanuatu. Ol wantok long Melanesia i no sore long yu husat, ol i mekim save long PNG na skorim 7-pela gol olgeta. PNG i traim hat long bekim tasol ol boi Vanuatu em tu gut.

Insait long namba tu gem egensim Cook Ailan tim, ol boi PNG i autim belhat bilong ol na hamarim stret ol asples wantaim 4-pela gol olgeta. Ol asples, Cook Ailan, i no bekim wanpela gol.

Tupela tim wantaim, Cook Ailan na PNG i pilai long bikpela ren na wara i pulapim soka fil long nesanel stedium.

Nathaniel Lepani, i skorim tupela gol bilong PNG long dispela gem. Insait long namba wan hap bilong gem, straika Ravu Habuka na Maurie Wasi (midfida) i skorim gol.

Na long namba tu hap, boi ros

Lepani i karim yet strong bilong papa bilong em, Charles, long mekim save long difens bilong Cook Ailan na skorim tupela gol.

PNG bai bungim Australia long namba tri gem. Australia em feveret long winim dispela gem tasol PNG bai traim tasol.

Bihain long em, PNG bai bungim Tonga (Trinde) na Samoa long Fraide.

Kosa Richard Nagai i tokaut olsem gem egens long Vanuatu, ol boi bilong em i no inap tru long ol long wanem Vanuatu i tu gut.

Kosa Johan Carlos husat i kisim Tafea klab i kam long Osenia Kap long Pot Mosbi i go pas long lukautim tim. Na dispela i soim tru olsem PNG i mas tingting long painim wanpela kosa long ovasis.

Tafea klab i pinis namba tu long Australia long fainel. Skoa i sanap olsem 1-0.

Na long namba tu gem, Mista Nagai i senisim gem plen na pilai difensiv futbol. Na dispela i helpim tru tim long win.

Gutpela Pis tru bilong PNG... Em DIANA!

PROUDLY



- Tuna kam long solwara bilong Papua Niugini Stret.
- 100% tuna mit stret, nogat bun na nogat skin.
- Planti mit istap long olgeta tin.
- Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.